

NKONKO NÈ MANDAMUNA

 ...nkonko eyi kumpàlà kwà mèmè kufika ku cyambilu, kàdi Mwanèètù Moore, ùvwa mutùme dibìikila dyà lùkàsàlùkàsà, ke mèmè kwela meeji nè muntu kampàndà ùvwa ùsaama bikolè, kàdi ùvwa ùjinga ànu disangisha cyanààna. Pa nàнку mvwa nteeta kushiyangana nendè ku nshinga kuntu kwàka. Ùvwa muswè bwà mpwekàku mu cikondo cyà Disakidila bwà kwenza disangisha kuntwaku bwàbò bóbò, kàdi, mu Louisiane. Cidimu cishààle eci patùvwa kuntwaku, twètù—Mukalenge wàkabanga ditàbuluja kampàndà, nè kî ndyanji ànu kujika to; dicidi ànu munkaci mwà kwenzeka, ditàbuluja adi's. Ngápù mwoyi búngì bwà nkàmà yidi misungidibwe cidimu cishààle eci, pàvwa—paanyimà pàa ditàbuluja kuntwaku.

² Mpindyewu, ndi ngèèla meeji nè ncyenzè ànu bu ntùmbà wa cintùluntùlu, pàmwàpa, bwà kwikala mwab'ewu mu dindà emu; nè cidi nàнку bwànyì mèmè. Kàdi ncivwa mumanyè to, pa nàнку katùvwa bacimanyishe munkaci mwà bàmwè bàà ku, nudi bamanyè's, bantu abu to, ndi mulwè ànu lùkàsa bwà kwandamuna yimwè nkonko. Mvwa mwèlè meeji nè mùshindù awu. . . Pa ciibidilu mpaasàtà ùdi mwà kujandula cidi pa mwoyi wà cisàmbà cyèndè pàdici cyèla nkonko. Nèngu mùshindù awu ke wutùdi kujandula cidi bantu bèèla meeji.

³ Nèngu ndi ngèèla meeji nè kumpàlà kwà twètù kubanga mu dindà emu, kùvwa muntu kampàndà uvwa mwambè nè ùvwa nè mwànà wa kulàmbula. Billy ùvwa ùngambila nè kùvwa dilàmbula dyà mwànà. Byòbì nàнку, ndi. . . Èyo. Netùtwale mwànà mukesè ewu kunweku bwà kumulàmbula kùdi Mukalenge; nè pashìishe netwàndamunè nkonko, nè pashìishe netùsambidilè babèèdi.

⁴ Ndi muswè kufila mulubù wa nè mààmù wanyì udi ànu bu pa ciibidilu. Yèyè. . . Ncyèna ngèèla meeji nè yèyè ùdi bibì bitàmbe to, nànsha mùdibo bèèla meeji nàнку. Kàdi mèmè ncyèna ngèèla meeji nàнку to; ndi ngèèla meeji nè ùdi ànu bu mwàkadìye amu. Nèngu too nè piikalà Nzambi mungambile nè ùdi ùfwa, ncyà kuciitabuuja to. Nèngu nènshaalè mukwàte diitabuuja bwà Maman (nwamònu anyi?), too nè pààngambilà Ye nè ùyaaya.

⁵ Mpindyewu, Yèyè ùdi mwà kwikala munkaci mwà kumwangata; ncyèna mumanyè to. Bwèndè. . . Mmufwànyine kwikala mucinsokòke, ùngeepula ku diditacisha mu meeji anyi cintu kampàndà; cikòlà nengitabuuje nè Nzambi neàmusàngàjè nànsha mwikàle bishi. Kî mmudyè to kùkaadi mbingu yisàtù, kàdi ànu màyi à nsùkaadi; kàdi ndi ngiitabuuja nè mu mishindù yònsò yèyè neàsangalè. Nwamònu anyi?

Mwanèètù Neville. Èè, eci's cidi, tudi tutèkemena bwà kwikalayè, muiyishi mukwàbò wa ùlwa kaaba aka, m'Mukalenge Wood mwànà. Èyowà's, mukalenge. Dîná dyèndè mu kaabujimà nganyi? William David. Junior? Nenùmubiikilè nè Junior anyi? Uh-hum. Eci's ncimanyinu cikesè cidi citùmibwe mu dikù dyà Wood kuntu kwàka, nè, mu bushùwà bwà bwalu yêyè mmwengeleka wa kakwendè mukàji, nè... William David Junior mwànà ewu. Ncyà bushùwà nè yêyè mmwànà wa balùme mutekète, mulenga. Nènku mwanààbù wa bakàji mukesè neàmutyishè cilwinji kuntu kwàka, bwalu yêyè ùdi... Èyowà, yêyè ùdi nè munu mukònya mpindyewu, munu wèndè wà cipwita musàbù awu mmukònya. Ncilembi cyà nshìndi. Yêyè ùdi ànu munkaci mwà kungoosha dîsù dimwè. Ngèèla meeji nè mmwènzè ànu bu udi wa lumàmàmàmà. Huh? Kàdi tudi bamanyè nè ebi mbintu bikesè bidì Nzambì ùtùma mu nzùbu mwètù bitùdi twanyisha, mu ditwimikila dyà bujitu bwà kubàkolesha. Nè ndi mutwishibwe menemene nè bu ngàsà wa Nzambì mwà kutungunuka mu dikù edì, nènku mwànà ewu neàkoleshiibwè mu mibelu yà Nzambì. Twinyikàayi mitù yètù.

Taatù wetù wa mu Dyulu, nyèwù tuKutwàdila William David Wood mwànà mu dindà emu, mu Dîná dyà Mukalenge Yesù, mu kaneemu kàà Mifundu, nè bààkaMutwàdila, pàvwàYe pa buloba apa, bânà bakesè, bânà bakesè, bwà Wàmòna mwà kubàtentekela byanza Byèndè nè kubàbènesha. Nènku bu Yêyè kaaba aka mu dindà emu mu mubidi wà musunya, tudi bamanyè nè mwanèètù wa balùme nè mwanèètù wa bakàji bàvwa mwà kuMutwàdila cimanyinu cikesè cyà ngàsà eci. Pa nàнку, bu mutùdi nè cyà twètù kuMuleeja mpàla leelù ewu, mu diyiisha dyà Èvànjeeliyò, bàdi bàlwa nè mwànà ewu kutùdi. Ntwètù aba, ku diitabuuja, tubàndisha David mwànà ewu kuulu Kùdi, mu Dîná dyà Yesù, nè tudi tulòmba bwà Wèwè kumubènesha, Mukalenge. Nzambì, enzàku bwà ikalè nè mwoyi bwà kwikalayè mu—musadidi Webè, bu Wèwè mwà kunènga. Enzàku nàнку, Mukalenge. Mupèeshèku bukolè bwà mubidi nè dikàndà. Bèneshàku tatwèndè nè mamwèndè. Nènku swàkù bwà, byòbi biikàle mu diswa Dyèbè dyà Bunzambì, bwà nè mwànà wa balùme mukesè ewu neàkolè bwà kuyiisha Èvànjeeliyò mu matùkù àdi kumpàlà eku. Enzàku nàнку, Mukalenge. Tudi tuKupèesha William David Wood mwànà ewu bu musadidi Webè, mu Dîná dyà Yesù Kilistò. Amen.

David, mèmè ntu misangu yònsò ànu mudimùke bwà bânà bakesè abu; udi umvwa bu bàdi menemene, nudi bamanyè's, bu udi mwà kubàkùlula dîbà dyònsò.

Ndi ngèèla meeji nè, bânà bakesè bàà mu mabòko nè bantu bakolè: kwangata ànu muntu mukùlakàji ukàadi mumònemòne maalu; anyi mwànà mukesè wa mu dibòkò udi, bàdi bàmwèka bikolè bu bàdi kabàyi benzè bwalu to, nudi bamanyè's; ndi

ngàngata, kùdi cintu kampàndà cìdì cibàtàngila cìndì munangè bulelèlà.

Ndi ndikonka ní tudikù mwà kuteemesha bukènkè bwà kuulu kwà cyambilu eci ebu. Mwanèètù Neville, udi mumanye mwaba wùdibo . . . ? Kaa, ng'apa nùнку.

⁶ Mpindyewu, mu nkonko, tudi nè ndambù wayi kaaba aka, kàdi ncyenakù nè mpùngà wa kutàngila nànsha Mifundu yìdì—yà nkonko yìdì myediibwe to; bwalu mmifidiibwe ànu mu dindà emu. Nè ndi mfùma kudiyàngata ànu mu mutanci mukesè emu, ndi mutàngilekù ànu yimwè yà ku yôyi pamutùpamutù, nè mumòne yimwè yà ku nkonko, nè ndi ànu ndikonka nè mmunyi. . . Nè yimwè yà ku yôyi. . . Aka ke kasumbù kàà yà mitàmbe kwikala mikolè kànkaadiku mupetè. Nànu pàmvwa—pàmvwa nyitàngila, mémè kumòna nè netwikalè nè cikondo cikolè nè yôyi eyi.

⁷ Pa nànu mémè nciyi muyàndàmùne bilondèshìle diitabuuja dyènù mu nkonko eyi to. . . Mpindyewu, ikàlaayi misangu yònsò ànu bavùlùke nè mbilondèshìle ku dyànyi pàanyi dimanya. Nè pashiishe mîngà misangu pàmwàpa ndi—mu cyôci eci nengiikalè ànu ndeedila ku Mifundu bwà kuyàndamuna nè pàmwàpa mpangila dîbà dyà kuyitàngila. Nànu dîbà dinùyaaya kumbèlu, nudi nuyitàngilula nè numòna. Nènu pangiikalà mucitèele bibi, èè dîbà adi, ndi—ndi mufwànyine kwikala mutùpàkàne. Ncyèna nè meeji à kutèèla muntu bibi to, kàdi—kutèèla Mufundu bibi, kàdi mîngà misangu tudi mwà kucyènza. Pàmwàpa mwàkù kampàndà mwaba wùdìwu mufwànyine kwikala cintu kampàndà, dîbà adi tudi bafwànyine kucyàmba mu mùshindù mukwàbò. Nudi bamanyè mùdìbi bipeepèle bwà kucyènza.

⁸ Kàdi tudi munkaci mwà kwipacila—kiipàcilà kèètù nkàà kuyitèèla mu yôyi. Nènu bu mémè nè cyà kuyàngata twàmbe nè edi dyàlumingu nè kuyàndamuna dyàlumingu dyàlondà; dîbà adi's mvwa mufwànyine kupeta dîbà dyà kuyikenketa munda mwà lumingu lujimà alu.

⁹ Kàdi kùdi babèedi bàabúngi bàdi bàlwa, nè mu bulelèlà mvwa, mu bulelèlà mvwa nè mudimu munjìngile nè ncivwa mupetè mpùngà wa—wa kupàtuka nè kwenza àbúngi à ku mabiikila àanyi to. Nènu mvwa ndyàmbidila nè leelù ewu mmufwànyine kwikala cikondo cimpè, kulekela ànu babèedi abu bàbwela mu tabernacle emu nè tuvwa mwà kubàsambidila. Nè tudi bamanyè nè disambila ditu dîshintulula maalu.

¹⁰ Disambila didi dîtwenzelakù cintu kampàndà. Nè nku disambila kùndi nè mwoyi leelù ewu. Ndi nè mwoyi ku ngàsà wa Nzambi kupicila ku disambila. Nènu mu dindà emu bu mùndi mucyòke ndambù nè muzengèle, ndi njinga masambila ènù bwànyi mémè, bwà nwènù kunsambidila.

¹¹ Nè pashiishe, mvwa ku nzùbù kwà mulundà wanyi makèèlèlà awu, nzùbu wa beena Kilistò kùvwà beena Kilistò

kampàndà bàà bitende bakùngwile. Nènku mvwa munkaci mwà kuyiikilangana naabò, nè ci—cintu kampàndà kudileejaci nkààyaaci kùndì, meeji à mùdì...Mvwa munkaci mwà kutàngila mwitu nè mu nyùngulwilu wa micì nè kuyimòna munkaci mwà kufwà, ke mèmè kwela meeji nè: “Mùshindù wùdì micì ayi milenga nànsha mwìnè mùdiyi munkaci mwà kufwà; nànsha nàнку yìdi mîmpè kumòna.” Nènku mîngà misangu mucì wùdì wùmwèka mwîmpè menemene pàdiwu munkaci mwà kufwà kutàmba mùdiwu pàdiwu mu bubishì bwàwù nè mutàmbe bukolè apu. Nènku ndi ndikonka aci ní kî ncifwànyinekù kupàtula patòòke ngiikàdìlù yetù mu cimfwànyì kùdì Taatù wetù wa mu dyulu, bwalu Yèyè wàkamba nè: “Ndwa mushinga mukolè ku mèsù kwà Mukalenge lufù lwà bansantu Bèndè.”

¹² Mmùshindù kaayì wùdì aci nè cyà kwikala ci—ci—cintu cilengèle kumòna bwà Taatù kwinyikaYè mèsù Èndè kutàngila mwan’Èndè wàlukila kumbèlu kùdìYe nè mulamè kaaba kèndè mu Kilistò, diitabuuja dyèndè nè ditonda dyèndè (nwamònu anyi?): “Ndi musùngìdiibwe ku ngàsà wa Nzambi!” nè mwimàne mwaba awu (nwamònu anyi?) mu dîbà dyà—dyà lufù, nànsha nàнку tudi mwà kulama ditonda dyètù, nè tudi basùngìdiibwe.

¹³ Nè ndi ngiitabuuja nè Taatù wetù ùdi—mmunangè bukitù bwètù, mu kwitabuuja nè kulama bujaadiki bwètù. Nènku bìdi ànu—kabyèna ànu bwà kufila bujaadiki paùdì udyùmvwà bîmpè, nè mubidi tumatuma, nè dikàndà to; ndîbà dyùdì kwînshi, mupùngile, nè mutàcishìibwe. Ke dîbà dîdì bujaadiki bwèbè nè mushinga ndyòdì adi.

¹⁴ Nènku pa kwela meeji ku cyòci aci, mvwa munkaci mwà kwela meeji ku cyòci eci nè, lufù kalwèna luswikàkàne nè mwoyi to. Mwoyi nè lufù kabyèna mwà kwikalakù musangu wùmwèwùmwè awu to. Nènku bikèngela bwà mâyi à micì àpàtuke munda mwàyi kumpàlà kwà dibèji adi kupeta mwà kufwàdi ku mucì awu. Pa nàнку ki bwà cinyi, lufù nduswikakaja—ndi mufwànyine kwela meeji mu bipaapu byà muntu—lufù nduswikàkàne nè mpèkaatù. Bwalu kumpàlà kwà twètù kwikala nè mpèkaatù nànsha umwe, katùvwà nè lufù to nànsha kakesè. Kàdi mwaba wùdì lufù, dîbà adi kùdì mpèkaatù; nè mwaba wùdì mpèkaatù, kùdì lufù; bwalu lufù mbipeta byà mpèkaatù.

¹⁵ Nè dîbà adi, ewu udi...Musùukà wùdì wènza mpèkaatù awu, newùfwe. Kàdi patùdì tulediibwa cyàkàbìdì ku Nyumà wa Nzambi, tudi nè Mwoyi wà Cyendèlèlè nè katùyi baswikàkàne nànsha mwaba ùmwè nè lufù to. Nwamònu anyi? Lufù kalwèna mwà kuswikakana nè Mwoyi to. Mwoyi kawèna mwà kuswikakana nè lufù to.

¹⁶ Nènku pàmvwà nyiikilangana nè—mu cibambalu makèèlèlè mùvwà beena Kilistò bàà bitende bàsanganyibwa, Mèmè nè:

“Bu nè wêwê uvwa mwimàne pambèlu apa mu njila nè kàshinyi kiikàle kapweka nè njila mu lubilu lwà kilòmèètà lukàmà nè makumi ànaayi nè yinaayi ku dîbà dîmwè kakàyi nè bukòntononyi to, udi mufwànyine kuumuka mu cibeeba aci nè lùkàsà lwònsò. Udi mufwànyine kutùpika, kuselemuka, kwenza ní ncinyi cyònsò, kupàtuka mu njila wa kàshinyi aku.” Nènkù mùshindù awu ngùvwàbi bikèngela bwà mpèkaatù kwikalayè bwà mwena Kilistò, bwalu mpèkaatù mmuswikàkàne nè lufù. Nènkù paùdi ànu nè wàmònu mpèkaatù mu mmwènekèlu kanà yònsò, tùpikà uumùkà kùdiye, uumùkà kùdiye. Cidì cìkèngela bwà wêwê kwenza nànsha ciikàle cinyi, ndàaku kule nè mmwènekèlu mene wa bubì. Bwalu nwavùlukaayi nè, kuswikakana nè mpèkaatù ndufù. Ànu byà mwomùmwe nè kwimana mwaba awu nè kulekela kàshinyi aku kàkututa.

¹⁷ Kwìndidi ànu cyanààna bwà kumòna cyènzàku to; patukà mu njila wakù. Mmwènekèlu mene wa bubì, munyeeme nè lùkàsà lwònsò. Paùdi umòna diteeciibwa dijuuka, nè mpèkaatù. . . Udi mumanyè nè, cyòci cintu kampàndà cyà cibì, lufù lùdi lwènda lùkubembela. Nwamònu anyi? Dîbà adi uumùkaayi mu njila walù nè lùkàsà lwònsò lunùdi mwà kunyeema naalù kaa—kaadishinyi kàdi kènda kàseemena nè lùbilu lwà kilòmèètà lukàmà makùmi ànaayi nè yinaayi ku dîbà. Nwamònu anyi? Udi mufwànyine—nudi mufwànyine kuumuka mwaba wùdiku awu nè lùkàsà lwònsò: Kuumuka mu njila awu, kutùpika, kuselemukila ku luseka, kunyeema mùshindù kanà wònsò, kuya ànu kule nè mwaba wùdiku awu.

¹⁸ Nè mùshindù mene wutùdi tumanya nè tudi nè Mwoyi, mbwalu tudi tukina mpèkaatù. Nè tudi tukina mpèkaatù bibi be, mu mùshindù wà nè tudi bamanyè nè lufù nduswikakanemù, nè tudi tunyeema too nè mmwènekèlu mene wendè. Mùshindù wònsò wutùdi mwà kuumuka kùdiye, kutùpika, kunyeema, cintu kanà cyònsò citùdi mwà kwenza bwà kudilama kule nè mpèkaatù aci, bwalu mpèkaatù ùdi nè lufù mu yéyè. Nè ncyà bushùwà nè katwèna baswè kuswikakana nè cintu nànsha cimwè mu lufù to. Tudi baswè kushààla kule naaci.

¹⁹ Pa nànkù mèmè kudyàmbidila nè aci ncifwànyine kwikala kaadyeji kakesè kimpè. Ncindengè makèèlèlè awu pâmvwà ngàakula nè beena Kilistò abu; nènkù mèmè kwela meeji nè aci ncifwànyine kwikala cimpè cyà kupèèsha èkèleeziyà mu dindà emu, nangànangà pàcìdi bansòngà basòmbe kaaba aka nè biikàle mwînshì—mwînshì mwà mateeciibwa à mùshindù awu apa.

²⁰ Nè pashìishe, ndi ngèèla meeji nè lukonko kampàndà, bu twètù ànu mwà kufika ku lwòlù lwà kwînshì eku, cintu kampàndà cikwàbò cidì ciswikàkànemù kàbìdi. . . Nè vùlukàayi ànu nè cintu kanà cyònsò cidì cyà mpèkaatù aci, lufù lùdi lùsanganyibwa mwaba awu mene. Nènkù paùdi wabanyangana

mpèkaatù awu, udi wabanyangana lufù. Pa nànkù shààla kule nendè.

21 Nènkù mpèkaatù ncinyi? Bupidya. Uh-huh! Shààla kule nè bupidya bwònsò, cintu cyònsò cidi cipeejà Bible aci. Cintu kanà cyònsò cidi cipeejà Dìyì dyà Nzambi aci, shààla kule naaci! Nènkù mèmè mujikije yôyi eyi pa dîbà kumpàlà kwà mèmè kwenza mudimu wànyì wà dyondopa, ndi muswè kwakulakù ndambù pa cyôci aci, kapeejà.

22 Mpindyewu, kumpàlà kwà twètù kwandamuna ku nkonko anyi kuteeta bwà kuyilenga, túsambilàayi. Taatù wetù wa mu dyulu, tudi tubwela mu bwikadi Bwèbè mu dindà emu mu Dîna dyà Yesù, biikàle twamba nè tudi bakòsòlòke twètù biinè nè bintu byà pa buloba, cidi cyambiibwe kùdìYe nè, kwèna mwà kukwacila Nzambi mudimu nè maamònà to, mbwena kwamba nè buloba; tudi anyi tunyooka umwe nè tunanga mukwàbò anyi tunanga umwe nè tunyooka mukwàbò.

23 Nè tudi twitabuuja mu dindà emu nè tudi baswikàkàne nè Mwoyi wà Cyendèlèlè patùdi twitaba Yesù Kilistò ku diitabuuja apa nè tupeta cileeji cyà Nyumà Mwîmpè musòmbèle mu myoyi yètù ütùlombola. Tudi nè kusàkidila kwàbùngì bwà bwalu ebu, bwà patùdi tumòna mpèkaatù nànsha yèyè mwikàle mutekète bishi, nànsha yèyè mufwànyine kumwèka mulenga wa bishi, kùdi cintu kampàndà munda mwètù cidi citùfikisha ku ditùpika, kushààla kule naaci, ànu mùdi cileeji cîmvwà mufile bwà bwalu bwà kàshinyi kiikàle kàlwa mu lùbilu lwà mùsà. Katwèna baswè kusanganyibwa mwaba nànsha wùmwe mu—mu mpèkaatù to. Kuumùkàku.

24 Nènkù mpindyewu, Mukalenge, pàndi ndyumvwa mu dindà emu nè kùdi babèèdi bààbùngì nè bàdi mu lukèngelu, ndi mwà kubàsambidila, Mukalenge, bwà Wèwè kupèeshakù diitabuuja kùdi aba nangàngà bàdi mu tabernacle emu mu dindà emu bààlwà mu mulongo wà babèèdi ewu, bwà bààmònakù mwà kutèeka ku luseke bujitu bukesè bwònsò, bupidya bwònsò—bwònsò, kuumukakù nè lukàsà lwònsò, nè kumyeena kùdi Mukalenge Yesù mu diitabuuja bwà kwitabuuja.

25 Ndi ndòmba bwà aba bàdi mu mpitàadi nè mu nzùbu yà bàdi bènda bàsànguluka. Nènkù, Mukalenge, nyèwù ndòmba bwà mààmù wanyi. Bu mùcidibi nè, Mukalenge, Wèwè udi mumulamè neetù, nè tudi tuKusàkidila bwà cyôci eci. Nènkù nè diitabuuja tudi toolola byanza byètù byà majinga, dyàmbedi bwà kumanya diswa dyà Nzambi, bwà kumòna nè cyôci diswa Dyèndè bwà kuyayè. Cyôci ciikàle diswa Dyèndè, dîbà adi tudi—aci ndiswa dyètù, kàdi dyàmbedi tudi baswè kumanya Sàtaanà ní mwenzè bubì ebu nè bikwata mudimu pàmwe bwà dyàkalengèlè dyà bàdi batùnangà bwà kutùpèesha diteeta. Dîbà adi, Mukalenge, tudi baswè kwimana nè bukitù ku mwaba wà mudimu.

26 Tudi tulòmba mu dindà emu, Taatù, bwà kuvùluka mabiikila ònsò à ku téléfonè awu nè malòmba à pabwàwù àdi mindile mu bìrò mwàmwa awu. Bèleshàku bananga bèètù myaba yònsò.

27 Nènku leelù ewu bu mùdibi bitàngila dyandamuna dyà nkonko, Mukalenge, tudi tujandula nè eyi nyà ndòndò mule, bintu byà meeji matòòke bìdì pa myoyi yà bantu. Kì mbayèle ànu bwà dikùtakana cyanààna to; mbayèle bwalu mbanangè bwà kumanya Bulelèlà. Dìyì Dyèbè didi Bulelèlà.

28 Pa nàнку, Taatù, tudi tulòmba bwà Wèwè kuswikakaja meeji ètù mu dindà emu mu Bulelèlà ebu, Dìyì, nènku tùkwàcishèku, Mukalenge, bwà twikalèku bakùmbàne mwà kuumvwa bimpè menemene leelù ewu patùdì tuumuka mu nzùbu wa dilongesha ewu apa, bwà byàfwànyina kwikala bimpè bwà misùùkà yètù. Tudi tulòmba nùнку bwà butùmbì bwà Nzambì mu Dìna dyà Yesù Kilistò Mwan'Èndè. Amen!

29 Mpindyewu, kùdi ndambù wa mishwàlà mitèèka mwab'ewu, ndi ncinka, yà kusambidila, nè netwenzè cyòci aci mu mutanci mukesè pàdì ànu mpungà ùmwènèka. Mpindyewu, bwà kujikija pa dībà tudi bu nè dībà dijimà nè citùpà nàнку awu. Ncyèna ànu mumanyè menemene, ànu mungàmbi kumpàlà amu, ní ngiikalè mukùmbàne mwà kwandamuna ku yònsò eyi anyi to. Kàdi citùdì bàlongòlòle bwà ndongamu leelù ewu mbwà kwandamuna ku nkonko, kwenza ànu kaadiyiisha kakesè cyanààna mwab'ewu pa—bwà—bwà kukwàcisha diitabuuya dyà bantu, pashiishe kwenza disambila dyà babèèdi. Nè nwavùlukaayi masangisha à dilòòlò edi, nè masangisha à milòmbò à munkaci mwà lumingu, masangisha à bantu balùme, nè bikwàbò.

30 Nènku ncyèna mumanyè bwà dyàlumingu dyàlondà ní... Ndi nè—nè cyena-bwalu pa mwoyi wànyì cindì njinga kutwàdila èkèleeziyà byòbì mwà kwenzeka, bu Mukalenge mwà kucyànyisha, mu dyàlumingu dilwalwà edi, cintu cyà—cyà pabwàci menemene cidi cilwè kùndì mu lumingu elu bwà kuyiisha, ànu diyiisha dyà kuyiisha pa, diyiisha dyà butangadiki... Netùmonè bwalu abu pashiishe ndambù mwàlombolà Mukalenge wetù amu.

31 Nènku nwànsambidilaayikù mpindyewu, bwalu mapàngadika manène àdi nè cyà kwangaciibwa. Mwanèètù Roy Borders (Ngèèla meeji nè mmusòmbe kaaba kampàndà mwab'ewu mu dindà emu), ùdi ùcyùka ndongamu wa masangisha, nènku ùdi nè mukàndà mùle tètè nè mabiikila àdi mabwelè munda mwà ngondo mikesè mishààle eyi—nè àà myaba yà kuya, nè bantu bàdì bàmubiikila bwà masangisha abu. Nè pa nàнку nwànsambidilakù bwà Nzambì kwenzaYè nè ngàngatè dipàngadika dijaalàme mu cyònsò cindì ngèza, ciikalèku cijaalàme, cii—ciikalè nè mushinga.

32 Mpindyewu, bwà kwandamuna ku nkonko yitùdì bamanyè nè mmikolè yà kacya... Nènku ke bwà cinyi ndi ngàdamuna ku

nkonko (katutukù bamanyishe mudimu wà dyondopa anyi cintu kampàndà to, pa nàнку mbàfwànyine kwikala ànu bantu bàà kumbèlu aba), bwà twamòna mwà kujandula cìvwà pa mwoyi wàbò.

³³ Nèнку Mwanèètù Neville udi musòmbe lwà paanyimà apa ewu, mwanèètù wa musinga mukolè nè mpaasàtà, yèyè—ndi nè kusàkidila kwàbùngi bwà kumumòna útanta mu Bukalenge bwà Nzambì; ndi ngiitabuuja nè mmwenzè ntàntà mule mu bidimu bikesè bishààle ebi kutàmba mùvwàye mu bidimu byònsò bisangisha pàmwè. Mùshindù mwinè wùdì Mukalenge mumubènèshe's wè! Ndi nè disànkà dyàbùngi bwà bwalu abu.

³⁴ Nèнку ncyàkwamba bwalu mmwísù mwèndè to...Ntu ncyènza pàdiye kàyipù to, nè nudi bamanyè nàнку. Mwawa mumanyè Mwanèètù Neville kacya ànu pàncìvwà mwànà mutekète apu. Nwamònu anyi? Nèнку ndi mumanyè nè bu Mwanèètù Neville...Ndi ngiitabuuja eci; yèyè ùdi mwenji wa bilèma bu twètù bònsò aba; twètù—twètù bònsò aba tutu tubyènza, tucidi ànu bantu. Kàdi kì ncifwànyine kufùmina mu mwoyi wèndè to; ncyèna ngiitabuuja nàнку to. Yèyè's mmufwànyine kwikala nè meeji matòòke, nè yèyè ùtu misangu yònsò ànu wa meeji matòòke matàmbe kutùmbuka.

³⁵ Nèнку pààkalwàye ku Mukenji ewu, mwawa mumwakìdile—mulwè nendè mwab'ewu ku disungula dyà èkèleeziyà ewu bwà kwikalayè mpaasàtà mwaba ewu dībà divwàye mene kàyi ùmwawa bintu ebi mùdiye ùbyùmwawa mpindyewu emu to. Kàdi meeji èndè matòòke bwà kujinga kudilekelela nè kucitàngila nè kusemenakù nè kaneemu kààbùngi, mu mùshindù wà nè ndi ngèèla meeji nè ùdi nè nshindameenu mwimpè menemene, bwà nè pàdiye ùlwa mpindyewu, yèyè mmumanyè mwaba wùdiye mwimàne mpindyewu.

³⁶ Pa nàнку ndi—ndi nè disànkà dyàbùngi bwà tabernacle ewu. Nèнку bààkamba dilòòlò adi mu—bààkenza cisangilu kaaba aka cyà ní bàvwa mwà kwibaka tabernacle mupyamùpyà anyi bwà kwalabaja ewu nùнку nè kumuvwija mutàmbe bunène nè kwenza bibambalu byà kàlaasà kàà Dyàlumingu munda mwèndè; nè èkèleeziyà yònsò nè dīyī dimwè pàmwè kusungulayè bwà didyundisha, bwà kutèeka dyàpà dipyadipya mwab'ewu, kutàmba kumwalabaja, nè kutèeka bibambalu byà kàlaasà kàà Dyàlumingu mu mùshindù wà nè kwikalè bibambalu bwà tulaasà twònsò, nè kwela tàpi panshì, nè kulamika mabayà à mucì wà bouleau pamutù apu, nè kuàlamika bilenga memene, nè kulamika mabwe à Bedford pambèlu apu. Nèнку ke mùvwà èkèleeziyà musungùle nàнку awu. Nè ndi ngèèla meeji nè bamanyi bàà maalù à diibaka nè bakwàbò abu bàdi munkaci mwà mudimu mpindyewu. Kùdi cisangilu cyà bwalu abu mààlabà bwà kumwenza èkèleeziyà wà—wà mutàmbe bunène, kumwalabaja lwà paanyimà pààpa nè kumushindika

mu nyùngulukilu emu bishiilàngàne. Pa nàнку netwikalè nè kusàkidila kùdì Mukalenge bwà bwalu abu.

³⁷ Mpindyewu, mu nkonko eyi ndi . . . Yimwè yà ku yôyi ncyèna nànsha muyitàngile to. ndi mwà kuya bipeepèlè bwà kutèela myàkù ku dìleeta nè dileeta bwà kujandula. Kì mfùndilu wa cyanza cyènù to, kàdi nkàlaasà kàànyì kashààdile.

151. Tudi twitabuuja mu kubàtijiibwa . . . Byenzedi 2.38, kàdi mmunyi mutùdiku mwà kwandamuna bantu pa bìdì bitàngilà dibàtiiza dikwàbò? Mbasùngidiibwe anyi kì mbasùngidiibwe? Kàbidi aba bàdi bayè nè kabàyi bapeté bukènkè abu?

³⁸ Mpindyewu, aci's ndukonko lwí—lwimpè. Mpindyewu, ngànji ngàmbe cyàkàbìdì (nwamònu anyi?) pa nkonko eyi, nwènù kanùyì—mémè ncìyì muyàndàmùnè bilondèshile meeji ènù to. . . Ndi nyàndamuna ànu mùdìyì pabwìpì menemene nè Mifundu bilondèshile dyànyì dimanya, bwà kuyivwija yà mu Mifundu.

³⁹ Mpindyewu, mùshindù wà mu Mifundu wà dibàtiiza dyà mu màyi didi mu Dìna dyà Mukalenge Yesù Kilistò, didi disanganyibwa mu Byenzedi 2.38 nè bikwàbò, mu Bible mwònsò emu. Nènku bantu bààbùngì leelù ewu nè pàmwe nè èkèleeziyà yònsò nseke yònsò kwambwila ku cibangidilu, eyi yà kacitwàdijà, bàdi bàbàtiiza bantu mu dìnà dyà Taatù, mu dìnà dyà Mwànà, nè mu dìnà dyà Nyumà Mwimpè. Mpindyewu, bàdi bènzela aci ku dipanga. Kakwèna mudimu mutùma naawù bantu bu nàнку mu Bible to, mwaba nànsha wùmwe. Kacyèna nànsha cisanganyibwa mu Mifundu to.

⁴⁰ Pàvwà Peetèlò . . . Pàvwà Maatàayi ùfùnda cìvwà Yesù mwàmbe . . . Mwaba wùvwàbo nè cyà kwangata Maatàayi 28.19 nè: “Ndàayaaku, nùkalongèshè bàà mu matùnga ònsò, nubàbàtiiza mu dìnà dyà Taatù, Mwànà, nè Nyumà Mwimpè” . . .

⁴¹ Taatù, Mwànà, nè Nyumà Mwimpè, ayi's mmyànzù, kì ndìnà to. Dìnà dyà Taatù, Mwànà, Nyumà Mwimpè m'Mukalenge Yesù Kilistò. Taatù, Mwànà, nè Nyumà Mwimpè . . . Nènku bu Yèyè . . . Nè pashiishe bààkabàtiiza mu Bible mujimà, muntu yònsò mu Dìnà dyà—dyà Mukalenge Yesù Kilistò. Kale wàwa mu maalul malonda bààkalwa nàнку too nè ku dishimika dyà beena Laòdikiyà (Mfwilaayikù luse), Nsangilu wa Nicée wa èkèleeziyà wa Kàtòlikè ku Nicée, mu Loomò.

⁴² Pàvwà èkèleeziyà wa beena Mpenta . . . Bisùmbù bibìdì, byàkatàpuluka, ewu ùvwa muswè kushààla nè Dìyì, Dìyì difùnda, bakwàbò bàvwa bàjinga èkèleeziyà wa cipidì citùmbùke. Mùvwa mmu cikondo cyà bukòkeshi bwà Constantin. Nènku Constantin kàvwa muntu mutèndeleeedi to; ùvwa mumpàngaanù ànu kwìnè kwònsò aku. Kàdi yèyè—yèyè ùvwa mwena cidìidì uvwa muswè kusanga . . . Cyàbibidì cyà Loomò bàvwa beena Kilistò; cyàbibidì cyèndè bàvwa

mbampàngaanù, pa nànkù yêyê wàkaangata ndambù wa bumpàngaanù nè ndambù wa bwena Kilistò bwà musumbà wà cipidi citumbùke; nè bàakaditelakajila wabò ntèndeelè.

⁴³ Ki bwà cinyi, bwà kupwekesha Bible milongo, èkèleeziyà wa Kàtòlikè ùdi witabuujà nè Nzambi wàkapèesha èkèleeziyà bukolè bwà kushintulula anyi kwenza cintu kanà cyònsò cìvwàye muswè kwenza aci. Nwamònu anyi? Ki bwà cinyi, piikalàbi nè èkèleeziyà wa Kàtòlikè mmubingè, piikalàbi nè aci ncilelèlè cyàkenzà Nzambi, dîbà adi twètù bònsò tudi bapîile pa kuumusha beena Kàtòlikè (nwamònu anyi?), èkèleeziyà wa Kàtòlikè mmubingè. Dîbà adi èkèleeziyà wa ba-Méthodistes mmubingè. Dîbà adi èkèleeziyà wa ba-Baptistes mmubingè, anyi malongolodi ônsò awu mmabingè. Nwamònu anyi? Bàdi nè bukenji kampàndà. Kàdi nganyì udi mubingè dîbà adi? Beena Kàtòlikè bôbò biikàlè nè bukolè bwà bafwànyine kushintulula cintu kanà cyònsò cidi Bible muswè kwamba aci nè kucyènza malongesha à mùshindù mukwàbò kampàndà bwà kwela “Màriyà, Mwoyi” nè bikwàbò, ba-Méthodistes bàdi nè bukenji bwà kwamba nè: “Dibàtiiza ku diinyijangana dyà mu màyi ndibi; twètù netumyaminè màyi,” nènku muntu nè muntu mmubingè, bwalu muntu nè muntu ùdi mwà kwenza cyònsò cidi èkèleeziyà aci, mpindyewu, nganyì udi èkèleeziyà dîbà adi? Ke Méthodiste anyi, Baptiste, Presbytérien, Kàtòlikè, anyi ncinyi aci? Nwamònu anyi?

⁴⁴ Pa nànkù kwèna mwà—udi mumanyè nè Nzambi, mu—mushimi wà lungènyì lwònsò kî mmufwànyineku kwenza cintu bu nànkù to. Kakwèna cyà nànkù... Kamwèna nànsha cyumvwilu cyètù cyà buumuntù eci munda amu to, katùyi twamba bwà meeji à Kampàndà mutàmbe-mfùkilu to. Kùdi cintu cimwèpelè cidi cyà bushùwà; aci’s n’Diyi. Diyi ndibingè!

⁴⁵ Nànkù dîbà adi, èkèleeziyà wa Kàtòlikè yêyê muswè kwamba mu dindà emu nè: “Netùlekelè byà dibàtiiza byònsò abi nè netwàngatà didyà dyà kabùlù kàà nsùkàadi dindà dyònsò. Ke citwàngatà bwà dilekelediibwa dyà mpèkaatù ncyôci aci!” dîbà adi aci cidi nè cyà kwikala cijaalàme, bwalu cidi—Nzambi wàkapèesha èkèleeziyà bukolèshì abu.

⁴⁶ Kàdi nudi numòna’s, bwànyì mèmè Diyi ndidi dibingè, bwalu ku ndekeelu kwà Bible, Nzambi mmwambè nùnkù mu Diyi Dyèndè nè: “Ewu yònsò wadidìnga kuumushila Diyi dimwèpelè ku Cyôci eci anyi wasàkidilaKù diyi dimwèpelè awu, cintu cimwècimwè aci necyùmushiibwè, cyèndè citùpà, ku Mukàndà wà Mwoyi.” Pa nànkù bwànyì mèmè n’Diyi!

⁴⁷ Nè cintu bu nànkù kacitukù mu Bible to cyà nè muntu kanà yònsò ewu mmubàtìijibwe mu dîna dyà Taatù, Mwànà, Nyumà Mwimpè; bwalu cintu bu nànkù kacitukù to. *Taatù* kî ndîna to; nè *Mwànà* kî ndîna to; nè *Nyumà Mwimpè* kî ndîna to, kàdi Dîna dyà Taatù, Mwànà, Nyumà Mwimpè ke Mukalenge Yesù

Kilistò. Ànu menemene cìvwà bàpostòlò nè mu bikondo byònsò bajingùlùla aci.

48 Mpindyewu, lukonko lùdi lùlondà lùdi . . . Mu bushùwà bwà bwalu aci ncyà bushùwà bilondèshile Mifundu. Aci's m'Bulelèlà.

49 Kàdi mu Bible pàakasanganàbo bantu bàvwà biinyijìibwe mu màyi mungà mùshindù pa kuumusha mu Dinà dyà Yesù Kilistò, bàakabàtùmina díyi bwà kubàtiijìibwabò cyàkàbidì mu Dinà dyà Yesù Kilistò kumpàlà kwà kupetabò Nyumà Mwîmpè—Byenzedì 19.5. Cyà bushùwà! Pa nànkù aci m'Bulelèlà bwà mu Mifundu.

50 Mpindyewu, kakwèna mwèpiskòpò to; kakwèna mwèpiskòpò mutàmbidile to; kakwènakù mwambi nànsha umwe; kakwènakù muntu mukwàbò nànsha umwe udi mwà kwamba díyi didi dibèngangana nè cyôci aci to, bwalu aci m'Bulelèlà. Nwamònu anyi?

51 Nè mvwa mukonkè ditùkù adi mu Chicago kumpàlà kwà bambi nkàmà yisàtù bàvwà biimàne mwaba awu abu bwà kukòkangana nè kukonka nànkù. . . Mèmè. . . Ke Mukalenge kungambilaYè, nè kumpèèshaYè cikèèna—kumòna, nè kungambila mwaba wutùvwà mwà kwikala nè cyà twètù kwenza. Mvwa mwimàne kumpàlà kwà bambi nkàmà yisàtù bàà ba-trinitaires, ke mèmè kwamba nè: “Mpindyewu, pangìikalà mèmè mutùpàkàne mu dilongesha edi, kampàndà umwe wa kunùdi imanè mwab'ewu àndèjè mwaba wùndi mutùpàkeene ku Mufundu kabìyi ku mukàndà wà kàlaasa to. Pìikalàku kakùyì cintu cyà bwena bu dimiinu dyà nyòka anyi cintu kampàndà bu mùdi aci cìmvwà munkaci mwà kulongesha, àlwe ànu cyanààna mwab'ewu àndèjè ku Mifundu.” Muntu nànsha umwe kàtùkù munyungè to (nwamònu anyi?), bwalu kabyèna mwà kwenzeka to. Aci's ncilelèlà. Kì mbwà kupangakanangana to, kàdi cidi ànu Bulelèlà; n'Dìyi. Nènku's ke mwaba awu. . . Muntu nànsha umwe kèna mwà kukòkanganakù to; aci's n'Dìyi dyà Nzambi; muntu nànsha umwe kèna mwà kucyènza to. Nwamònu anyi?

52 Kàdi mpindyewu: “Nekwikale aba bàdi kabàyi nè. . .” Ngánjì mbalè eci bwà kwikala mutwishìibwe nè mmu cyôci. Nwamònu anyi? “Pa bìdì bìtàngilà mabàtiiza makwàbò, mbasùngìdiibwe anyi to? Kàbìdi aba bàdi bayè nè kabàyi bapetè bukènkè abu?”

53 Èè, ndi ngiitabuujà—ndi ngiitabuujà kakùyì tuseku nè Nzambi wàkabiikila bantu Bèndè nè wàkalongolola Èkèleeziyà Wèndè, nè bònsò bàvwà mwà kwikalakù abu, kumpàlà kwà difukà dyà dyulu nè buloba. Mèmè ndi ngiitabuujà nè Bible ùdi ùlongesha nànkù. Nè ndi ngiitabuujà nè muntu yònsò udi munangè Nzambi nè mwoyi wèndè wònsò neàkebè Bulelèlà. Ndi—ndi—ndi ngiitabuujà aci, nè nebènzè nànkù. Muntu yònsò udi munangè Nzambi neènzè nànkù.

54 Ndi ngiitabuuja nè muntu yêyê mubàtijiibwe bibi mu dipanga, kàyi mumanyè nè ùvwa mubàtijiibwe mu ntùpàkànyì to...Mpindyewu, ncyêna mwà kwamba eci bilondèshile Mifundu to. Kàdi ndi nciitabuuja nè mwoyi wànyì nè muntu yêyê kàyi mumanyè cyà dyenza cimpè to, nè kwenzayè cintu kampàndà cyà citàmbe bwimpè ku dimanya dyèndè, ngèèla meeji nè Nzambi mmufwànyine kupanga kumòna aci kàdi kumusungila nànsha byà munyi, bwalu yêyê kàvwa nè... Vùlukàayi nè, kale mu matùkù à Wesley, kale mu matùkù à Luther mu dilongolola amu, bantu banènè bàà Nzambi bàvwa Nzambi ùtwa mushinga nè mujaadike nè Yêyê wàkabàtwa mushinga abu, bàakafwila mu diitabuuja (nwamònu anyi?), nè Bukènkè bwònsò bùvwàbo naabù abu.

55 Nènku kùdi mwà kwikala bintu bìndi mèmè ngiitabuuja nànsha nànkù bu mùdi... Kùdikù muntu utèèleja Charles Fuller mu dindà emu pa “Dìbà Dyà Ditàbuluja dyà Cyena-Kale adi anyi?” Yêyê ngumwe wa ku balongeshi bàà Bible bàndi mutàmba kunanga, nànsha mùdiye mununu bikolè, mununu wa menemene, nè... Kàdi ndi ngèèla meeji nè yêyê mmulongeshi munènè wa Bible. Ke yêyê kwamba mu dindà emu (ùvwa ùlongesha pa—pa cipròfètà, ngèèla meeji); wàkamba nè—nè kùvwa bintu binènè kumpàlà eku, bintu bìdi èkèleeziyà kàyi mumanyè kantu nànsha kàmwè pa byòbì bìdi bifwànyine kukàngudiibwa bwà bantu. Mèmè kwamba nè: “Amen!” ku cyòci aci nànkù. Ndi ngiitabuuja nè tucidi ànu nè Bukènkè bunène munkaci mwà kulwa mpindyewu bwàkenkeshilà ànu buloba dìmwè dyà ku matùkù àdi pànshì aa bwà katancì kípì, pàmwàpa ànu mu cipòòlò cyà ngondo pàtupu. Kàdi ndi ngiitabuuja nè kùdi Bukènkè bunène munkaci mwà kulwa.

56 Ndi ngiitabuuja menemene nè muntu kanà yònsò ewu udi mushindàmeena pa diitabuuja dyèndè nè meeji matòòke nè kwendela mu Bukènkè bwònsò bùdiye naabù abu neàsùngidiibwe.

57 Vùlukàayi nè, mu dilwa dyà Mukalenge Yesù, nudi nuvùluka mùshindù wàkasanganàYe aba bàvwa bèndela mu Bukènkè bwònsò bùvwàbo nè cyà kwendelamù abu anyi? Nudi bavùlùke cyàkenzèkà anyi? “Yêyê kì mmuntu mwimpè anyi, nànsha mene Kààmàndà kàà màsàlaayi lukàà kàà beena Loomò aku, yêyê mmwibàke cimenga cyètù—anyi mwibàkile cisàmbà cyètù nsunàngòngà, nènku yêyê ùdi (bintu byònsò bìwàye mwenzè ebi)—yêyê mmukumbànyine dibènesha didìbo bàmulòmbèle edi.” Nwamònu’s, Nzambi n’Taatu udi umvwa; Yêyê mmumanyè mwoyi wèbè, wêwè ní udi mumòne cyà bushùwà Bukènkè ní kwèna umòna Bukènkè to; Yêyê mmumanyè.

58 Mpindyewu, ndi cyà bushùwà ngiitabuuja nè mwoyi wànyì wònsò nè dyandamuna dijaalàme bwà lukonko elu didi nè dibàtiiza dijaalàme didi mu Dìna dyà Yesù Kìlistò, nè aba bàvwa babàtijiibwe bibèngangana kàdi mu mwoyi wàbò,

kaciyi budisù to, bwà kwamba ànu nè: “Èè, ncyèna muswè kujimija díbà nè aci to!” . . . Mpindyewu muntu nàнку awu, aci neciikalè bwalu bwàbò bôbò nè Nzambi. Kàdi bôbò kabàyi bamanyè dishiilangana nànsha dimwè to, ndi ngiitabuuja nè mbasungidiibwe. Ndi—ndi nciitabuuja nè mwoyi wànyi wónsò, bwalu kabàvwa bamanyè dishiilangana nànsha dikesè to.

Tudi bafwànyine kushààla ntàntà mule, ntàntà mule pa cyôci aci, kàdi tudi tuteeta bwà kufika ku yónsò ayi bu twètù nè mùshindù.

152. Bu wêwè mwà kuswà udikù mwà kuumvwija Ebèlù 6.4 kùdi 6, nè kàbidi kumvwijakù Ebèlù 10.26-39 anyi? Bu wêwè mwà kuswà umvwijaku ní cidi citàngila cisàmbà cyà Nyumà Mwimpè anyi cisàmbà cijidila eci; bu wêwè mwà kuswà umvwijaku dishiilangana.

⁵⁹ Èè, twànjàayi kumòna mwaba wùdi muntu awu ùleedila awu, Ebèlù 6 nè 4. Mémè ntu munangè nkonko yà mu Bible yà nè bidi ànu—bidi bipàtula cintu kampànda munda mwèbè mu mùshindù wà upeta—udi upeta cintu kampànda cyùvwa kùyì mufwànyine kupeta to mu mùshindù mukwàbò to. Bwalu udi—udi nè cidi bantu bakwàbò bèèla meeji, cidi pa mwoyi wàbò aci (nwamònu anyi?), kàdi’s udi mumanyè cidibo bènza.

Mpindyewu, ke Ebèlù 10 awu, nè Ebèlù 6 nè 4 nyèyè ewu. Èyo.

Bwalu kabyèna mwà kwenzekakù to bwà aba bàkaavwà bamana kukenkeshila musangu kampànda, nè balabùle dipà dyà ku dyulu, nè barwijiibwe baabanyanganyi bàà Nyumà Mwimpè,

Nè balabùle dyà kùdi . . . diyi dyà Nzambi, nè bukolè bwà buloba bùcilwalwà,

Bôbò badishinde, bwà kudyàlujululabò bôbò biinè cyàkàbidi ku kanyinganyinga; pa kumòna nè bàdi bàpoopela cyàkàbidi bwàbò bôbò Mwànà wa Nzambi pa nkùrusè, nè bàmufwisha bundù bwà patòòke.

Mpindyewu awu mmwaba ùmwè. Mpindyewu, Ebèlù 10.26. Èyo, Ebèlù 10 kùdi 26.

Bwalu twètù twenza mpèkaatù nè budiswilè bwónsò paanyimà pàà . . . twètù . . . bamanè kupeta dimanya dyà bulelèlè, kakwèna kùshààla kàbidi mulàmbù bwà mpèkaatù to,

Kàdi ànu dindila didi dikwàcisha bwôwà dyà cilumbulwidi . . . ciji cyà cilàkuka kapyà, cyàbùtulà mulwishì.

Ewu uvwa upeetula mikenji yà Mòsà ùvwa ùfwa kakuyi luse to ku bujaadiki bwà bantèmù bàbidi anyi bàsàtu:

...ambaayi tũng nè ndinyooka ditàmbe bukolè dyà mùshindù kaayi, munùdi nucinika, dikalaye mukumbànyine—nànsha mukumbànyine, udi mudyatakàje—ku makàsà Mwànà wa Nzambì, nè mubalè mashi a cipungidi, kùdiye mujidiibwe aku, bu cintu cyà pàtupù, nè... mupeetùle byenzenedi byà ngàsà?

⁶⁰ Bùbidi bwàbi bìdi ànu bu cintu cìmwècìmwè aci. Mpindyewu, ndi muswè kuumvwija cyòci eci kùdi—kùdi muntu awu. Mpindyewu, bu nwènù mwà kumòna mu Ebèlù 6 kùdi 4 emu, mbambè nè: “Kabyèna mwà kwenzekakù to bwà aba bàkaavwà bamana kukenkeshila...” Aci—aci’s nciswikakaja nè Mufundu mukwàbò wùdi wùfuma ku dibadiibwa ewu. Pawikalà mukenkeshila nè pashiishe uumuka ku dickenkeshiibwa dyèbè adi, kabyèna mwà kwenzekakù to bwà muntu awu kupetululayè cyàkàbidi kaaba kèndè. Nwamònu anyi?

⁶¹ Mpindyewu, Ebèlù ùdi wàmba ànu dinyooka didi dilonà dibèngà edi. Ke cìmwè cyà ku bintu byà bitàmba kwikala bìkwàcisha bwòwà pa buloba nkubènga Kilistò, nkubènga Bukènkè bwà Mifundu.

⁶² Mpindyewu, nudi numòna nè: “Bwalu kabyèna mwà kwenzekakù to bwà aba bàkaavwà musangu kampàndà bamana kukenkeshila nè bavwijiiibwe baabanyanganyi bàà Nyumà Mwimpè, bóbò babènge bwà kudyàlujululabò cyàkàbidi ku kanyinganyinga...” Nwamònu anyi? S’ki twètù aba. “Bwalu kabyèna mwà kwenzekakù to bwà aba bàkaavwà bamana kukenkeshila musangu kampàndà, nè balabùle (tàngilàayi), *balabùle* dipà dyà ku dyulu...” Bàkavwa ànu ku mwelelu wàdi aku nè: “balabùle mapà à ku dyulu...”

⁶³ Mpindyewu, nudi numòna nè kacya kabàvwakù bânji kufika ku dibàtiiza dyà Nyumà Mwimpè to. Nwamònu anyi? Bàvwa bakenkeshila bwà bwalu abu: “Nè balabùle dipà dyà ku dyulu (Nwamònu anyi?), kàdi bààkavwijiiibwa baabanyanganyi bàà Nyumà Mwimpè (Ku diMulabula), nè balabùle Dìyì dimpè dyà Nzambì, (Citùpà cyàDì; Nwamònu anyi?) nè makolè à buloba bùcilwalwà, bóbò badishinde, bwà kudyàlujululabò bóbò biinè...”

⁶⁴ Mpindyewu, Ebèlù 10 ewu ùdi ànu ùfila dinyooka bwà bwalu abu. “Ewu uvwa udyombola mukenji wa Mòsà ùvwa ùfwa kakùyì luse ku bujaadiki bwà bantèmù bàbidi anyi bàsàtù. Ndinyooka ditàmbe bukolè dyà mùshindù kaayi, nànsha nànkù didi dikumbànyine, ewu udi mudyatakàje Mashi à Yesù Kilistò nè muàbalè bu cintu cikooyike cìvwàbò bajidiibwekù?”

⁶⁵ Mpindyewu, bwà kutèeka bìbidi ebi pàmwè bwà kwandamuna lukonko bwènù nwènù, twàngatàayi Mufundu kampàndà nè muntu mu Bible udi mwenzè cyòci eci, nènku dîbà adi tudi mwà kujandula.

⁶⁶ Mpindyewu, èkèleeziyà mujimà leelù ewu mmubidi wà bwalu bwà cimfwànyì aci. Aci's tudi bamanyè. Kùdi cimfwànyì nè mubidi wà bwalu. Mpindyewu, pàvwà Izàlèlèlà mu lwendu lwèndè ùfùmina ku buloba bwà Pàlèstinà, anyì, ùumukila ku Èjiipitù mutàngile ku Pàlèstinà, cìvwa cimfwànyì cyà èkèleeziyà mu nyumà leelù ewu mu lwendu lwèndè too nè ku buloba bulaya. . . Nwènù bônso nudi biitàbe aci's, kî mmwômò anyì? Beena tèlòlòjì bônso mbiitàbe cyôci aci, nè cyôci aci cìvwa cimfwànyì.

⁶⁷ Bààkashiya Èjiipitù. Èjiipitù ùvwa maalu à pa buloba. Bààkapàtuka, bààkapicila mu màyi à ditàpulula ku Mbù Mukünze ku dibàtiiza, kupàtukabò kuya luseke lukwàbò bènda bàsànkà nè bàtùmbisha Nzambì, kuya ku—kupetabò mikenji, nè kuumukila aku kuya ku buloba bulaya.

⁶⁸ Èè, nuvwakù bamòne ànu kumpàlà kwà kufikabò ku buloba bulaya (nwamònu anyì?), kumpàlà kwà kubwelabò mu buloba bulaya, cìvwa mwà kwikala ànu cyenzeke mu matùkù makesè cyanààná, matùkù dikùmi anyì dikùmi nè dimwè, pàmwàpa kàyi búngì abu to, bwalu cìvwa ànu ntàntà wa kilòmèètà makùmi àsambòmbò nè yìnaayi nè byà mu njila. Bàvwa bafwànyine kwikala bakabwèle mu buloba bulaya, bàvwa mwà kupicila mu—mu cidimu—mu citùpà cyònsò—cyònsò cyà lwendu lutùdi bendèlemù alu. Ke kulwabò kuntwaku, kusabuka Mbù Mukünze. Cilwila cyà Pàlò cyàkiiniibwa mu màyi paanyimà pààbò. Bàvwa basùlùdiibwe kùdi beena lukunà bààbò, babangile mu cipèlèlà, nè kufikabò ku mwelelu wà buloba bulaya ku Kaadèsà-Baanèà, kàdi's ke kòkò aku kwàkapangilàbo. Bwà cinyì? Bààkapangila bwà cinyì?

Mpindyewu, Mòsà wàkambila bisàmbà dikùmi abi, wàkamba nè: “Yèyè neàtumè muntu mu cisàmbà cyònsò bwà kuleeja mpàla wa cisàmbà cyònsò, bwà kuya katentekela buloba abu bwà kumòna nè bùvwa mu ngiikàdìlù wa mùshindù kaayi.”

⁶⁹ Mpindyewu, aci cyôci kaciyi ànu menemene cipètangana nè—kaaba kèèbè mu dindà emu, kùdi ulwila leelù ewu aku's. Wèwè. . . Èkèleeziyà mmupicile mu dibingishiibwa ku Luther, mu dijidiibwa ku ba-Méthodistes, nè mpindyewu mubande too nè ku cikondo cyà mulayi. Mulayi ndibàtiiza dyà Nyumà, didi dilaya mu Dipungila Dikùlukulu dijimà nè Dipyadipyà kàbidi (nwamònu anyì?), mulayi wà nè: “Mònaayi, Ndi ntùma mulayi wà Taatù Wanyì pambidi pèènù. . .” Peetèlò ngwákamba nànkù mu ditùkù dyà Mpenta.

⁷⁰ Ke Mulayi ngwôwò awu. Buloba bulaya nkwikala nè mwoyi mu buloba bwà Nyumà Mwîmpè ebu. Ke mulayi wà Nzambì bwà èkèleeziyà ngwôwò awu, ngwà kwikala nè mwoyi mu bukolè bwà Nyumà. Mbuloba bukwàbò; ncitùpà cyà buloba bukwàbò'. Bikèngela ùpatukè mu ngiikàdìlù yùdi usanganyiibwamù ayi,

bwà kupàtuka bwà kusòmbela mu buloba bulaya ebu, bwà kwakidila mulayi. Nudi bavùlùke mulayi wà nè: “Nennùpete bukòlè bwà mu dyulu, paanyimà pàà eci, Nyumà Mwímpè ùlwa pambidi pèènù. . .” anyi?

⁷¹ Ke Peetèlò kwambayè nè mulayi wàkenjiibwa mu Dipungila dijimà, Dikùlukulu nè Dipyadipyà. . . Udi—udi usangana mulayi ùya too, too nè ku ditùkù dyà Mpenta adi, nè pashìishe kubwelabò mu mulayi.

⁷² Mpindyewu, bantu abu bàkaavwa bapàtùke nè bamòne bimanyinu binène nè maalu à kukèma mu Izàlèèlà. Ke pashìishe kutùmayè bantu kampàndà bwà kutentekelabò, umwe mu cífuku cyònsò. Kàdi bàmwè bàà kùdibo kwalukila ku. . . Èè, bàmwè bàà kùdibo kabàvwa baswè kuyakù to. Bàbìdì bààkayakù. Pààkaalukilàbo, bàvwa nè cisùmbù cyà tumuma twà mvinyò cyàkakèngela bwà bantu bàbìdì kwàmbulabò. Mpindyewu, kabàvwakù balabùle tumuma twà mvinyò to. Bàvwa mu—bàvwa mu cipèèlà; nènku ki bwà cinyi, mu mwaba awu kamùvwa mwaba wà bimuma nè bikwàbò to. Bàvwa badyè manà, dyàmpà dyà difùmina mu Dyulu, nè nyuunyi yà tùlumbù, nè nyama yà cisuku, nè bìvwàbo bàdya abi.

⁷³ Kàdi mpindyewu bàvwa bàya bàkabwela mu mu buloba abu, nènku bàvwa nè cisùmbù cyà tumuma twà mvinyò cívwa cinène menemene mu mùshindù wà nè byàkakèngela bantu bàbìdì bwà kwambulabò tumuma twà mvinyò etu. Nènku bàbìdì aba bààkabwela mu buloba abu nè kwalukilabò nè kupèèshabo yònsò wa bakwàbò bàà kùdibo ku mwelelu aku bwà kulabulabò tumuma twà mvinyò atu. Cyàkenzàbo ncinyi?

Pààkaalukilàbo, pamutù pàà kucyònkòmokabò bwalu bàvwa balabùle tumuma twà mvinyò atu, pamutù pàà aci, bààkaalukila kùdì bisàmbà byàbò kwamba nè: “Kaa, kàdi tudi bamòne bimenga byela bimanu binène byà beena Pelèshèètè abi, anyi beena Hitì, nè beena Pelèsità nè—nè—nè bantu beena *iti* bashìllàngàne bònsò kuntwaku.” “Mòna’s,” mwàkambàbo, “mbantu bàà mfyondo. Mòna’s, twètù’s tudi tumwèka ànu bu tutasu ku luseke lwàbò aku. Katwèna mwà kwangata buloba abu to. Mbwa cinyi bwinè bùdì mutùpàtwile mwab’ewu?” Nwamònu anyi? Nè Bible mmwàmbè nè bònsò bààkabùtukila mu cipèèlà, yònsò wa kùdibo; bààkafwà. Bààkenza cinyi? Bàvwa beena kwitabuuja bàà ku mikàlu. Bààkafika ku cintu cilelèlà, nè kumònabò mulayi, kàdi kudyùmvwabò nè kabàvwa bakùmbàne mwà kuya kangata mulayi to.

⁷⁴ Mpindyewu, ke cyòci aci menemene cìdì cilwè leelù ewu ku dibingishiiibwa nè dijidiibwa. Nwamònu anyi? “Mudyatàkàje ku makàsà Mashi à Yesù Kilistò àdiye mujidiibwe ku ôwò awu,” mbantu bajidiibwe bàdì bàfike too nè ku dimòna dibàtiiza dyà Nyumà Mwímpè, kàdi bàkoma nyimà bàmba nè: “Ndikolesha dyà maalu; katwèna mwà kucyàngata to. Nèbàtwipàte mu

bipidi byètù; netwìpaciibwè pa myaba yètù. Netwìpaciibwè mu èkèleeziyà yètù. Katwèna mwà kwenza aci to (nwamònu anyi?), bwalu cidi cìbèngangana nè dilongesha dyà èkèleeziyà wetù.” Nwamònu anyi? Mmùbalè Mashi à Yesù Kilistò àdì mamutwàle mu ntàntà yònsò ewu, buludi too nè ku ditwìbwà dyà citampì cyà mulayi, kàdi pashìishe kuumukakù. Yèyè kwamba nè kabyèna ànu mwà kwenzekakù to bwà bôbò kusùngidiibwa. Nwamònu’s, nwamònu anyi? Kí ng’ewu udi mwendèle mu buloba bulaya awu to. . .

75 Vùlukààyi nè, Yoshùwà nè Kaalèbà bàvwa ànu bàbìdì cyaààna bàà mu musùmbà mujimà amu wà bantu miliyò yibìdì nè citùpà bààkabwelà mu buloba bulaya, bwalu bôbò bàakaya mu buloba bulaya amu, nè kupetabò dibènesha, nè kwalukilabò. Ke kwambabò nè: “Tudi nè bukolè bwà kubwàngata, bwalu Nzambi ngudi mwambè nànkù.”

76 Nènku kushààlabò ànu mwaba awu. Bwà cinyi? Mpindyewu, bantu bònsò abu bàvwa munkaci mwà kutàngila maalù àvwà ènzekà, kàdi Yoshùwà nè Kaalèbà bàvwa bôbò batàngile ku cìvwà Nzambi mwambè nè: “Mémè ngudi munùpèeshe buloba abu; ndààyi nùbwàngatè.”

77 Nènku aci leelù ewu, ke cidi bantu bàmba nè: “Kaa, bu mémè mubàtìjiibwe mu Dìnà dyà Yesù Kilistò, bu mémè mwà kupeta Nyumà Mwìmpè, bu—bu mémè mwà kwakula mu myakulu anyi kwamba cipròfetà, anyi bu mémè mwà kufila bujaadiki anyi kwela mbilà mu èkèleeziyà wanyì, mbafwànyine kungeela pambèlu.” Tùngunukà ndàaku ànu kumpalà’s wè!

78 Wèwè udi wamba nè: “Èè, nènkwambilè mpindyewu mene nè, mémè ndi nè nsòmbelu wa bwena Kilistò; ndi nè nsòmbelu mwìmpè, mukezuke, mujidila. . .” Aci ncilelèlè, kàdi’s wàlu ku diteetangana dyà makàndà, mulwe mwaba awu, mufikè ku mukàlu. Kàdi wèwè mucìkomè nyimà, dibà adi “kabyèna mwà kwenzekakù to bwà aba bàkaavwà bamana kukenkeshila musangu kampànda. . .” Nwamònu anyi?

79 Mu ngaakwilù mukwàbò, muntu yèyè ùdi ùpìcila mu dibingishiibwa, ùdi ùya, wamba nè “Ndi ngìtabuuja nè ndi muswè kuyiisha Dìyi.” Yèyè ùdi ùsùngidiibwa; wamba nè: “Mpèkaatù wàncyòkeshi.” Eyo. Pashìishe ùdi ùpàtuka, nè cyàkumpalà mucìikàle ùnwa mfwankà, pàmwàpa wàlakana anyi cintu kampànda. Paanyimà pàà katanci ùdi wamba nè: “Nzambi, eci kí ncikùmbànyine mwena Kilistò to, nangananga mwambi, bwà kutàngidila bakàjì mu mùshindù mubì, bwà kunwà mfwankà!” anyi; “Ndi nnwakù maalà à byèrè à mu nsòmbelu nè bakwètù, kàdi—kàdi nànsha nè disangisha dyànyì mene, kàdi kabyèna bìmwèka bìmpè to. Njidilèku, Mukalenge.” Nènku dibà adi Mukalenge ùdi ùmujidila, ùmusha lukukà lwònsò alu mu yèyè, nè bikwàbò byònsò. Dibà adi yèyè ndibùngù dijidila. Dibà adi cidi Nzambi ùmuleeja ndibàtiiza dyà Nyumà

Mwîmpè. Bwà kwenza nànkù, bikèngela àpàtùkè mu musùmbà ùdiye naawù awu. Ke mwaba ùdiye ùleeja diikala dyèndè awu; pashìishe ùdi ùpingana cyànyimà. Cidìye wènza ncinyi pàdiye ùpingana cyànyimà? Ùdi ùdyata Mashi à Yesù Kilistò àdi mamujidile awu ku makàsà, bu nè civwa cintu cyà kaciyi cyà cijila, kaciyi cikùmbàne bwà kumusabwisha dyàmwàmwa to. Dìbà adi kabyenà mwà kwenzekaku to bwà yèyè kwikala musùngidìibwe. Dìbà adi civwa ncinyi? Kàdi ùyaaya mutàngile ku mudilu mukolè nè dinyooka.

Ndi ntèkemena nè aci ncitòòke. Kabiyi nànkù to, mòna's, ùmmanyishè mu cikwàbò cikondo. Ndi naayi búngi cyanààna kaaba aka, ndi . . .

153. Mwanèètù Branham, Yesù ùvwa ùswa kwamba cinyi mu Yone Munsantu 21.15 too nè ku 17 pààkakonkàYe Peetèlò ní ùvwa muMunangè nè kumwambila bwà kudiisha bàna Bendè bàà mikòòkò, pashìishe kwambaYè nè: “Diisha mikòòkò Yànyi,” nè mu mvensà wa 17 kwambaYè kàbidi nè: “Diisha mikòòkò Yànyi.”?

⁸⁰ Èè, aci's nciswè kwamba ànu nùnkù: Nwamònu's, Kilistò ke Mulami wa mikòòkò, Ùkaavwa ùumuka ùya, nè Ùvwa ùshiya mudimu wà Mikòòkò Yèndè, yidi mulami yònsò wà mikòòkò ùdiisha, cidi ciikàle Cisùmbù Cyèndè cyà mikòòkò, Èkéleeziyà Wendè, nwamònu's, Ùvwa ùlombola, anyi, ùshiya mudimu awu kùdi bayiidi aba bwà kutùngunuka nè kudiisha cisùmbù cyà mikòòkò, ku, bwà kwikala mulami wa mikòòkò: Kudiisha mikòòkò.

⁸¹ Mu ngaakwìlù mukwàbò bu mwab'ewu, bu—bu nwènù mwà kutàngila mwab'ewu. . . Mwab'ewu mu dindà emu, ke cindi munkaci mwà kwenza aci. Mpindyewu, mikòòkò neyikolè ànu paùdi uyipèesha cyàkudyà cyà mikòòkò. Mpindyewu, wèwè mwà kukàlanga dyàmpà dyela minyiinyi kàdi kudipèesha mùkòòkò, kàwèna mwà kukola nè cyòci aci to, bwalu, nwamònu's, kàwèna—kí ncyàkudyà cyà mikòòkò to. Nwamònu anyi? Nènku—nènku bu mèmè mwà kukàlanga anyi kwikala—kwikala nè munyiinyi mulenga wà T-bone mulongolola, kàdi kuwùpèesha mùkòòkò, kí—kí ncyàkudyà cyà mikòòkò nànsha. Kawùvwa ànu mwà kucidyà to, kwàjikì, bwalu mmùkòòkò. Kàdi mùkòòkò ùtu muswè cyàkudyà cyà mikòòkò. Èè dìbà adi, pàdìbi bikèngela bwà wèwè kudiisha Cisùmbù cyà mikòòkò cyà Nzambì, kùyidiishi nè tèòlòjì kampàndà mukwàtakaja kùdi bantu to; yidiishà Dìyi; ke kùdi mikòòkò yidiyundila aku. Yidiishe Dìyi!

⁸² Ikàlà mulami wa mikòòkò, mulami mulelèlè wa mikòòkò. “Diisha mikòòkò Yànyi.” Bàna bàà mikòòkò ke bàna bakesè abu, mu bushùwà bwà bwalu, nè mikòòkò ke mikùlumpè. Pa nànkù bùbidi bwàyi myàna nè mikolè, diisha mikòòkò yà Nzambì! Nwamònu anyi? Nènku yidiishè nè Dìyi! Dìyi (nudi numòna anyi?) m'Bulelèlè's! Yesù wàkamba nè: “Muntu kààkwikala nè

mwoyi ànu ku dyàmpà nkààyadi to, kàdi ku díyì dyònsò didi dipàtukà mukana mwà Nzambi.” Ncyà bushùwà anyi? Nànkú díbà adi, byôbì bikèngela bwà muntu kwikalayè nè mwoyi nè bôbò biikàle cisumbù cyà mìkòòkò cyà Nzambi, eci—èkèleeziyà ewu, díbà adi bàdi nè cyà kudyundila ku Díyì nè Manà à Nzambi. Eci ke Manà Èndè!

⁸³ Mu—mu Bible, tudi bafùme ku dicikenketa mwaba awu mu—mu—mu Bikondo byà Èkèleeziyà. Yesù ke Manà masokoka; Kilistò ke Manà à èkèleeziyà. Manà ncinyi? Manà mu Dipungila Dikùlukulu àvwa ng’wówò àkafùmà mu Dyulu nè citealeela dilòòlò dyònsò bwà kukwàcisha èkèleeziyà mu lwendu lwèndè. Ncyà bushùwà anyi? Mpindyewu, mu Dipungila Dipyadìpyà Manà masokoka ncinyi? “Mu katanci kakesè emu bàà pa buloba kabààkuMmòna kàbìdi to (musokòme); kàdi nwènù nenùMmònè, bwalu Nèngìikalè neenù, munda mwènù mene too nè ku ndekeelu kwà buloba.” Nènku Kilistò ke Manà masokoka àdi àfùmina kùdi Nzambi mu Dyulu nè citeleela ditùkù dyònsò awu—ditùkù dyònsò.

⁸⁴ Katwèna mwà kwamba nè: “Èè, kùkaadi mbingu yìbìdi mvwa mupetè dilabula dinène dyà Nzambi.” Kàdi bishi bwà mpindyewu ewu? Nwamònu anyi? Ditùkù dyònsò, dipyadìpyà, dibènesha dipyadìpyà, cintu kampàndà cipyacìpyà cìdi cìfùmina kùdi Nzambi, Manà masokoka àpweka àfùmina kùdi Nzambi mu Dyulu, Kilistò. Nènku tudi tucyònkòmokela pa Manà àdi Kilistò aa, nè Ùdi ùtùtwa mpàndà mu bule bwà lwendu lujimà too nè mutùdi tukafika mu—buloba bùdi luseke lukwàbù lwàlwa.

⁸⁵ Mpindyewu, ke cìvwàYe ùswa kwamba ku: “Dìisha mìkòòkò Yànyì.” Tudi mwà kwakula pa cyòcì aci, bafwànyìne mene kubènga kufika ku mìkwàbò nkonko yìdi mishààle, bwalu alu ndwà lwìmpè bwànyì mèmè. Mèmè ntu munangè aci, pàndi ngààkula bwà Kilistò mwikàle Manà nè Cyàkudyà cyà mìkòòkò.

⁸⁶ Bàdiishaayi Kilistò ku Díyì Dyèndè. Nwamònu anyi? Angàtà Díyì dyà Kilistò ànu menemene mùshindù wùdidi difùndìibwe kaaba aka nè dìfilè kùdi mìkòòkò. Cìdi muntu mukwàbò kanà yònsò ewu wàmba nànsha ciikàle cinyi: “Kaa, bàdi dìjinga nè dyàmpà dyela minyìinyi’s!” Kùciitàbùùjiku to. Ke cìdi cìbàkèngelà ncyòcì eci, apa mene! Eci’s ke Cyòcì. Nwamònu anyi? Bàpèèshaayi Eci! Eci ke Cyàkudyà cyà mìkòòkò. Ke cìdi cìbàfikisha ku dikola. Nyumà Mwìmpè, eci n’Díyì Dyèndè, mudimu Wèndè mutùtùma naawù. Díyì n’Dimiinu. Dimiinu didi ditwàla cikùnyìibwà; cikùnyìibwà citùdi tudyà aci. Mpindyewu, eci ke cìdi cìpàtulà cikùnyìibwà cìdi Nyumà Mwìmpè ùtancìlapù, ng’Èkèleeziyà. Ùdi ùdiila... Ùdi—Ùdi—Ùdi ùdiila pa Èkèleeziyà, Nyumà Mwìmpè ùdi wènta nànkú, ùcyònkòmokela mu bwikadi bwà Nzambi, bwalu bantu bàdi bìitabuuja Díyì Dyèndè nè bàMulekela ùkwàcila mudimu munda mwàbò, ùbàpèèsha bintu mene bivwà Nzambi mubàlayè nè nebènzè abi. Nè Nzambi ùdi ùmòna Èkèleeziyà Wèndè wènda

ùkola, ki bwà cinyi mikòòkò yidi yidiishiibwa, nè Nyumà Mwimpè ùdi munkaci mwà kutùmbishiibwa. Nwamònu anyi? Ki cyòci aci. “Dìisha mikòòkò Yànyì!” Èyo.

Mpindyewu, aci cyòci kaciyi cyònsò to, mòna’s, nummanyishèku pashiishe ndambù.

154. Mwanèètù Branham, pâmvwà mupicile mu mulongo wà babèèdi kùkaadi katanci apa, byanza bilaaba bìvwa bintentekela nè disambila òvwa dyenjùbwe bwà bàyaanyi udi kàyì musùngidiibwe awu. Mvwa mutuucùbwe kùdi bukolè bwà Mukalenge! Eci ncimanyinu cishindàme cyà nè yèyè neàsungidiibwè anyi?

⁸⁷ Èè, kùdi...Ewu ùdi nè cyà kwikala muntu mukàji. Mwanèètù wa bakàji, ncyèna mufwànyine—ncyèna mufwànyine kwela meeji nè cívwa ncimanyinu cilelèlè cyà nè yèyè ùvwa nè cyà kusùngidiibwa to, nànsha mùndi mèmè ngiitabuuja nè—nè Nzambì, cidi...Ndi ngiitabuuja nè yèyè neàsungidiibwè, cyà bushùwà, kàdi bwà kwamba nè... “Mpindyewu, udi ku mwà kwamba nè aci cidi EMU MMÙDÌ MUKALENGE WÀMBA anyi?” Watàpa ntààlè wadimuka bwà bwalu abu (nwamònu anyi?), bwalu, nwamònu’s, ncifwànyine kwikala Nyumà Mwimpè munkaci mwà kukubènesha, bwalu wangàci kaaba kàà Kilistò. Nwamònu anyi?

⁸⁸ Udi ulwa mwab’ewu bwà kwimanyina mulùme webè wa mpèkaatù ànu bu mwàkayà Kilistò ku nkùrusè bwà kwangata kaaba kàà èkèleeziyà wa mpèkaatù. Nudi numòna anyi? Cívwa ncintu cinène cyùvwà mwènzè. Kàdi cìndi mufwànyine kwenza...Pawìkalà kaaba aka mu dindà emu, pawìkalà wèwè udi mufùnde lukonko elu awu, cìndi mufwànyine kwenza, ndi mufwànyine kwitabuuja nè mwoyi wànyì wònsò nè Nzambì neàcyènzè (wamònu anyi?)—nè Nzambì neàcyènzè, bwalu nànsha Yèyè mukupèeshe dibènesha anyi nànsha Yèyè kàyì mukupèeshe to, aci cívwa cintu kampàndà cyà nsàkidilù cidi Nzambì mukupèeshe. Kàdi ndi ngèlè meeji nè ncifwànyine—ncifwànyine kukufikisha ku didyùmvwakù bìmpè, bwalu Yèyè mmukubèneshe.

⁸⁹ Bidi ànu bu wèwè mwà kwakula mu myakulu, nè kakùyì mwandamunyi mu èkèleeziyà to, mòna’s, kabyèna bìkèngela bwà wèwè kwakula mu èkèleeziyà pàdiku kakùyì muntu bwà kwandamuna myakulu to. Kàdi wèwè wakula mu myakulu, nè kakùyì mwandamunyi...Mòna’s, kwàta mudimu nè...wèwè...Mwaba wònsò wùdi usanganyibwa mu disambila awu, kwèbè kumbèlu anyi mwaba wònsò wùdi awu, akùlè díbà adi, bwalu “Ewu udi wakula mu myakulu myenyi ùdi ùdikolesha yèyè mwinè.” Cidi cimupà busàmbi. Nwamònu anyi? Ùdi ùdyùmvwa bìmpè, bwalu mmwimàne mwaba awu munkaci mwà kusambila kàdi katanci aka anyi, Nyumà Mwimpè ùmutùlulukila yèyè mulùme anyi mukàji awu nè

kubangayè kwakula mu myakulu. Nè musùùkà wèndè wùvwa wùcyònkomoka nè disànta, bwalu bàvwa—ùvwa wàkula mu myakulu. Nwamònu anyì?

⁹⁰ Mòna's, aci cìvwa—aci cìvwa—kacìvwa ànu cimanyinu cyà nè Nzambì ùvwa mwà kwandamuna ku disambila dyùvwà usambidila adi to, kàdi cìvwa ncimanyinu cyà nè Nyumà Mwìmpè ùdi munkaci mwà kukutèeleja. Cìdi—cìdi... Yèyè mmukumanyè; Ùdi neebè. Ncintu cimwècimwè aci cìndi mufwànyine kwangata bwà cyôci eci. Nyumà Mwìmpè ùkupèesha di—dibènesha.

⁹¹ Mwab'ewu kùkaadi cikondo kampàndà. Musangu wà ndekeelu wùmvwà mwakùle mu myakulu, ùndi mwà kuvùluka, cìvwa... Mvwa... Kùkaadi bidimu bu bìsàtù anyì binaayi nàntu awu. Mvwa mu Illinois, ke Billy kulwaye kundonda bwà—bwà kuya ku—ku mulongo wà babèèdi ku Zion City. Kàdi's mvwa nè bujitu pa mwoyi wànyì, ke mèmè kutwà binù panshì nè kubanga kusambila. Nèntu pàmvwà munkaci mwà kusambila apu, mèmè—mèmè kuumvwa Billy ùbànda ùkookola ku ciibi. Ke mèmè nè: "Billy ncyèna—ncyèna mwà kuya mpindyewu to." Ke kuyayè kwàka nè kusòmbayè panshì.

⁹² Nèntu mvwa munkaci mwà kusambila, mwoyi wanyì ùvwa nè bujitu bwàbùngì menemene; ncìvwa—ncìvwa mwà kuya mu èkèleeziyà mùshindù awu to. Nèntu nwamònu's, pa ciibidilu Yèyè ùtu misangu mikwàbò ùmpèesha cikèèna—kumòna ùndeeja cintu kampàndà ciikalà mwà kwenzeka, kàdi Yèyè kàakacyèna musangu awu to. Nèntu mvwa ànu munkaci mwà kusambila mu cibambalu amu, ke mèmè kuumvwa muntu kampàndà wàkula. Mèmè kulekela kusambila. Mèmè kutèeleja, kàdi kùvwa muntu kampàndà ku ciibi aku, ùvwa... Kuumvwikabi bu mwakulu wa ku baabèndè, bu cyena-Allemagne anyì cyena—Nederlande cyà Panshì, anyì cintu kampàndà; cìvwa cìya lùbilulùbilu, nè kalubilubi. Mèmè kutèeleja kàbìdi, ke mèmè kudyàmbidila nè: "Èè, muntu kampàndà mmulwè kuntu kwàka wàkula nè muntu kampàndà wa ku cìlààla-beenyi mu cyena Allemagne; pàmwàpa neàmwandàmùnè."

⁹³ Ke mèmè kulekela ànu kusambila, mweyèmène ku nkwasà mùshindù ewu, munkaci mwà kutèeleja, kàdi yèyè kutùngunuka ànu nè kwakula. Mèmè kudyàmbidila nè: "Èè, ndi ndìkonka bwà cinyi kàkwèna muntu kampàndà wàdamuna." Ke mèmè kutèeleja; mèmè kudyàmbidila nè: "Èè mpindyewu, aci kì ncyà pabwàci anyì."

⁹⁴ Kùvwa bipimu byà bujitu kumpengà kwà njila, ki mèmè kuumvwa muntu awu lwà kwìnshì aku munkaci mwà kwela mbilà, "Ndààyi!" nudi bamanyè's, nè: "Ndààyi kumpàlà!" Mèmè è kukùdimuka, mèmè kutàngila pambèlu lwàlwa luseke, ki mèmè kwenza, mèmè kudilenga ku mishiku. Mèmè kufika ku dijandula nè, mèmè nguvwa wakula awu. Ùvwa mmèmè. Ke

mémè kushààla ànu mupùwe, ncìyì mumanyè kantu nànsha kàmwè to. Ncìvwakù nè bukòntononyi bwà cìmvwà ngàmba aci to, ncìvwa mumanyè cintu nànsha cìmwè cìmvwà ngàmba to, cintu nànsha cìmwè. Mvwa ànu. . . Mukana mwànyì munkaci mwà kunyunga, mvwa ngàakula mu mwakulu wà mùshindù kampàndà. Mémè kushààla mupùwe ví. Paanyimà pàà katanci kulekelaci. Nè pààkalekelàci, kaa èkèlekèlè, mémè kudyùmvwa ànu bu mufwànyine kwela mbilà mikolè, mvwa ànu—ànu nè disànkà dyàbùngi be. Ncyèna mumanyè nè mbwà cinyi to, kàdi bujitu bwònsò kunguumukabù.

⁹⁵ Pa nàнку mémè kuya ku èkèleeziyà díbà adi, kubiikila Billy. Nènku pangàakafikà mu èkèleeziyà. . . Mukalenge Baxter díbà adi ke uvwa mulongolodi wa ndongamu yà disangisha adi. Nè yèyè ùvwa—munkaci mwà kwimba misambu, mwindile. Mvwa mufikè pashiishe nè tusunsa makùmi àsàtù. Ke mémè kumwambila nè mvwa ànu mufikè pashiishe.

Yèyè—yèyè kumòna nè mvwa mudilè mwadi, ke kwambayè nè: “Mbwalu kaayi abu?”

⁹⁶ Ki mémè nè: “Kakwèna bwalu to.” Ke mémè kutùngùnuka kàdi ànu bu tusunsa dikùmi pashiishe, mukàjì kampàndà kulwilayè lwà kumfundu kwà cibambalu cinène aci, nè ùvwa wàmba kusòmbela lwà paanyimà apu. Kàdi patwàkalondeshà bwà mukàjì awu, bwà kujandula, ùvwa mu njila ùfùmina ku Twin Cities (St. Paul nè ku Minneapolis, mu mwaba kampàndà, cìmwè cyà ku bimenga abi), kùdì. . . Ùvwa ùsaama bikolè be disaama dyà cyàdì ku—too nè mùvwà màshinyi à cyambula babèèdì kaànyì mwà kudìdinga bwà kumutwàla to, bisùlùsùlù byèndè bìvwa mu ngiikàdìlù wa, ànu bitekètàngane bikolè. Ke bàmwè bàna bèètù bàà balùme kwangatabò kàshinyi kàà Chevrolet kàà kale, nè kupàtulabò nkwasà wa paanyimà awu, nè kumulongolwelabò kalààlù kàà dibùnya mwaba awu mu mùshindù kampàndà, anyì bulààlu, nè bóbò kumulààdikapù, nè bàvwa bènda bàlwa nendè mu masangisha. Yèyè ùvwa muswè bwà kulwa.

⁹⁷ Bangàngàbukà bàvwa bamulekèlè. Nènku mu njila amu kuntwaku. . . Bóbò kumwambila nè munyukunyuku mukesè cyanààna, ùvwa mwà kubanga kupùmuna mashi, nè ke cìvwà ndekeelu. Ke kuditwayè mu dipùmuna mashi. Nè kumupàtulabò mu màshinyi nè kumulààdikabò mu mashinda. Nè bansantu bàvwa biimàne mwaba awu bàsambidila mukàjì awu. Nè yèyè ùvwa ànu. . . Musangu wònsò wùvwàye mwà kweyela, àvwa ànu àzòlòloka; mashi àvwa àmupàtuka mukana, mùshindù awu.

⁹⁸ Ke dyàkàmwè, kwondopiibwayè pa cibànzà! Ke kutùpikayè mwaba awu nè kubangayè kucyònkòmoka, kutùngunukayè nè kulwa ku èkèleeziyà. Kàdi's ke yèyè awu paanyimà apu munkaci mwà kufila bujaadiki, lwà mu ndekeelu mwàmwa.

⁹⁹ Mémè nè: “Aci cívwa ndíbà kaayi?” Nènkú pààkafilàye díbà, dyà cikondo cívwaàci, cívwa mpa díbà mene pàvwà dyakula adi dyènzekela mu mémè. Èè, cívwa ncinyi aci? Cívwa n’Nyumà Mwímpè mwikàle wàkwila mukàjì wàwa! Nudi bumvwè cìndi muswè kwamba aci anyi?

¹⁰⁰ Mpindyewu, Bible ùdi wàmba nànkú. Míngà misangu tutu tujíkula myàkù kayiyi yùmvwika to; katùyì bamanyè citùdi twakula aci to. Kàdi n’Nyumà Mwímpè munda amu mwikàle ùpàtuka, mwikàle wàkwilangana bwà bintu bitùdi katùyì tuumvwa to. Nwamònu anyi?

¹⁰¹ Ke mukàjì awu kwondopiibwayè pa cibànzà. Twakapeta milubù ya kudiye mu ntàntà mule kuumukila piinè apu. Ùdi bímpè menemene, ùdi nè mubidi tumatuma.

¹⁰² Mpindyewu, nudi numòna nè Nzambì mmumanyè mwaba wùdi bintu abi, nè Yèyè ùdi nè mùshindù wà kubyènza. Nwamònu anyi? Yèyè ùdi nè mùshindù Wèndè wà dicyènza. Tudi ànu nè cyà kudilekelela ku cìdiYe wènza. Nènkú díbà adi—díbà adi cintu cikolè cyà dyenza pawàfikà kuntwaku nkudilama wèwè mwinè kule nè mukàlu mukesè bu lusongo lwà keele wùdi pankaci pa dikolesha dyà maalu nè Bulelèlà.

¹⁰³ Mpindyewu, wèwè kùyì mutàngile bímpè to, dyabùlù neàkukupè buludi mu musumbà wà dikolesha dyà maalu nènkú neùjimijè dilabula dyèbè dyònsò nè bikwàbò byònsò. (Nwamònu anyi?), paùdi wenza nànkú. Kàdi bu wèwè ànu mwà kushààla mukwàte ku Bulelèlà bwà bushindàme, tàngilàayi Bible, nè shààlaayi Nèndè, nè shààlaayi bapòle nè badìpwekèshe, Nzambì neàtungunukè ànu nè kwenda kuya neebè mutàngile ku Kàlvaryò, wènda ùpweka nè njila mùshindù awu, bu wèwè ànu mwà kushààla nè cyòci aci.

¹⁰⁴ Nènkú aci ncintu bu cívwa cikwenzèkela aci, Mwanèètù wa bakàjì. Nzambì ùvwa ànu munkaci mwà kukupèèsha dibènesha. Ncifwànyine kwikala bujaadiki busungùlùke bwà nè newikalà nè cyà ku. . . Kàdi ncyèna mufwànyine kweyemena ànu aci to (nudi numòna anyi?), ngàmba nè: “Mukalenge ngudi mungambile!” Bwalu ngàmbi dilabula adi bwalu ndifwànyine kukukànkamikakù bwà kutùngunuka nè kwitabuuja. Cyònsò cívwa ku cyàkenzà Nzambì kuntwaku aci, cyàkatwàla Nyumà pambidi pèèbè mùshindù awu, cívwa mbwà kiipàcìlà kampàndà. Cívwa cifwànyine kwikala cintu kampàndà cikwàbò; kàdi bu nè cívwa mbwà bàyèebè, ncyà bushùwà nè yèyè neàbwelè buludi mu Bukalenge bwà Nzambì. Ndi ngiitabuuja nànkú.

155. Mwanèètù Branham kí mbikùmbànàngàne nè Mifundu bwà bakàjì kabààkudi mu èkèleeziyà anyi?

¹⁰⁵ Ùdi nè nkonko yìbidì kaaba aka. Aci’s ncilelèlà. Aci—aci’s ncilelèlà. Kí mbímpè bwà bakàjì kwikalabò bambi nè—nè kwakulabò mu èkèleeziyà to. Ncyà bushùwà, Kolintò wa Kumpàlà nshapità wa 14.

¹⁰⁶ Mu bushùwà bwà bwalu èkèleeziyà mujimà mwaba ewu, nwênù bônso nudi bamanýè bwalu ebu. Nènku ewu ùdi mwà kwikala mwenyi mwab'ewu mu dindà emu; ncyèna mumanyè to. Kàdi kî mbîmpè bwà—bwà bakàji ku—bwà kwikalabò—bwà kwenza mudimu wà bwambi to. Aci—aci's ncilelèlè.

Nènnùbadilèci ànu mwab'ewu, nènku nudi—nudi mwà kujandula. Nènku díbà adi nenù—nenùmanyè: Kolintò wa Kumpàlà nshapitá wa 14 ngèèla meeji. Nèmmwángàtè ànu mu katanci kakesè emu, bu mêmè mwà kupeta . . . Èyowà, nyèyè ewu.

Bakàji bèènu bàshaalè bapùwe mu maèkèleeziyà: bwalu kî mbabiitàbile bwà kwakulabò to; kàdi mbabàtùmine dìyì bwà kwikalabò mu ditùmikila, mùdi kàbidi mikenji yàmba. (Mpindyewu, mikenji kayìvwa yànishila bakàji bwà kwikalabò baakwidi nè bikwàbò mu matùkù awu to. Nwamònu anyi?)

Nènku byàswàbo kuyiila cintu kanà cyònsò eci, bàkonkè baabàyaabò kumbèlu: bwalu bìdi bundù bwà mukàji kwakulayè mu èkèleeziyà.

¹⁰⁷ Mpindyewu, bu nwênù mwà kumòna Kolintò mwab'ewu . . . Bààbúngì bàà ku beena Kilistò bàà beena Kolintò aba nè bààbúngì bàà . . . Nzambi mukàji munène wa pa buloba mu ditùkù adi ùvwa Dianà, uvwa nzambi mukàji wa beena Loomò. Nè yèyè ùvwa nzambi mukàji wa mu Èfèsò. Nènku ùvwa ùkuukudiibwa pa buloba bujimà. Nènku mpindyewu, bambi bèndè . . . Mu bushùwà bwà bwalu, yèyè bu mùvwàye mukàji, díbà adi aci kuvwijaci bambi bèndè bakàji. Nènku pààkakùdimunàbo mucìma ku bwena Kilistò kùdi Pòlò . . . Mpindyewu, Pòlò ùvwa mu bùlokò pààkafùndàye mikàndà eyi apu, mu bushùwà bwà bwalu, ku Loomò.

¹⁰⁸ Mpindyewu, bààkamufùndila mikàndà, nudi numòna's, paanyimà pàà bamanè kubanga kwakula mu myakulu nè bapetè mapà manène àkwàta mudimu munkaci mwàbò. Èè, bakàji aba bàvwa bèèla meeji nè bìvwa bikèngela kutùngunukabò nè mudimu wàbò wà bwambi.

¹⁰⁹ Mpindyewu, bu nwênù mwà kumòna, nwênù bàdi bàbala Bible wenù abu, mvensà wa 36 mmwambè nànkù.

Cinyi? dìyì dyà Nzambi ndilwilè . . . kunùdi nwênù anyi? nè ndifùmìne ànu kunùdi nwênù nkààyeenù?

Muntu nànsa yèyè nganyì wèla meeji nè mmupròfetà, anyi wa nyumà, ajingululè nè bintu bìndi nnùfùndila mmèyi matùma à Mukalenge.

Kàdi bu . . . yèyè mwikàle mupangi, ikale mene ànu mupangi.

¹¹⁰ Mpindyewu, mu mùshindù mukwàbò, bakàji . . . Mpindyewu, bu nwênù mwà kwangata bwalu-bulonda bwà mukàndà ewu (nwamònu anyi?), bwà èkèleeziyà, bakàji aba bàvwa bèèla meeji

nè bàvwa...bàtùngunuka nè mudimu wàbò wà bwambi ànu mwàkadibo amu wà—wà mwakwidi wa nzambi mukàji Dianà awu. Nzambi kî mmuntu mukàji to; Nzambi m'muntu Mulùme. Nè kùdi ànu bulelèlè Umwèpelè, nè mwinè awu m'muntu Mulùme. Mukàji ncintu cyangacila ku mulùme. Mulùme kààkenjiibwa bwà mukàji to, kàdi mukàji ngwàkenjiibwa bwà mulùme. Nwamònu anyi? Bu nwènù ànu mwà kukàngula cyumvwidi cyènù cyà nyumà, nudi numòna's. Nwamònu anyi?

111 Mulùme—pàakalwà mulùme dyàmbedi pa buloba, ùvwa byònsò bìbìdi mulùme nè mukàji, bukàji nè bulùme kumpàla kwà kulwayè mubidi wà disangila dyà mulùme nè mukàji. Nwamònu anyi? Nyumà wa bukàji, nyumà mupwekèle, ngewu udi lumùmàmùmà. Nè pashìishe ùvwa kàbìdi bulùme, mulùme. Kàdi pàkamwenzàYe nè kumutèèka mushiilàngàne...Bwà kuvudija buloba, Kupàtulayè nyumà wa bukàji awu mu mulùme nè kuumusha lubadi lwà mu luseke lwèndè è kwenzayè mukàji.

112 Mukàji kàvwa nè cyà kwikala mukòòkeshi nànsha! Pàakatwàdijaye dyàmbedi cyôci aci, wàkabweja bukwà bantu mu cibùlè. Nwamònu anyi? Byònsò, nè bìvwa mene mu...Yèyè ke ùvwa mutwàdi wa cibùlè. Nè pashìishe Nzambi kumujuula è kwaluja mwoyi pa buloba kupicila kùdi Kilistò ku mukàji. Kàdi mwaba nànsha wùmwe kabààkanyishilakù muntu mukàji bwà—bwà kwikala mwambi mu èkèleeziyà to.

113 Mu Timòtè Mwibìdi nshapità mwi3, wàkamba nè: “Ncyèna ngiitabila mukàji bwà kulongeshayè anyi kunyèngayè mulùme bukòòkeshi nànsha, kàdi bwà kwikalayè mu cinyaànyà.” Nudi numòna anyi? Nènku kî mbîmpè bwà mukàji kuyiishayè to; aci's ncilelèlè.

114 Mpindyewu, ndi mumanyè nè nkàadikù mumòne bàmwè bakàji bàvwa bayiishi balelèlè—bàvwa mwà kuyiisha pààbò—bu mùdi Aimee McPherson nè bààbûngì bàà ku bakàji abu kuntwaku. Kàdi anji bàlengèbì ànu bwà katanci kakesè cyanààno. Nwamònu anyi? Kabyèna...Ndi mumanyè bantu bàdi bafwànyine kwakula mu myakulu mu dindà emu bàdi basòmbe ànu mu èkèleeziyà emu. Kwòkò kakùyì mwandamunyi to, kabàvwa mwà kudìdinga kwenza nànkù to. Nwamònu anyi?

115 Bikèngela ùvùlukè nè bakàji abu mbalediiibwe mwínshì mwà mulongo kampàndà, bwà nè pàdibo...Dilediiibwa dyèbè didi nè mushinga wàbûngì mu bwalua abu. N'dînà dyèbè, dyèbè—byònsò bìdi bikutàngila (udi umòna anyi?) bìdi nè mùshindù ùdibi byenjiibwe, nànsha cyôci ciikàle cinyi.

116 Mwà mwà kupàtuka pambèlu apa nè kukòka ndèndè wa cingoma nè kushipa muntu kampàndà mu dindà emu, kàdi ncyèna mwà kudìdinga bwà kwenza nànkù to. Kàdi mèmè's ndi mwà kucyènza ànu bìmpè, cyà bushùwà. Nwamònu's, ndi mwà kushipa muntu ànu bu mùdi wèwè mwà kushipa nshindì amu; kàdi kwèna—kwèna nè cyà kwenza nànkù to. Nwamònu

anyi? Nènku ncintu cimwècimwè aci. Bidi bikèngela bwà nwènù kutàbaleela bintu abi, mpindyewu bwà kanwènji to... Eci mmèyì matùma à Mukalenge.

¹¹⁷ Pààkafùndàbo kuntwaku nè kwambabò nè: “Mòna’s, Nyumà Mwimpè mmutwàmbile!” (Nwamònu anyi?), Pòlò wàkamba nè: “Cinyi? Dìyì dyà Nzambi ndipàtùkile kunùdi nwènù anyi? Nè Dyòdi ndifùmine ànu kunùdi nwènù nkààyeenù anyi? Byòbi byenzèke nè ní nganyì wa kunùdi bònso—nwènù biikàle nè bapròfeta kampàndà kuntwaku, nebàjingululè nè cìndi ngàmba eci mmèyì matùma à Mukalenge. (Nwamònu anyi? Ncyà bushùwà!) Kàdi kòkò kwikàle muntu kampàndà ùleeja wèndè—wèndè—muswè kubèngangana naaci, yèyè muswè kwikala mupangi, nànkù mulekèlaayi ikalè mupangi. (Nwamònu anyi?) Abu bùdi ànu bwèndè mulekèlaayi àtungunukè. (Nwamònu anyi?) Kanwènjikù cintu cibèngangana nè aci to.” Kàdi vùlukàayi nè, kabyèna bikèngela bwà yèyè kwakula mu èkèleeziyà to.

¹¹⁸ Nènku ki bwà cinyi, ke mwaba wùdi mwà kulumbulwisha mpaasàta webè anyi ní ncinyi cyònsò, bwà nè yèyè ngwa nyumà anyi to. Nwamònu anyi? Yèyè nè: “Muntu yèyè mwikàle wa nyumà anyi mupròfeta, neàjingululè nè cìndi ngàmba eci mmèyì matùma à Mukalenge.” Nwamònu anyi?

¹¹⁹ Ki bwà cinyi ndi ntùmina bantu dìyì bwà kubàtijiibwabò cyàkàbìdi mu Dìna dyà Yesù Kilistò. Pòlò wakenza nànkù, nè wàkamba nè: “Mwanjèlò wa mu Dyulu yèyè mulwè mulongèshe cingà cintu, èdiibwe mulawu.” Nè eci nùnkù ncikaadi cìlongèshiiibwe mwab’ewu kàbìdi. Muntu kanà yònsò ewu yèyè mwà kulwa... Bu mwanjèlò kampàndà mwà kufùma mu Dyulu kàdi kwamba nè: “Lekèlaayi bakàji bàyiishè nè biikàlè bayiishi, bàjidilaayi biikàlè bambi!” Bible mmwambè nè: “Èdiibwè mulawu.” Aa mmèyì matùma à Mukalenge mwab’ewu.

156. Mbìmpè bwà beena Kilistò balùme nè bakàji kutwànganabò mishiku muntu nè mukwèndè (Kaa!) pàdìbo bèèlangana mwoyi anyi?

¹²⁰ To, mukalenge! To nànsha kakesè! To, mukalenge! Ùtwàtwa mukàji umwèpelè mishiku, mwanèètù, mwinè awu’s mmukàjèèbè (nwamònu anyi?), anyi mwanèèbè—mwanèèbè mulela, anyi... Nwamònu anyi?

“Mbikùmbàne bwà...” Ngǎnji mmonèbi ní ndi mulùmvwè bìmpè! “Mbikùmbàne bwà beena Kilistò balùme nè bakàji kutwànganabò mishiku muntu nè mukwèndè mu dyelangana dyà myoyi anyi?”

¹²¹ To, mukalenge! Nànsha kakesè! Aci... Kanùbangikù aci to! Èyowà’s, mukalenge! To, mukalenge! Wèwè seemènà kule nè bakàji! Umùkà kùdìbo! Cyà bushùwà menemene!

¹²² Mpindyewu, mbàna bèètù bàà bakàji, kàdi kuteeci... Mpindyewu, bàdi bàbyènza’s. Cìinè aci mu... Cintu aci ncibwelè

too nè mu beena Mpenta, nè cidi cibikidiibwa nè: “dinanga didilekèlèlè.” Nènku panùdi nwenza—nupeta cintu kanà cyònsò cyà mùshindù awu, nwènù shààlaayi kule naaci. Ncyà bushùwà!

¹²³ Nànsha wêwè mwikàlè mukezùke wa bìshi. . . Wêwè udi mwanèètù wa balùme, nè ndi—ndi ngiitabuuja nè wêwè udi—udi mufwànyine kwikala mulùme mwímpè wa cijila, mujidiibwe. Nànsha wêwè wa cijila wa bìshi; udi ànu muntu mulùme. Nè nànsha yéyè wa cijila wa bìshi; udi ànu muntu mukàji. Shààla kule nendè too nè panwàsèlangana. Wêwè enzà ànu nànkù!

¹²⁴ Vùlukàayi nè, mubidi. . . Nèngàakule mubùbìke cyakwidi mpindyewu, bwà nwènù bakùlumpè nwamòna mwà kuumvwa. Mmsùmbà wà bantu basambàkàne, kàdi mèmè ndi mwanèènù wa balùme, nè eci ndukonko. Nwamònu anyi?

¹²⁵ Muntu yònsò mulùme ewu anyi mukàji udi nè kajilu kàà mùshindù mushiilàngàne. Mukàji udi nè kajilu kàà bukàji, kajilu kàdi kàjuula masandi. Mulùme udi nè kajilu kàà bulùme, kajilu kàdi kajuula masandi. Nè tótù tujilu atu tùdi tùsanganyibwa mu mishikù yà bantu. Ncyà bushùwà.

¹²⁶ Nè cintu cikwàbò ncyòci eci cìvwà nè cyà kutwàdiibwe, mulùme udi ùtwàngana mishiku nè mukwàbò mulùme. Aci's mbukooyà! Aci's mmanyaanu! Nè cidi cyenza cinyi? Cidi cibanga disangila dyà mulùme nè mulùme. Shààla kule nè aci! Wêwè udi wamba. . .

¹²⁷ Muntu kampàndà kunkonkayè àbidi adi panshi aa, wamba nè: “Mwanèètù Branham, mòna's, bàvwa bèèlangana mwoyi muntu nè mukwèndè nè ditwàngana dyà mishikù yà cijila.” Bàvwa bàtwangana mishiku mu dikoshi, bàvwa bùùpukilangana ku nshingù, nè bàtwangana mishiku mu dikoshi. Aci cìvwa nkumpàlā kwà dilabulangana dyà ku cyanza kubweladi. Ndyelangana dyà mwoyi. Ke mùshindù wùdibi's. Kabàvwa bàlabulangana ku cyanza muntu nè mukwèndè to; bàvwa bèèlangana mabòko nè bàtwangana mishiku mu dikoshi, kì nku mishiku, mumpàla to. Aci cidi cibanga dinyangakaja dyà maalù. Shààlaayi kule naaci! Kanwènjiku aci nànsha!

¹²⁸ Matùkù atùdi aa, tudi tulabulangana ku cyanza muntu nè mukwèndè. Wêwè muswè. . . Wêwè wela mwanèènù dibòkò ku nshingù, nè umutwà mishiku ku nshingù, anyi yéyè udi ùkutwà mishiku ku nshingù, abi's mbyakàne. Kàdi kùtu mukàji awu mishiku, nè kùlekedikù mukàji awu ùkutwà mishiku to. Nwamònu anyi? Ncyà bushùwà! Udi umukwàta ku cyanza, wamba nè: “Anji indilà kakesè, Mwanèètù wa bakàji, indilèbi kakesè apa (nwamònu anyi?); twenzè cidi cijalàme mu bwalu ebu!” Nè pa nànkù, mpindyewu enzàayi nànkù.

¹²⁹ Mpindyewu mvwa munwàmbile cinyi katanci aka pancìvwà mbangilakù? Paùdi umòna kàshinyi ka—kàpweka nè njila mu lubilu lwà kilòmèètà lukàmà nè makùmi ànaayi nè yinaayi ku díbà òmwè, uumùkà mu njila wakù. Ncyà bushùwà!

Paùdi umòna dikonyangala dyà kumpalà mu cintu kanà cyònsò mùshindù awu, umùkàku; shààla kule naaci! Nènku ànu... S'ki mwaba ngwòwù awu wùvwa kawùyì wukèngela bwà wèwè kwikalamù to. Sàtaanà neàkuleejè cintu kampàndà cìikalà mwà kunyangakaja musùùkà wèbè nè kukutùma mu ifernò. Shààla kule naaci! Nyeemà mmwènekèlu mene wa bubì. Ncyà bushùwà!

¹³⁰ Ikàlà mulùme, ikàlà mukàjì, bu... Nèngǎnjìku kwakwilakù bakàjì bwà kasunsa kàmwe cyanààna. Aci ncyà pabwàci kì mmwòmò anyì? Bàdi—bàdi bàmba nè: “Kaa, mukàjì awu's ngudi mucyenzèje's! Kaa, cìvwa ncilèmà cyà mukàjì. Bu yèyè kàyì muumuke pa kaaba kèndè to, èè, mulùme kàvwa mufwànyine kuumuka pa kèndè to.” Aci's ncilelèlè. Aci—netwàmbè nè aci ncyà bushùwà. Ùdi ùùmuka pa kaaba kèndè. Mulùme kènà mwà kwikala mubì pàdiku kakùyì mukàjì mubì nànsha; kàdi vùlukaàyi nè kakwèna mwà kwikala mukàjì mubì pàdiku kakùyì mulùme mubì to. Ncyà bushùwà!

¹³¹ Kàdi wèwè udi ulàka mukana wamba mùdi mwànà wa balùme wa Nzambì awu, mèyì makùlù èbè àdi penyì? Mukàjì kàyì muumuke pa kaaba kèndè to, wèwè kwèna mwànà wa balùme wa Nzambì anyì? Wèwè kì ngudi mutùmbùke awu, lupànza lutàmbe bukolè alu anyì? Nè Bible ùdi wamba nè yèyè mukàjì mmutàmbe kuteketa, pashìshe pìikalàye mmutàmbe kuteketa, dìbà adi dìleejè wèwè mwìnè bu mulùme wa Nzambì. Mwambile, wamba nè: “Mwanèètù wa bakàjì, wèwè udi mu ntùpàkànyì.” Ncyà bushùwà! Mèmè nkaadikù mucyènzè, nè beena Kilistò bakwàbò mbenzè nànkù. Nè newikalà misangu yònsò mwà kwenza nànkù awu ntàntà yònsò ùdi mwena Kilistò awu, kàdi ùdìleejè wèwè mwìnè. Udi mwànà wa balùme wa Nzambì. Wèwè udi—udi nè bukolè bwàbùngi pa wèwè mwìnè kutàmba mùdi naabù mukàjì. Yèyè mutàmbe kuteketa, mujingùlùlè nè yèyè mmutàmbe butekète. Umvwa bilèmà byèndè, nè bintu byà mùshindù awu, anyì teeta bwà kumulongolola. Ambà nè: “Mwanèètù wa bakàjì, tudi beena Kilistò, kabivwa bikèngela bwà twètù kwenza nànkù to.” Nwamònu anyì? Ikàlà mulùme wa bushùwà, ikàlà mwànà wa balùme wa Nzambì, kàdi utàbaleelè bakàjì.

¹³² Nènku mwaba awu ke wàkabangilà cibùlà cinène ku cibangidilu. Ùvwa Sàtaanà nè Evà. Ke cyàkatwàlà cibùlà cyònsò cyà cisà cyà bukwà bantu nkupicila ku cyòci aci.

¹³³ Nènku pawikalà mwànà wa balùme wa Nzambì, ikàlà nè dikàndà; ikàlà mulùme wa bushùwà. Wèwè kùyì mùshindù awu to, shààla ku cyoshelu too nè pawàlwà cyòci aci. Nènku nyeemà mmwènekèlu mene wa bubì. Kàdi kùbangi mpindyewu dyelangana dyà mwoyi... .

¹³⁴ Muntu kampàndà mmungambile kùkaadi cikondo kampàndà bwà nè bàvwa bamòne cyòci aci misangu yibidì anyì yisàtù mu èkèleeziyà wanyì emu, cyà... Kì mmu

èkèleeziyà emu to, kàdi bantu bàdi bàlwa mu èkèleeziyà. Nènku pawikalà musòmbe kaaba aka mu dindà emu, mvwa nè cyà kukwondwelaci bìmpè menemene. Nwamònu anyi?

¹³⁵ Bakàjì, bansongààkàjì, bàlwa nè balùme aba bàtwa bakàjì aba mishiku. Kwènjì nànkù to! Kùteeci... Shààla kule naaci. Vùlukaàyi aci! Yèyè nsongà, mujikè, anyi ní ncinyi cyònsò cidiye aci; neikalè mukàjì wa muntu kampàndà dīngà ditùkù. Nè wèwè kwèna nè cyà kwenza nànkù to. Shààla kule nendè. Wèwè muswè kumwela mwoyi, dībà adi ikàlā mwānā wa balùme wa Nzambi, mulabùle ku cyanza wamba nè: “Wetwàwu, Mwanèètù wa bakàjì.” Nènku aci cìshìikidile ànu mwaba awu. Nwamònu anyi?

¹³⁶ Shààla kule nè bintu abi; mbukooya. Nè nebikubweje kàtataakà mu lutātu. Udi ànu... Kaa, aci's cidi ànu... Mpèkaatù's mmupeepèle ànu menemene, nè ùdi ùlòbeshangana byà dikèma, nè ùsànkisha bikolè be. Mbipeepèle menemene bwà wèwè kukùlukamù. Cintu cidi citàmbe bwìmpè cyà dyenza cidi nè, mmwènekulu mene wendè awu, kushààla kule nendè! Alùjā makàsà paanyimà! Ikàlā mwena Kilistò mulelèlā!

¹³⁷ Kàdi bwà muntu mulùme ùtwa mulùme nendè mishikù, wèwè utwà mwanèènù wa balùme mishiku ku nshingù, nè pawikalè muswè kucyènza, abi's mbyakàne. Kùtu muntu mulùme nànsha umwe mishiku mu yèndè nànsha, nè ku mishiku, anyi cintu kanà cyònsò cyà mùshindù awu to, bwalu aci cidi—aci kī ncìmpè to. Nwamònu anyi? To, aci—aci cidi cileeja nè kùdi kaacintu kampàndà kàdi kakàyi mu kòkò to twamb'eku twamb'eku. Nwamònu anyi? Pa nànkù shààla wèwè ànu kule naakù, cinyème. Kanwikadi—kanwikadi nwābangaku abi ku nyungulukilu wa tabernacle ewu to. To, ncyà bushùwà nè katwàkucitwàlakù to nànsha kakesè. Nwamònu anyi?

¹³⁸ Wèwè—wèwè muswè kumòna mwanèènù wa balùme, wèwè muswè kumutwà mishiku ku nshingù, èè, tūngunuka ùcyènzè, kàdi kanùtu bantu mishiku ku mishiku to, bwalu aci kacàkukùmbanàkù to; aci kī ncìmpè to! Nè cidi citwàdija ànu cinyangu. Cidi citwàdija dyangatangana dyà balùme nè balùme nè bikwàbò.

¹³⁹ Nènku kùdi bintu ànu bibìdi byènzekà mu bintu byà mùshindù awu abi... Nwènù babangè, bantu... Nkàadi mumòne, kaa, misangu yàbùngì munkaci mwà bantu, nebàpwekè. Nkàadi mumòne maèkèleeziyà, nè muiyishi mufwànyine kubwelamù, wèla mwanèètù wa bakàjì yònsò mu citupà, nè ùmuupukila kàdi kumutwà mishiku nè kumusòmbesha panshì. “Wetwàwu, Mwanèètù wa bakàjì, Àlèluuyàh!” Ùsemena kwàka kàdi kupyà ewu nùnkù nè kumutwà mishiku. Wènda ùpweka mu èkèleeziyà mùshindù awu. Bwànyì mèmè aci ncibi!

¹⁴⁰ Pâmvwà nsanganyibwa mu Finlande, tuvwa bônsò tusanganyibwamù... Nudi bafwànyine kumanya bwalu ebu, tuvwa twenza masangisha, nè mvwa nsanganyibwa ku Y.M.C.A. Kakùvwa nsàbàngà to, kakùvwa nsàbàngà wa mwendwendù mu Finlande to. Nènkù ànu... Mvwa ànu nè nsàbàngà wa kudikungula nendè myedi, nènkù yônsò wa kutùdi ùvwa nè cyà kwimana nè kuditumpwila mâyi, nudi bamanyè's, nè nsàbàngà wa didikungula nendè myedi ewu. Tuvwa nendè ànu umwèpelè awu, nè katùvwa nè nsàbàngà mu Finlande to. Nènkù bôbò bàvwa ànu bwòwa mâyi nè bintu kampàndà bisopakaja, nè biinè abi bifwànyine kuumusha dikòbà pambidi.

¹⁴¹ Nànkù dîbà adi twètù... Bààkatwàmbila nè bàvwa nè cyà kuya neetù ku mâyi à dibungi à cyena Finlande. Ke twètù kuya ku Y.M.C.A. Nènkù twètù kuya kuntwaku bwà kwowa mâyi à dibungi awu. Awu ngàà cyena Finlande, mâyi à kwowa mende luumù à cyena Finlande. Mvwa muwôwe kumpàlâmpala, nè ôwù àvwa mîmpè. Kàdi mêmè kudyàmbidila nè "Èè, netwikalè mwà kuya... ku Y.M.C.A., pa nànkù mbifwànyine kwikala bîmpè."

¹⁴² Kàdi pangàakabanga kuya kuntwaku, Nyumà Mwîmpè kungambila nè: "Kwènji nànkù to." Kaa, mbîmpè be bwà kwikala nè Nyumà Mwîmpè. "Kwènji nànkù to."

Èè, mêmè ànu pa dîbà adi mene, mêmè kwamba nè: "Ncyèna ngèèla meeji nè ndi muswè kwowa mâyi mu dîndà emu to."

Ngàngàbukà Manninen nè bakwàbò abu kwambabò nè: "Kaa, Mwanèètù Branham," bôbò nè, "ekèlekèle, kùdi bibambalu binène byà mmwènù, nè," yèyè nè, "s'mbilenga byà dikèma." Yèyè nè: "Kabyèna..."

Pa ciibidilu, pàdibo bwòwa mâyi awu, bàdi bàkùpa mâyi aa pa mbwebwe ya mudilu nè binùjuula cikòpàkànyì pambidi pajimà, nè bànùtuuta nè mabèji à mucì wà bouleau mùshindù awu, nè pashìishe—nè pashìishe upàtukamù dyàkàmwè nè udituuta mu mâyi à mashika. Beena Finlande abu bàtu bàbwela buludì mu nèjè nè mu mabwe à mashika, nè bintu byà mùshindù awu. Kàdi, mu bushùwà bwà bwalu, bàkaadi biibidilàngàne naaci; bantu banène, bàà mpolondo, bàà katankù. Nè pashìishe bààlukila nè—nè bàbwela cyàkàbìdì mu mâyi à luuya aa, buumuka mu à luuya bàya mu à mashika, lùkàsàlùkàsà mùshindù awu. Kàdi bàvwa ànu bàndekela ngìimana mwaba wùvwà lupeepèlè lwà citeleela lùsanganyibwa awu, nè pashìishe ngààlukila, bwalu ncìvwa mwà kucyènza to. Mvwa nè bwòwà bwà nè nkwèpi kwàlwàwu kukwimanyika mwoyi, bwà kwenza nànkù, kàdi ncìvwa mwibidilàngàne naawù to.

Pa nànkù mêmè—mêmè mvwa muànangè bîmpè menemene, kàdi Cintu kampàndà kungambilaci bwà ncìyi kwowa mâyi à kuntwaku to. Èè, Howard mwanèètù wa balùme, nè Mwanèètù Baxter, nè bônsò abu kubànda kuya kuntwaku, nènkù bàna bèètù, bakwàbò bônsò abu, nudi bamanyè's, bônsò bààyiikila,

nudi bamanyè's, bàbàndakù. Pa nàнку mèmè kwenza bu mubìndùlùke ndambù, nudi bamanyè's, bwalu Nyumà Mwimpè ùvwa mwambè nè: “Kwènjì nàнку to.”

Pa nàнку twètù kubànda ku Y.M.C.A., nènku bóbò kubwelabò, bantu bònsò abu kungelabò mwoyi. Nènku, kaa, bàvwa nè—nè mitù yà maalu mu cibèjibeji amu, dibèji dyàkumpàlà nè diibìdì, ditùku dyònsò, bwà masangisha. Nè bàvwa mu nyungulukilu amu.

Mèmè kubwela mu kaacibambalu kakesè è kusòmba panshì, ke bònsò kubwelabò mu cibambalu bwà kuvùùla bilàmbà. Nènku pàvwàbo muntwamu bàvùùl-. . . bwà kuvùùla bilàmbà, kì kànà kàà bakàjì kàà kwisù kwimpè, katekète, kàà cyena Finlande kàlwalwà aka, kàà nsuki mitòòkoloke ku mutù. nènku's mbantu balenga bàà dikèma, mbakezùke, bantu bàà nsòmbelu mulenga nè mwàbò mwònsò. Ke yèyè ulwàlwa ewu, nè nsùmè myela pa dikaaya dyèndè, kubangayè kubwela mu cibambalu amu. Mèmè nè: “È, è, è! Imànà! Psss!” Mèmè kuteeta bwà kumwimanyika. Kukùdimukayè nè kusekayè, kutungunukayè è kubwela muntwamu, nè kupèèshayè yònsò wa kùdibo nsùmè (nè bantu balùme abu, kabàyi bilàmbà pambidi to.) Mukàjì yònsò kulwayè kukwàtaye mulùme kampànda, kubwela nendè lwà muntwamu, kubànyanuna mùshindù awu. Mèmè kumvwa cìvwà Nyumà Mwimpè ùswa kwamba.

Pa nàнку dībā adi pangààkaalukilà pambèlu, mèmè kwamba nè: “Docteur Manninen”, mèmè nè: “mbyenzeke munyì's? Nwènú bu beena Kilistò, kàdì nubwela, nukwowa naabù màyi à dibungi awu. . .”

“Kaa,” yèyè nè: “abo's mbakàjì banyanunyanganyi, Mwanèètù Branham.”

Mèmè nè: “Nànsha bóbò biikàle banganyi. Mbibì. Kì mbimpè to.” Mèmè nè: “Nè bufùki mene's bùdì bùnùlongesha.”

Yèyè nè: “Mòna's, Mwanèètù Branham, s'mbabàkolèshe kwambwila ku bwànà, bwà kunyanunangana. Ànu mùdì baamingàngà bèènù bakàjì mu Àmèrikè amu, bintu byà mùshindù awu, mbakolèshìibwe mùshindù awu.”

Mèmè nè: “Nànsha bóbò biikàle banganyi, aci cìdì ànu cibì. Kakùyì mpatà to. Mbalùme nè bakàjì, nè bìkèngela bàtapulukè, nè bàvwale bilàmbà muntu kumpàlà kwà mukwèndè.” Amen.

Ncyèna muswè kubangila pa cyòcì aci to, ndi mufwànyìne kuyiisha cyòcì aci paanyimà pàà katanci, kì mmwòmò anyi? Èyo.

156b. Bu wèwè mwà kuswà umvwijaku Diitabuuja dyà bàpostòlò.

Aci ndukonko lùmwè. Kùdì lùmwè, yìbìdì, nè nkonko yisàtù. *Diitabuuja dyà bàpostòlò* didi dyùmvwija nè “Diitabuuja dyà bàpostòlò.” Ke cìdì diitabuuja dyà bàpostòlò dyùmvwija, mbwena kwamba nè wèwè shàale nè Bible. Mpindyewu cìdìbo

bàbìikila leelù ewu nè ndiitabuuja dyà bàpostòlò aci, bààbúngi bàà kùdìbò kabèèna bàshààla nè Bible to. Kàdi dyà bàpostòlò bìdì byùmvwija nè Diitabuuja dyà—dyà bàpostòlò, Diitabuuja dyà bàpostòlò dyà Bible. Èyo.

156c...nènkù musùmbà wà bàdì bàdìbìikila mùdìbò biitabi bàà maalu ànu mùdìwu mafùndiibwe, misùmbà yìbìdì eyi mmisùngìdìibwe anyì?

Mpindyewu, ncyèna mumanyè to. Nwamònu's, ncyèna mufwànyine kumanya mwà kwandamuna ku aci to. Mpindyewu: "Misùmbà eyi mmisùngìdìibwe anyì?" Ncyèna mumanyè to.

Umvwìjàkù dishiilangana pankaci pàà nyumà nè. . .

Èè, ndukonko lushiilàngàne mpindyewu.

Mpindyewu, "Misùmbà yìbìdì eyi mmisùngìdìibwe anyì?" Swàyi ncyumvwijèkù ndambù bitòòke menemene bwènù nwènù, ngàmba nè: "Ncyèna mumanyè to. Ncyèna mufwànyine kumanya to."

Mpindyewu vùlukàayi nè, ke àànyì meeji ngòwò aa, àdi mwà kwikala ntùpàkànyì. Àànyì meeji ngòwò aa, àdi nè, mwena Kàtòlikè kàà cyena Loomò, anyì ní nganyì yònsò udiyè mufwànyine kwikala awu, Méthodiste, Presbytérien, église de Christ, Luthérien, kwònsò kùdiye ùsanganyibwa aku, yèyè mwtàbùùje Mukalenge Yesù Kilistò nè muMweyèmene kakùyì tuseku to bwà lupàndù lwèndè, ndi ngiitabuuja nè mmusùngìdìibwe.

Kàdi, nudi numòna's, èkèleeziyà wa Kàtòlikè wa cyena Loomò kàtu wènzà nànkù to. Bàdì biitabuuja nè èkèleeziyà ùdi ùbàsùngila. Nwamònu anyì? Lupàndù lwàbò—lwàbò lùdì mu èkèleeziyà. Bu mùvwà nsaserdòsè ewu wàkuumushabò ku tudyòmà, munwemu kùkaadi ndambù wa matùkù, bwalu ùvwa mwàmbè nè: "Kakwèna lupàndu lukwàbò nànsha, ànu mu èkèleeziyà, nwamònu's, èkèleeziyà wa beena Loomò." Mpindyewu, aci's ncyà mafi. Lupàndu nku Yesù Kilistò. Ncyà bushùwà. Kì nku èkèleeziyà to; kàdi nku Kilistò.

Mpindyewu pìikalàye wa bàpostòlò, anyì, èyowà, wa bàpostòlò nè biitabi bàà maalu ànu mùdìwu mafùnda mpindyewu mùdìbò bàdìbìikila bóbò biinè. . .

Mpindyewu bu mùvwà mwtabi kampàndà wa maalu ànu mùdìwu mafùnda mulwè kùndì, mwab'ewu kùdì cikondo kampàndà, nè kungambilayè, wàmba nè: "Udi bu mutàmbe kweyemena ba-Calvinistes, kì mmwòmò anyì?"

Mémè nè: "Èè, pàdìbì ànu Calvin ùdi ùshààla mu Bible, mémè ndi mutwè ku cyèndè." Mémè nè: "Mémè ndi ànu mpetangana nè Bible, nènkù pìikalà Calvin yèyè ùshààla mu Bible. Kàdi pàdiye ùmuka mu Bible, dìbà adi ndi ànu ntùngunuka, ngiitabuuja Bible."

Yèyè nè: “Èè,” yèyè nè, “ndi muswè nkwabìlèku cintu kampàndà. Wákamba, mwá mukúmvwè wamba nè muntu yèyè mumanè kusùngìdiibwa, nè kàvwa mwà kujìmina nànsha.”

Mémè nè: “Aci’s ke cidi Mufundu wamba menemene. ‘Yèyè ùdi nè Mwoyi wà Cyendèlèlè, nè kàadyàkupicilakù mu dipiishibwa anyi ku cilumbulwidi to, kàdi ùkaadi muumùke ku lufù muyè ku Mwoyi.’” Mémè nè: “Awu kî mmémè wákacyàmba to. Awu ùvwa n’Yesù Kìlistò wákamba nànkù.”

Yèyè nè: “Ndi muswè nkukonkèku cintu kampàndà díbà adi.” Yèyè nè: “Udi witabuuja nè Shawùlà wàkasùngìdiibwa anyi?”

Mémè kwamba nè: “Shawùlà, mfù—mfùmù Shawùlà anyi?”

Yèyè nè: “Èyowà.”

143 “Mòna’s,” mùngààkambà, “bushùwà’s!”

Yèyè nè: “Mpindyewu vùlukàayi nè, yèyè ùvwa mupròfètà.”

144 Mémè nè: “Menemene, Bible mmwàmbè nè yèyè wákamba cipròfètà nè bapròfètà.” Yèyè ùvwa nè dipà dyà cipròfètà. Kàvwa mupròfètà to, kàdi ùvwa nè dipà dyà cipròfètà, bwalu yèyè ùvwa kuntu kwàka nè bapròfètà pàvwàbo munkaci mwà kwamba cipròfètà apu. Kàdi tudi bamanyè nè Samwèlè ùvwa mupròfètà mu ditùkù adi, pa nànkù, kàdi Shawùlà ùvwa wamba cipròfètà nè bapròfètà.

Yèyè nè: “Dìbà adi pìikalàbi nè yèyè ùvwa mupròfètà, díbà adi wàkasùngìdiibwa anyi?”

Mémè nè: “Kakùyì mpatà to!”

Yèyè nè: “Nànkù ndi muswè nkukonkèku cintu kampàndà.” Yèyè nè: “Ndi muswè nkukonkèku cintu kampàndà.” Yèyè nè: “Nè pashìishe wèwè udi wamba nè Shawùlà wàkasùngìdiibwa, kàdi yèyè—Bible’s mwambè nè Mukalenge wàkamulekela nè yèyè wàkashàala mwena lukunà wa Nzambi, kàdi kudishebeyayè, nè pashìishe kwamba nè ùvwa musùngìdiibwe anyi?”

145 Mémè nè: “Kàdi udi mwitabi wa maalu ànu mùdiwu mafundìbwe anyi?” Mémè nè: “Mwanèètù, kwèna ànu ucibala mu cyôci to; kwàjiki. Kwèna ubala cidi Mufundu mwambè to.”

Yèyè nè: “Èè, Shawùlà kàvwa mwà kusùngìdiibwa to pìikalàye mulwè mwena lukunà wa Nzambi.”

Mémè kwamba nè: “Shawùlà ùvwa musùngìdiibwe.”

“Kaa,” mwàkambàYe. . .

146 Mémè nè: “Yèyè’s ùvwa mupròfètà, bìvwa bikèngela bwà kusùngìdiibwayè. Nwamònu anyi? Nzambi wàkamusùngila, nè Nzambi kî mmwena kupà-kupala to, mutùdi tucibìikila. Yèyè kèna. . .Èè, pìikalàbi nè Nzambi mmukupèeshe Nyumà Mwimpè mumanyè nè Yèyè nèakujìmiye paanyimà pàà matùkù,

mòna's, ncifwànyine kwikala cintu cikùtàkàne kaayi kùdiYe bwà kukupèèsha Nyumà Mwîmpè dyàmbedi."

¹⁴⁷ Udi mufwànyine kutentula Nyumà Mwîmpè nè kwenza maalu bu udi nè Nyumà Mwîmpè, kàdi pawikalà nè Nyumà Mwîmpè, Nzambì mmumanyè mbangilu webè kwambwila ku ndekeelu. Ncyà bushùwà! Aci ke mùshindù wa kwenza maalu nè dyelakana. Nzambì kàtu wènza maalu Èndè bu... Yèyè—Yèyè kèna nè mikàlù to, Yèyè ùvwa mumanyè ndekeelu kacya ku cibangidilu nè ùvwa mumanyè byònsò bìvwà mwà kwikala kaaba aka. Lujijji lwònsò, anyi kajijijijijji kònsò kàvwàku mwà kwikala pa buloba aku, Yèyè ùvwa mumanyè byònsò pa bwalu bwàkù kumpàlà mene kwà dyulu nè buloba kubangabì. Nàнку nwamònu's, cidìYe mufwànyine kwenzela maalu Èndè mùshindù awu ncinyi? Yèyè kàtu wènza nàнку to.

¹⁴⁸ Pawikalà musangu kampàndà, pawikalà cyà bushùwà nè Nyumà Mwîmpè, udi musùngidìibwe cyendèlèèlè. Ndi mwà kujaadika aci ku Mifundu, nè tudì bacyenzè misangu nè misangu. Kàdi bwà kulaminyina dìbà bwà kwandamuna nkonko eyi, ndi mufwànyine kwamba nùнку (nudi numòna anyi?), nè mulùmyàna ewu kwambayè nè: "Èè, dìbà adi udi mufwànyine kwamba cinyi bwà Shawùlà?"

¹⁴⁹ Mémè kwamba nè: "Bushùwà Shawùlà's ùvwa musùngidìibwe." Mémè nè: "Vùlukà nè, Shawùlà wàkatwà cìmpìngà; mémè nèngùtabè aci. Wàkatwà cìmpìngà nè wàkaya kule nè Nzambì, bwalu ùvwa nè lukùkà. Ùvwa munangè mfrangà." Ùvwa mwà kutwàla milàmbù yònsò ayi nè bikwàbò, pàvwà Samwèlè ku Dìyì dyà Nzambì mumwambìlè bwà kubùtula bintu byònsò. Kàdi yèyè wàkasùngila mene nè mfùmù, nè wàkasùngila bintu byàbùngì, nè wàkabìtwàla bwalu... Nwamònu anyi? Pamutù pàà kulonda Dìyì dyà Nzambì ànu menemene mùdiDi dyàmba amu, udi utèèkamù mmwènenu webè sungasunga; ke mwaba wùdì wutwila cìmpìngà ngwòwò awu.

¹⁵⁰ Ke cìndi mémè ngèlè meeji bwà màngumba nè bikwàbò abi, bàdi munkacì mwà kutwà cìmpìngà, bwalu kabèèna bàlonda Dìyì to. Nènku udi ubàleeja Dìyì, bàdi baDìkoma nyimà, bàmba nè: "Kaa, wetù èkèleeziyà's ùdi ùlongesha *cikampàndà*." Aci kí ncyà bushùwà to, ncìdi Nzambì mwambè!

¹⁵¹ Nènku Samwèlè wàkatùmiibwa nè mudimu wà kupweka kuntu aku—anyi Shawùlà nguvwa mutùmiibwe—bwà kubùtula bintu byònsò butubutu, "Byònsò, udi ubibùtula byònsò." Pamutù pàà kwenza nàнку, yèyè wàkalama bimwè bwà mulàmbù, nè wàkasùngila mwoyi wà mfùmù awu, nè wàkenza bintu byònsò. Ke Samwèlè kupatuka è kuya kùdiye nè kumwambila nè Nyumà wa Nzambì ùkaavwa muumùke kùdiye nè—nè byònsò byà mùshindù awu abi.

¹⁵² Ke Samwèlè kufwàye. Nè bidimu bitwè ku bibidi paanyimà, èè dībà adi, Shawùlà ùkaavwa nè...Nyumà wa Nzambi muumùke kùdiye, kàdi yèyè kàvwa mujimine to. Ncyà bushùwà nè kàvwa mujimine to, dilaabiibwa adi dyàkuumuka kùdiye. Mpindyewu tàngilàayi, nè nùmonè ní bìvwa nànkù mpindyewu.

¹⁵³ Shawùlà wàkatàmba kuya kule nè Nzambi mu mùshindù wà nè pàakayàye ku mvità...Wàkabanga kuya ku mvità. Nènku ùvwa ùditàcisha bwà kuya ku mvità, nè yèyè—yèyè kulòmba Mukalenge bwà cilòòtà kampàndà. Mukalenge kàkaswà kumupèesha cilòòtà to. Kakùvwakù bapròfetà mu ditùnga amu to, kakùvwakù bapròfetà to. Samwèlè ùvwa mupròfetà. Bàvwa nè bambi bàà bipròfetà, kàdi nè bikwàbò, kàdi bóbò—yèyè kàvwa mwà kupeta dyandamuna dyà kùdi Nzambi to nànsha kakesè. Kupwekayè mene too nè ku Ulimà-Tuumimà nè kukonkayè mwaba awu. Kàdi dipenya dyà mikenyi pa Ulimà-Tuumimà apu kadìvwa nànsha diswè kumwandamuna to. Kàdi cyàkenzàye ncinyi? Wàkalabila mu nyòngòlò mùvwà mwamulopò amu, mwena lubùku. Nè yèyè mwamulopò awu... Wakadikùdimuna bu mùsàlaayi è kuya muntwamu, ke yèyè nè: “Udikù mwà kunzangwila nyumà wa Samwèlè mupròfetà anyi?”

Ke yèyè nè—yèyè nè: “Èè mpindyewu, wèwè’s udi mumanyè cidi Shawùlà mwambè.” (Ùvwa wàkula nè Shawùlà, kàdi kàvwa mumumanyè to.) Kwambayè nè: “Shawùlà mmwàmbè nè bònso bàdi nè mikishi yà lubùkù lwà mùzàngù, ùdi nè cyà kubàshipa.”

Kwambayè nè: “Nènkùkùbè kùdi Shawùlà, kàdi nzangwilèku nyumà wa Samwèlè.”

Ki mwamulopò awu kuditwayè mu ditùuka dyà mikishi yèndè ayi, kàdi katanci aka, mmwenzè ànu ùmòna Samwèlè ùbànda anyi, nyumà wèndè awu munkaci mwà kulwa, wimana kumpàlà kwàbò, yèyè kwamba nè: “Ndi mmòna banzambi bàpàtuka mu buloba.”

¹⁵⁴ Aci’s ke bùmwe bwà ku busàmbi. Ke mununu Samwèlè awu mwimàne mwaba awu. Ùkaavwa mufwè kùkaavwa bidimu bibidi, kadi’s ke yèyè awu mwimàne. Kàyi ànu...Ùvwa mwimàne mwaba awu muvwàle mùzàbì wèndè wà mupròfetà awu. Kàvwa ànu nè mwoyi cyanààna to, kàdi ùcìcìvwa ànu mupròfetà. Àlèluuyàh!

Mukàjì awu kwambayè nè: “Udi mundingè.” Kùdi muprò-...

Ke Shawùlà kwambayè nè: “Samwèlè, ncyèna mumanyè cyà dyenza to; Ndi nya ku mvità mààlabà, kàdi Nyumà mmunguumùke.” Yèyè kwamba nè: “Ncyèna nànsha mwà kupetela cilòòtà cyà kùdi Mukalenge to. Nè Ulimà-Tuumimà kì mmuswè bwà kungaakwila to. Mèmè ndi mu mùshindù wà wènzà nè bwòwà.”

¹⁵⁵ Yèyè nè: “Pa kumòna nè wèwè udi mulwe mwena lukunà wa Nzambi,” yèyè nè, “bwà cinyi udi mumbiikile bwà kumpàtula

mu diikisha dyànyì?” Nwamònu anyì? Samwèlè ngwákamba nànkù. Kwambayè nè: “Udi mumbiikile bwà kumpàtula mu diikisha dyànyì bwà cinyì, pèèbè mushààle mwena lukunà wa Nzambì?” Ke pashiishe kutùngunukayè nè kumulondela. Yèyè nè... Kàdi nànsha nànkù, ùvwa mwà kumwambila Dìyì dyà Mukalenge. Nè pààkenzàye nànkù... Mpindyewu vùlukààyi nè, yèyè ùkaavwa mufwè kùkaavwa bidimu bibidì. Nwamònu anyì? Kàdi yèyè kwamba nè: “Nènkwambilè Dìyì.” Yèyè kumwambila Dìyì dyà Mukalenge. Yèyè nè: “Mààlabà nèufwe mu mvità, nè Jonathan mwanèèbè wa balùme nèàfwè pàmwè neebè. Nènkù,” mwàkambàye nè, “pa dîbà edi mààlabà dilòòlò newikalè naanyì.” Pìikalàbì nè ùvwa mujimìne, nànkù ke mùvwà pèndè Samwèlè mupròfetà. Aci’s ncyà maalu ànu mùdiwu mafùndiibwe; nudi numòna cìdici cìdibiikila. Nwamònu’s, nwamònu anyì? Yèyè wákamba nè: “Wèwè newikalè naanyì mààlabà dilòòlò pa dîbà edi.” Nwamònu anyì? Dîbà adi pìikalàbì nè Shawulà ùvwa mujimìne, ke mùvwà Samwèlè pèndè mujimìne, bwalu bùbidì bwàbò bàvwa mu mwaba wùmwèwùmwè awu.

¹⁵⁶ To, to! Mwena maalu mùdiwu mafùndiibwe, wèwè... Wèwè udi udyàmbe mùdi mwena maalu mùdiwu mafùndiibwe, bu mùdi Èglise de Christ wa ku dîná awu, nè mwena Kilistò wa ku dîná awu, bwena Kilistò bwà ku dîná abu. Leelù ewu bwalu udi mwena Àmèrikè udi nè cyà kwikala mwena Kilistò, ànu bwalu udi—udi mwena Àmèrikè. Nwamònu anyì? Aci—aci’s ke bwena Kilistò bwà ku dîná’s. Kàdi mwena Kilistò mulelèlè mmulùme mulediibwe cyàkàbìdì kùdì Nyumà nè bakàjì balediibwe cyàkàbìdì kùdì Nyumà. Aci ncyà bushùwà menemene... Bakwàbò aba bàdi bàtentula, kàdi beena Kilistò balelèlè mbàbiikidiibwe kùdì Nzambì.

157. Bu wèwè mwà kuswà umvwijàku dishiilangana didi pankaci pàà nyumà nè musùukà.

¹⁵⁷ Èè mpindyewu, aci’s ke cyà cicolè be. Kàdi cintu cyà kumpàlà cyùdì, muntu pàsàtù, ànu mùdi Taatù, Mwànà, nè Nyumà Mwîmpè amu. Taatù, Mwànà, nè Nyumà Mwîmpè mmyànzù yisàtù yàà Mupèrsonà umwèpelè, udi Yesù Kilistò awu. Nè wèwè udi musùukà, mubidì, nè nyumà. Kàdi bìdì bikèngela bwà bisàtù ebi kukwenzabi. Ànu nè cimwè cyà ku byòbì, kî ngwèwè to. Bìdì bikèngela bisàtù abi bwà kukwnza wèwè.

¹⁵⁸ Ànu mùmvwà mwambè ditùkù adi nè: “Eci ncyanza cyànyì; ewu mmunu wànyì; eci ndyùlù dyànyì; eci mmèsù àànyì; kàdi *mèmè* ndi nganyì?” Ndi nganyì mèmè mwena bintu ebi? Ke cidi munda mwànyì; ke—ke meeji ngòwò awu.

Pìikalà mèsù aa, pìikalà byanza ebi, pìikalà mubidì ewu mwimàne kaaba aka ànu mùdiwu leelù ewu emu, kàdi pàànyì’s mvwa—mvwa mwà... Mubidì wànyì mmufwànyine kwikala

kaaba aka, kàdi *mémè* ndi mwà kwikala muyè, cìndi aci. Cìdi—cyònsò cìndi *mémè* mwikàle munda mwànyi emu nciyè. Aci—aci's nciitùpà—citùpà cìdi nyumà. Musùùkà ke ngiikàdìlù wa nyumà awu, bwà nè pàdì Nyumà Mwímpè ùlwa pambidi pèèbè, Kacyèna nè cidici cyèenza to... Wèwè... Cidi cishintulula anyi cikùdimwisha nyumà webè awu mucimà ùshààla musùùkà mushiilàngàne. Nè musùùkà awu ke ngiikàdìlù mushiilàngàne udi pa nyumà awu. Pa nàнку musùùkà awu ke ngiikàdìlù wa nyumà webè.

¹⁵⁹ Mwaba wúvwà dyàmbedi nè lwonji, nè bubì, nè lukinu, nè budimù, nè dikòkangana; mpindyewu udi nè dinanga, nè kalolo, nè musàngèelu, nè—nè... Nudi numòna dishiilangana anyi? Ngiiikàdìlù webè. Mutùdi mwà kumubiikila, ndi ncibiikila nàнку. Mmusùùkà wèbè ùdi mushintùlùdiibwe. Musùùkà wà kale awu mmufwè, nè musùùkà mupyamùpyà wùdi ngiikàdìlù mupyamùpyà awu wàkalediibwa munda mwèbè. Nwamònu anyi?

¹⁶⁰ Bongò bwèbè kí mmeeji èbè to; n'nyumà webè udi munda mwèbè awu udi meeji èbè. Nwamònu anyi? Bongò bwèbè mmushiki wà bintu nè tubùlù twà mashi nè bikwàbò; kabwèna nè meeji munda mwàbù to. Bu byòbi nàнку, dîbà adi pàvwàbò ànu bulààle mwaba awu, nànsa wèwè mufwè anyi mwikàle nè mwoyi, mbufwànyine ànu kukwàta mudimu. Nwamònu anyi? Kàdi kí—kí m'bongò bwèbè to; n'nyumà webè munda mwèbè amu. Nè musùùkà wèbè n'ngiikàdìlù wa nyumà awu. Mmusùùkà wà nyumà wùdi ùkòntonona—nyumà udi ukòntonona mubidi awu. Nwamònu anyi? Ki bwalu mbwòbù abu.

Mpindyewu, bikèngela ndwijakajè, bwalu dîbà dikaadi dyènda dipita ndambù mukesè. Mpindyewu, ndi ngèèla meeji nè—ndi ntèkemena nè aci ncijikije abu bwalu.

158. Mwanèètù Branham, bu wèwè mwà kuswà umvwìjakù—bu wèwè mwà kuswà tòòkeshàku bímpè bakàji ní bàdi mwà kufila bujaadiki anyi kwakula mu myakulu mu disangisha.

¹⁶¹ Èè, *mémè* ndi ngèèla meeji nè mukàji yèyè mwikàle mu—muyiishi mu disangisha, kèna nè cyà kwikala muyiishi to. Kàdi yèyè nè dipà dya myakulu nè wàkula mu disangisha, mwaba wùdi—wùdi baprófètà nè—nè mapà badisangishe pàmwe, ndi ngèèla meeji nè yèyè ùdi nè bukenji bwà kwenza cyòcì aci. Bwalu mu Bible tudi tusangana nè bàvwa nè baprófètà bakàji bu Miliyàmà nè bakwàbò abu, nènku kabàvwa—kabàakadi nè bukòkeshi... Bu *mémè* mwà kubwela mu kaadiyiisha kàànyi kakesè mwab'ewu, nè—nèncìbwejèmu. Nwamònu anyi?

¹⁶² Kàdi bakàji, bóbò biikàle nè mapà... Mpindyewu, mùshindù mujaalàme wùndi *mémè* ngèèla meeji nè patùdi tudisangisha mu katanci kakesè emu... Piikalà èkèleeziyà wetù mwà kutàmba kushiindamijiibwa ndambù mukesè... Nènku—nènku byòbi mene, kùdi kasumbù kapyakàpyà, kapyakàpyà—èkèleeziyà

mukwàbò neìkalè nè cyà kudyènza cimùku nè...?...ùdisanga nè èkèleeziyà ewu patùdì ànu tupeta cibambalu mwab'ewu bwàbò bôbò nè bikwàbò. Èkèleeziyà mukwàbò neàlwe bwà kudisanga nè èkèleeziyà ewu, kî mbulongolodi nànsha bùmwe to, balwè ànu bu mubidi kampàndà, mu kasumbù kampàndà, kùdì èkèleeziyà. Nènku—nènku bôbò mmusumbà wà bantu bàdì nè mapà.

¹⁶³ Nènku mpindyewu, pàdiyi yìdisanga pàmwe, bintu byà kwenza, mbwà bantu bàdì nè mapà aba bìikalè nè cyà kudisangisha mu bikondo kampàndà bôbò nkààyaabò, nè kumòna cìdì Nyumà ùbàmbila. Nè pashìishe cìvwa mwà kufidiibwa patòòke pa cibumbà cyà ku cyambilu. Nè bantu... Mbwà dikolesha dyà èkèleeziyà.

¹⁶⁴ Mpindyewu, wèwè wakula mu myakulu, kàdì mumanyè nè, kakwèna muntu nànsha umwe udi uyàndamuna to... Nè pashìishe panùdì mu masangisha, mîngà misangu mbyà dipanga dyà kaneemu kàà menemene, nudi bamanyè's. Nudi nusangana misangu mikwàbò...Mvwa mwimane mu disangisha dyànyì ngenza dibìikila dyà ku cyoshelu, nè muntu kampàndà ùvwa mwà kujuuka bwà kunyangakaja dibìikila dyà ku cyoshelu mwikàle wàkula mu myakulu. Mpindyewu nwamònu's, mpindyewu muntu awu mmufwànyine kwikala wàkula mu myakulu mu mùshindù mujaalàme; aci cìvwa cìfwànyine kwikala Nyumà Mwîmpè, kàdì nwamònu's, kàyì mulongèshìibwe bwà kumanya cyà dyenza to, mùshindù wà kucilama...

¹⁶⁵ Mvwa musòmbe ànu pa cibumbà cyà ku cyambilu apu nè ntèeleja muiyishi ùyiisha nè mmumòna ùfika pa kaaba kampàndà...Èkèlekèle, mvwa njinga kujuuka bwà kumwambulwisha bibi be mu mùshindù wà nè ncìvwa mumanyè cyà dyenza to. Nè wèwè's ukààdikù mwenzè cintu cimwècimwè aci; twètù bònsò aba's tutu twenza nànkù. Kàdì ncinyi aci? Aci's ndipanga dyà kaneemu. Sòmba panshì. Ntàngila mwanèètù wa balume awu.

¹⁶⁶ Mvwa mûmvwè—mvwa mûmvwè Mwanèètù Neville ùyiisha, nè yèyè ùkaadi mungûmvwè nyiisha dîbà ditùdì mwà, kakùyì mpatà to, ditùdì bafwànyine...Mwanèètù J. T. ewu nè bònsò abu, anyi—nè bònsò abu, tudì mwà kutèeleja umwe nè mukwàbò munkaci mwà kuyiisha, tutu twela meeji nè: “Kaa, mwanèètù, ndi ngèèla meeji nè nènjuukè kuulu bwà kumwambulwishakù.” Nwamònu anyi? Udi ànu umvwa Nyumà ùkupòngòlokela pambidi, kàdì cyùdì wenza ncinyi? Shààla mupùwè. Nwamònu anyi? Bwalu nyumà wa bapròfetà ùdì ùkòòkela mupròfetà. Nwamònu anyi? Ncyà bushùwà, shààla mupùwè. Nwamònu anyi? Enzààyi nànkù.

¹⁶⁷ Kàdì ndi ngèèla meeji nè pìikalà mukàjì awu...Lukonko lùvwa nè mukàjì awu yèyè nè dipà dyà myakulu nè muswè

kwakula, Ndi ngiitabuuja nè pàdi díbà adi dikumbana, ùdi nè bukenji bwà kwakula mu dipà dyà myakulu, kàdi kí mbwà kuyiisha anyi kwangata ku bukolè bukòòkeshi pa mulùme nànsha. Pàdi mukàji mwikàle muiyishi, mu bushùwà bwà bwalu ùdi kumutù kwà mulùme.

159. Mwanèètù Branham, mvwa musèle mukàji kampàndà ukààvwa mumanè kusèdiibwa kumpàlà. Twètù kushipa dibàkà, nè kwambwila mu cikondo aci ùkaadi musèdiibwe misangu yibidi. Bible ùdi wàmba nè twètù tujinga kusèla — twètù tujinga kusèla, bwà kupingana kùdi. . . mukàji wa kumpàlà awu. Mpindyewu, ndikù mwà kwalukila kùdi mukàji awu ukààvwa musèdiibwe kumpàlà awu anyi ndi mwà kwikala mudiikàdile?

¹⁶⁸ Èè mpindyewu, mwanèètù, mùshindù wùm wèpelè wùdiku mufwànyine kucyèenza ngwòwò ewu. Mpindyewu, eci ncyenabwalu cinène, nènku dikwàbò ditùkù ndi—ndi muswè bwà bu—bu èkèleeziyà mwà kulongolodiibwa nè kwakajiibwa mu mùshindù ùvwàye nè cyà kwikala anyi. . . Ndi—ndi ngàmba bwalu ebu nè kaneemu kààbùngì, ndi. . . Kùdi bitùpà bibidì byà dibàkà edi nè difwà dyà dibàkà mu maèkèleeziyà, ewu mmukwàte cìmwè citùpà nè mukwàbò mukwàte cikwàbò. Nènku ku wanyì mmwènenu, mwikàle nè ngàsà mu mwoyi wànyì kumpàlà kwà Nzambì nè Bible Wendè, bònso bàbidì mbapiile. Nwamònu anyi? Kàdi kùdi bulelèlèlè búsanganyiiibwa mwaba awu.

¹⁶⁹ Bu nwènu mwà kumòna cyàkambà Yesù. . . Mpindyewu apa, ndi nè mwanèètù wa balùme, mwanèètù sungasunga wa mu mashi, udi udilongolola bwà kusèla mukàji. Nè mwanèètù ùvwa musèlàngàne kumpàlà nè mulelè mwànà nè mukàji mwimpè. Ke kulwayè kùndi bwà mèmè kuswika dibàkà dyèndè. Mèmè nè: “Nànsha kakesè!”

¹⁷⁰ Yesù wàkamba mu Maatàayi 5 nè: “Ewu yònsò udi wipata mukàjèndè, nè ùsela mukwàbò, pa kuumusha kabingilà kàà masandi à bajikè (àvwàye nè cyà kwikala mwenzè kumpàlà kwà kusèdiibwa awu kàdi kàyì mumwambile bwalu abu to), ùdi ùmufikisha yèyè mukàji awu ku dyenda dyà masandi à babàke: ewu yònsò udi usela mukàji udi mwipata ku dibàkà awu ùdi ùsòmba mu masandi à babàke.” Pa nànkù kwènjikù nànkù to. To, kwèna mwà kwalukila cyàkàbidì kùdi webè—mukàjèèbè wa kumpàlà awu to pùikalàbi nè ùkaadi musèdiibwe cyàkàbidì. Kàdi bu wèwè—yèyè mukubènge nè mukulekèle. . .

¹⁷¹ Pashiishe wèwè kwamba nè: “Ndi mudishikàmìne anyi?” Ngànji ncìbalùlùlèbi. (Mvwa musèle mukàji kampàndà uvwa kacya kàyì mwanji kusèdiibwa kwònsò eku to. Twètù kushipa dibàkà, nè yèyè kusèdiibwa misangu yibidi (Ndi ncinka nè muntu ewu mmushààle mujikè.) Bible ùdi wàmba nè twètù

bajinge kusèlangana bwà kwalukila kùdì...wa kumpàlà awu kàbìdì.”

¹⁷² To, mukalenge! Ndàayi mu mikenji yà beena Lewi mwàmwa. Paùdi walukila kùdì mukàji awu, úkaadi cintu cyà muntu mukwàbò. Udi mudikooyishe nè mudivwijè wêwè mwinè mutàmbe kubìpa kutàmbe dyàmbedi. To, kwena nè cyà kwaluja mukàji ukàavwa mukashààle mukàji wa muntu mukwàbò awu to.

¹⁷³ Mpindyewu nè: “Ndikù mwà kwalukila kùdì ewu ukàavwa mumanè kusèdiibwa awu anyi ndi nè cyà—anyi ndi nè cyà kushààla mudishikàmine anyi?” Wàshàadi mudishikàmine! Shaala mudishikàmine! Èyowà, wêwè kwàlukidikù kàbìdì to. To, mukalenge! Mmusèdiibwe kùdì muntu kampàndà mukwàbò; shààla kule nendè. Ncyà bushùwà! Kùdìdingi...Aci cidi cikooyisha...?... Òmvù's. Bu twìkalakù nè ndambù mukwàbò wa díbà, ncyàkubwelamù to, kàdi ànu bwà lukonko lwèbè cyanààna, mwanèètù wa balùme, nànsha wêwè mwikàle nganyi: To, mukalenge! Kwàlukidikù bwà kwangata mukàji awu to pàdiye musèdiibwe misangu yìbìdì anyi yìsàtù kacya ànu wàsèdiibwa kùdì. Aci ncibi.

¹⁷⁴ Mwawa muswike dibàkà dyà mulùme nè mukàji mwab'ewu kùkaadi matùkù bàkaavwà basèlàngàne kumpàlà, kàdi bashipè dibàkà nè bamwangàngàne, nènku—babàka bàà kale. Èè, bàvwa m'Mwanèètù wa balùme nè Mwanèètù wa bakàji Puckett; ke bóbò abu menemene. Kabàvwa ànu bàpetangana to nè kupetabò dikòkangana dikesè pankaci pààbò; è kushipabò dibàkà. Mukàji wàkashààla ànu nè nsòmbelu wa lulamatu nè mu bujikè ànu nè mwèndè mwònsò, nè mulùme pèndè mùshindù wùmwèwùwè awu. Nè paanyimà pàà katanci, kumònabo mùvwàbo bakùtàkàne, nè kwalukilabò nè kujingabò bwà kusèlangana. Mémè nè: “Bushùwà's!” Nwamònu anyi? “S'bìdì ànu bìmpè, s'ki civwà cikèngela bwà nwènu kwikala.” Pa nànkù bóbò...Èè, bàvwa basèlàngàne díbà dyònsò. Kacya kabàvwakù bânji kushipa dibàkà to; bààkabàpèèsha ànu mikàndà bwà kusòmbelabù pàmwè bu mulùme nè mukàjèndè; kwàjiki, bwalu bàvwa basèlàngàne ku cibangidilu.

160. Måleetà àsàtù àdì pa nkùrusè wa Kàtòlikè awu àdì ùmvwija cinyi? (Tùmonèbi.) Måleetà àsàtù àdì pa nkùrusè wa Kàtòlikè awu àdì ùmvwija cinyi?

¹⁷⁵ Èè, ndi ngèèla meeji nè nkùrusè yònsò yìdì mùmwè, byòbì kabìyì nànkù to...Mbitàmbe bwìmpè mémè kukenketa bwalu abu. Kàdi ùdì nè I-N-R-I cidi cyùmvwija nè “Yesù wa mu Nazàlèetà, Mfùmù wa beena Yuda.” Nwamònu anyi? Piikalàbi nè ke cyòci aci, ncìvwa mumanyè nè bóbò bàvwa nè cintu cikwàbò cyà pa bwàci anyi cintu kampàndà cikwàbò to. Kàdi òwò måleetà awu àdì ùmvwija nè “Yesù wa mu Nazàlèetà, Mfùmù wa beena Yuda.” I-R-N-I, ke cidi pa nkùrusè awu. Èyo.

161. Mbifwànyine kwikala bibi bwà kukwàta mudimu nè byàdiikùmì bu mfrangà yà lwibàku lwà nzùbu wa èkèleeziyà anyi?

¹⁷⁶ Èè mpindyewu, ke—ke kaacilumbu kakesè nkòkò aka bwà èkèleeziyà mpindyewu. To, mu mùshindù mujaalàme byàdiikùmì bìdi nè cyà kuya kùdi mwambi. Ncyà bushùwà! Mu Bible bàvwa nè kashèètè kàvwàbo bàteeka ku ciibi mu Dipungila Dikùlukulu pàvwàbo—munkaci mwà kwibaka. Kashèètè aka kàvwa kàà beela mfrangà yà kulongolola naayi nzùbu. . . Nukàadi bacibalèbàle misangu yàbùngì mu Dipungila Dikùlukulu. Bàvwa bàlongolola nzùbu nè bintu byà mùshindù awu. . . Midimu yònsò yà dilongolola dyà nzùbu adi yivwa mikòweleela kùdi mfrangà ayi. Kàdi cyàdiikùmì cyà yôyi ayi yivwà yiya—cyàdiikùmì cyà byà byàdiikùmì abi—byàdiikùmì byònsò bivwa biya kùdi bakwidi bààbò, bampaasàtā bààbò. Èyowà, byàdiikùmì kabyèna nè cyà kuya ku cintu cikwàbò nànsha cìmwè to.

¹⁷⁷ Ndi mumanyè nè bantu bàtu bàngata byàdiikùmì byàbò nè bàbipèesha mukàjì mukàmbà. Aci ncilemà. Wèwè nè cintu kampàndà cyà kupèesha mukàjì mukàmbà, mupèeshe, kàdi kumupèeshi mfrangà yà Nzambi to. Ayi kī nyèbè wèwè to twamb'eku twamb'eku. Ayi nyà Nzambi!

¹⁷⁸ Wèwè muntùme mu ville bwà kupeta mulungu wà dyàmpà, nè wèwè mumpèeshe meeyà makùmi àbìdì nè àtaanu bwà kupeta mulungu wà dyàmpà, kàdi mèmè kutuutàkèèna nè muntu kampàndà mu mùsèèsù uvwa naayi dijinga. . . cintu kampàndà cikwàbò, nè mèmè mwà kumupèesha meeyà makùmi àbìdì nè àtaanu awu, nwamònu's, s'ndi mumupèeshe mfrangà yèbè. Yèyè mundòmbe cintu kampàndà, àyangàcile mu ewu mpaaya nè ndi mbàpèesha yànyì mfrangà; kàdi's eyi mfrangà nyèbè. Nènku cyàdiikùmì cyàyi aci ncyà Mukalenge. Nènku beena Lewi, bwakwidi abu, bàvwa bàdiila ku cyà dikùmi.

¹⁷⁹ Cyàdiikùmì cìmwè cìdi nè cyà kwikala cyàdiikùmì kampàndà cìdi nè cyà kutwàdiibwa mu nzùbu wa diyeebà nè mulayi wà Nzambi bwà kucibènesha. Nènku cijaadiki, Yèyè wàkamba nè: “Nwènu kanùyi nuciitabuuja to, lwâyì nùNtètè nè nùmòne ní Ncyàkucyènza.” Nwamònu anyi? Ncyà bushùwà!

¹⁸⁰ Byàdiikùmì bìdi bibwela mu èkèleeziyà bwà mpaasàtā nè bikwàbò mùshindù awu bwà kudiilakù. Nènku pashiishe mfra—mfra—mfrangà yà lwibaku nè bintu byà mùshindù awu yidi mfrangà pa bule. Mpindyewu, aci—aci's ncyà mu Mifundu.

¹⁸¹ Musangu kampàndà patwàbangà, ndi muswè kwangata dilòlò kampàndà. . . Ndi muyè mwaba ewu kùkaadi cikondo kampàndà kumpàlà kwà mèmè kuumuka mu tabernacle emu nè kwangata mbingu bu yibìdi anyi yisàtù nànkù awu nè ànu pa byena-bwalu byà mùshindù awu nè kupicila buludì mu cyòci aci nè kuleeja ciwà byàdikùmì mu èkèleeziyà.

162. Mwanèètù Branham, kùdi cintu kampàndà cibì mu kwikala wa mu diswa kampàndà paanyimà pàà twètù bamanè kulwa beena Kilistò, bu mùdì ba-Franc-maçons anyi?

¹⁸² To, mukalenge! Ikàlà mwena Kilistò mwaba wònsò wùdì usanganyibwa awu. Nànsha mwikàle penyi, udi ànu mwà kwikala mwena Kilistò.

163. Mmunyi mùdì udyùmvwa nè ke mùshindù mutàmbe bwimpè wà kupeta Mukalenge. . . Mmunyi mùdì—mmunyi mùdì udyùmvwa nè ke mùshindù mutàmbe bwimpè wà kupeta diswa dyà Mukalenge mu àmwè maalu àà mushinga mukolè?

Mpindyewu, lekèlaayi. . . Ncyèna ngèèla meeji nè ndi. . . Ngǎnjì mmonèbi ní ndi mwà kuumvwa mùyaayàlu. “Mmùshindù kaayi wùdì wumvwa nè ke wùdì mutàmbe bwimpè (Ndi mmòna nè ncifwànyine kwikala kakòselu mwaba awu, ndi ncinka). . . Mmunyi mùdì udyùmvwa nè ke mùshindù mutàmbe bwimpè wà kupeta diswa dyà Mukalenge mu àmwè maalu à mushinga mukolè?”

¹⁸³ Ndi nkwabwila's, mulundà wanyi munanga, mùshindù mutàmbe bwimpè wà kupeta diswa dyà Nzambi mu àmwè maalu à mushinga mukolè ndisambila. Nwamònu anyi?

¹⁸⁴ Mpindyewu, ngǎnjì. . . Kaacintu kakesè kalenga kàà dikèma nkòkò aka mwab'ewu. Bu wèwè—bu—bu wèwè nè bwalu kampàndà bwà mushinga mukolè menemene. . . Mpindyewu, mùshindù wùntù ncyèna ngwòwò ewu. Ndi ncyàngata kumpàlà kwà Mukalenge. Nèku citu misangu yònsò ànu dikàndà dyànyi; ndi ngindila Mukalenge bwà kumòna cidiYe wamba. Nèku ntu ànu ndishìya ànu pankaci pà cyòci eci, nciyi ngàngata ní nduseke kaayi to, kàdi kwamba nè: “Mpindyewu, Taatù wa mu dyulu, cidi—cidi mwà. . .”

¹⁸⁵ Mu bushùwà bwà bwalu mpindyewu, mu bwalu bwànyi misangu yàbùngì, pìikalàbi nè mbyà mushinga wàbùngì, ntu ngindila cikèèna—kumòna. Kàdi bwà bantu bààbùngì, Nzambi kàtu ùkwàta mudimu nè bikèèna—kumòna to. Nànkù ki bwà cinyi, ncitu muswè kunùbela bwà nwènu kwenza nànkù to. Nwamònu anyi? Bwalu cidi ànu bàmwè bantu bàdi nè bikèèna—kumòna nè bàmwè bènza cintu kampàndà cikwàbò. Mwaba wùdì wèwè wenza cintu kampàndà cikwàbò cìndi mèmè nciyi mwà kwenza to, pàmwàpa—mu wèbè mùshindù wà dikwàcila Mukalenge mudimu—ndi ngènza cintu kampàndà cyùdì kùyì mwà kwenza to. Nwamònu anyi? Nzambi ùtu ùkwàta neetù mudimu bishìllàngàne.

¹⁸⁶ Nèku pa nànkù ndi mufwànyine bu ngíkala pa kaaba kèèbè nè nciyi mmòna bikèèna—kumòna byà bifùmina kumpàlà kwà Mukalenge, ndi mufwànyine kwikala ànu mwindile Mukalenge nè kwamba nè: “Mukalenge, mpindyewu Wèwè ùndeejèku cidi

dipàngadika dyà kwangata.” Nè pashiishe, mùshindù wùdi udyùmvwà mulombòdiibwe bwà kucyènzà, díbà adi anjì indilà kakesè, pashiishe indilè ntàntà mukwàbò mukesè, nè kumòna nè mmùshindù kaayì, nduseke kaayì lùdi mweyèmène, mùshindù wùdi Nyumà... Ambà nè: “Mpindyewu, Taatù, munda mwà mwoyi wànyì Wèwè udi mumanyè nè kabyèna nè bwalu to; kàdi ndi—ndi muswè kumanya cy’Údi muswè kwenza pa bwalu abu.”

¹⁸⁷ Mùshindù awu ke wùntù misangu mikwàbò ngènzà bwà masangisha. Ndi ndyùmvwà bu mulombòdiibwe bwà kuyiila elu luseke anyì lwàlwa luseke, pashiishe néndondè njila awu. Ke mùshindù wà kucyènzà ngwówò awu, bwalu cidi mmu disambila díbà adi; wèwè udi wenza nè mwèbè mwónsò.

¹⁸⁸ Nènkù ndi ngiitabuuja cyòci eci, balundà bàànyì, bu mùvwà Pòlò mu—mu Dipungila Dipyadiyà mu matùkù àkaadi mapite awu. Úvwà mucincimika pankaci pàà njila yìbìdì, bwà njila wùvwàbì bikèngela bwà kuyayè. Ke kuditwayè mu njila mubì, nè kupetayè dibìikila dyà beena Màkèdòniyà adi. Kàdi ndi ngèèla meeji nè wèwè wangata dipàngadika bwà Nzambi nè udyènzà nè mwèbè mwónsò, Ndi ngèèla meeji nè Nzambi neàkulongòlòlè nè kàyi—neàtabaleelè bwà kwènji cilèma to. Ndi ngiitabuuja nè Nzambi neàcyènzè.

164. Tùmonèbì. Mwanèètù Branham, cidi cyènzekelà bantu bàdi—bàdi bàbadiibwa bu baavirgò bakùtākāne pādibo bālumbulwishiibwa ku cilumbulwidi ncinyi?

¹⁸⁹ Èè, virgò mukùtākāne awu neàsungidiibwè mu bushùwà bwà bwalu. Yèyè neàsungidiibwè ku cilumbulwidi. Kàadyàkwikala Mukàji—musèla to, kàdi m’musumbà musungidiibwe wà bantu bìikalà nè cyà kupicila ku cilumbulwidi, bìikala kabàyi mu Mukàji—musèla nànsha. Kàdi pàcidibo ànu baavirgò, bàdi kumpàlà kwà Nzambi. Nwamònu anyi? Bìkèngela bàsungidiibwè. Údi ùtāpulula... Bòbò nebiikalè mikòòkò ku luseke Lwèndè lwà dyàbalùme. Nè bàdi kabàyi basungidiibwe abu ke bìikalà mbuji ku dyàbakàji Dyèndè ku Cilumbulwidi cinènè cyà Nkwasa Mutòòke.

Ndi mufwànyine kupicishila díbà dyàbùngì pa cyòci aci, kàdi ndi—díbà dikaadi dyènda dipita ndambù.

165. Bidi mwà kwenzeka bwà muntu mùle tètè nè Nyumà Mwímpè kufikishiibwayè ku—kufikishiibwayè ku—ku dyenza dyà bintu bikesè...kusàkiibwayè bwà kwenza tuubintu tukesè—tukesè tùdiye kàyi muswè kwenza anyi?

¹⁹⁰ Kaa, èyowà’s! Èyowà’s, mukalenge! Èyowà’s, muntu mùle tètè nè Nyumà Mwímpè. . . Udi díbà adi ànu mu mwaba mene bwà kwikala—bwà kwikala musàkiibwe kùdi bintu ebi. Udi ànu mudizànjike bu cintu cyà kuludikila miketa. Paùdi kwínshì kwàka munkaci mwà kukwàcila dyabùlù mudimu, yèyè ùdi ànu ùkulekela wenda ulalakana mùshindù wónsò wùdi muswè kwikala awu; Kàdi paùdi ànu utwà ku cyà Kilistò, udi mwimàne

ku luseke lukwàbò díbà adi, ùdi ùludikila bingoma byònsò ànu pa wêwê. Butèyi bònsò, cintu cyònsò cívwa mwà kukùpiibwa kùdi aci, díbà adi cidi cikuvwila. Kàdi cyùdi wêwê naaci ncinyi? “Ewu udi munda mwèbè mmunène kutàmba ewu udi mu buloba.” Nwamònu anyi?

¹⁹¹ Mpindyewu, kùvwa mu mvità nànsha yimwè mwab’ewu to, uvwa ànu munkaci mwà kupweka matelu. Nwamònu anyi? Kàdi mpindyewu, udi nè—udi musukùle; udi mulwàte; udi mudikungwishe mwedi; udi musaamùne nsukì yèbè; udi ulwàta nsukùtù; udi nè cingoma mu cyanza cyèbè. “Tùyaaku!” Nwamònu anyi? Wêwê udi mu mvità, kí mbwà kudíleeja to, kàdi bwà kulwangana, lwangàna mvità! Bushùwà pàdi mateeciibwa àjuuka, nè Nyumà, ngabu wa diitabuuja, àpusè ku luseka, nè tūngunuka nè kuya kumpàlà. Nwamònu anyi? Ncyà bushùwà. Kaa, vwàlaayi byà mvità byònsò nkòòng byà Nzambì. Bwà cinyi nudi nulwata byà mvità panwikalà kanùyì nukalwangana mvità? Māsàlaayi ónsò mmavwàdika bwà kulwangana mvità, kí mbwà kudíleeja, kupàtuka kwamba nè: “Mémè ndi *Kampàndà*. Mpindyewu, mémè ndi mwena Kilistò. Tàngilàayi cindi mémè. Ndi wa mu *cikampàndà*. Àlèluuyàh! Mwva mupetè Nyumà Mwimpè dilòlò adi. Cyà bushùwà, kakwèna kàbidi cintu nànsha címwè cìntàcisha to.” Huh-uh! Kaa, mwanèètù, ndi—ndi ngiitabuuja nè mbimpè ùpinganè ùkateetè cyàkàbidi. Nwamònu anyi?

¹⁹² Kaa, ndi nkwambila nè, paùdi ànu wamba nè udi nè Nyumà Mwimpè; Sàtaanà ùdi nè cingoma cyònsò cikutàngija ànu wêwê, ùkukùma. Díbà adi udi muvwàle byà mvità byònsò nkòòng, díbà adi angàta ngabu wa diitabuuja, mwelè wà mvità wà Nyumà anyi Dìyì, nè swika mu—mukàbà—vwàla wêwê mwine bisàbaatà byà Èvànjeeliyò, nè ambùlaayi cibwikilu cyà kale cyà munkaci eci, cibwikilu cyà pa cyàdi, nè kòkapù mukàbà, nè dišwikewù bikolè ndambù nè dilongòlole bwà cyòci aci, bwalu cìlwalwa. Kùditàcishi to. Èyowà’s, mukalenge! Neùpete lutàtù lwàbùngì. Kàdi vùlukà nè: “Ewu udi munda mwèbè mmunène kutàmba ewu udi mu buloba.”

166. Yesù ùvwa ùswa kwamba cinyi mu Maatàayi Munsantu 16.9 nè 10? Bisakà dikùmi nè bibidi nè bisakà mwandamutekète bidi bileeja cinyi? Lukonko bwà mu dyàlumingu mu dindà.

¹⁹³ Twänjìbi kumòna—twänjìbi kumòna, Maatàayi 16.10. Ncyèna mutwishiiibwe menemene mpindyewu mene to. Lekèlaayi mfikè mwaba wùdici, Maatàayi 16.9 nè 10—16.9 nè 10. Mpôpò apa.

Kanwènakù...nuumvwa, nànsha nuvùluka mampà àtaanu anyi bantu binunu bitaanu, nè bångi kaayi bwà bisakà binwàkangula?

Nànsha mampà mwandamutekète anyi bantu binunu binaayi, nè búngi kaayi bwà bisakà binwàkangulà?

Mpindyewu tàngilàayi. Twánjàayi kwangata ànu kakesè ndambu kumpàlà kwà cyòci eci.

Nè Yesù wàkabàmbila nè: Nwàtabalelaayi bwà nwàdimukila lwevènyì lwà Baafalèsè nè lwà Baasàdokà.

Ke kulukakajabò lungènyì munkaci mwàbò, bamba nè: Mwalu katwèna bangàte dyàmpà to.

Yesù... (Mpindyewu tàngilàayi!)... Cìnè aci pàakajingululà Yesù,... (Yèyè wàkabàkula meeji àbò, nudi numòna's)... wàkabàmbila nè: Èyì nwènú beena diitabuuja dikesè, nudi nulukakaja lungènyì munkaci mwènú bwà cinyì, bwalu kanwèna balwè nè dyàmpà anyi?

Kanwèna... nuumvwa, anyi nuvùluka mampà àtaanu nè bantu binunu bitaanu, anyi nè mbitunga búngi kaayi binùvwa bangùle?

¹⁹⁴ Mu ngaakwilù mukwàbò bu nunku ewu: “Wèwè mumòne Nzambi ùfila nè wènta cishimà, díbà adi Yèyè kèna mwà kwenza cishimà kàbìdì anyi?” Nwamònu anyi? Nwamònu’s, bu... Mu ngaakwilù mukwàbò, nunku ewu: PìikalàYe mmùkusùngile ku nsòmbelu wa mpèèkaatù, Yèyè kèna mwà kwondopa mubidi wèbè anyi? Kwènakù uvùluka paùvwa ngènzàmpèkàatù mwàkabàndishàYe musùukà wèbè mu diitabuuja bwà kwitabuuja anyi? Kènakù Yèyè byàmòmùmwè mwà kukwenzela cintu kàmpàndà cyà cinène kabìdì anyi? Yèyè kèna mwà—Yèyè kèna mwà kwenza cishimà anyi cintu cikwàbò kanà cyònsò bwèbè wèwè anyi? Bisakà bitaanu... Yèyè nè: “Vùlukaayi...”

¹⁹⁵ Bu mùdì... Pàakasabukàbo Mbù Mukùnze, Nzambi wàkapenga njila mùshindù awu nè wàkakangula Mbù Mukùnze mùshindù awu, nè kupicilamù, yèyè kulwayè dyàkàmwè luseke lukwàbò, nènkù mbenzè ànu bàpangila màyi anyi, è kutwàdijabò kunungana. Ncyà bushùwà anyi? Mbenzè ànu bàpangila dyàmpà kubangabò kwela mbilà mikolè nè: “Katwèna nè dyàmpà to.” Nwamònu anyi?

Yèyè nè: “Kanùvwa batàbàlèèle cishimà cyà ku Mbù Mukùnze aci anyi? Kanwàkasabuka, panwàkabwelà bònsò mu kantu kaluka ku Mbù Mukùnze anyi?”

“Kaa,” mwàkambàbo, “S’bìvwa bitùkèngela kwikala bafwè. Ke beena Èjiipitù bàlwalwà kudyèla pambidi pèètù aba mpindyewu. S’kì cyòci eci; citwènta ncinyi?”

¹⁹⁶ Yèyè nè: “Nganyì wàkatuuta buloba nè bipùpu kuntu kwàka? Nganyì wàkalekela díbà dikenka mu Goshènè?” Nwamònu anyi? Tudi nè cyà kuvùluka bintu abi, vùlukaayi nè Nzambi ùdi Nzambi! Alèluuyàh! Cyònsò cyà ku cyòci aci, Yèyè ùcidi ànu

Nzambì. Ncya bushùwà nè Yèyè ùdi mwà kwenza cintu kanà cyònsò.

167. Bu wêwè mwà kuswà udikù mwà kuumvwija “Mubidi wà Kilistò” mu Kolintò wa Kumpàlà 12.27 nè “Mukàji-musèla wa Kilistò” mu Bwàkabuulwibwà 2.9–9. Yelusàlèma mupyamùpyà ngwa nyumà kaaba aka mu—ngwa nyumà kaaba aka mu Bwàkabuulwibwà emu anyi? Eci cidi—cidi—cidi dijingulula dyà nyumà dyà Èkèleeziyà anyi?

¹⁹⁷ To! Mpindyewu, twänjàâyibi kumòna ní ndi mufwànyine kwanji kwangata eci dyàmbedi mpindyewu, Kolintò wa Kumpàlà, lùkàsàlùkàsà, Kolintò wa Kumpàlà nshapità wa 12, èyo, ku mvensà wa 27.

Nè nwènù nudi mubidi wà Kilistò, nè bidimba pàà nkààyenù.

¹⁹⁸ Nè pashiishe, Mufundu wùdi wùlondà wùvwa penyi? Bwàkabuulwibwà 2—21.9, Bwàkabuulwibwà mu nshapità wa 21 ku mvensà wa 9. Èyo, kàdi's ke twètù aba.

Ke kulwaku—ke kulwaku kùndi umwe wa ku banjèlò mwandamutekète bàvwà nè mpànza mwandamutekète myùle tètè nè bipùpu mwandamutekète byà ndekeelu, nè wàkayiiikila naanyi, wamba nè: Banda kùnweku, nènku nènkuleejè mu—mu—nènkuleejè mukàji-musèla, mukàji wa Muàna wa mùkòòkò.

¹⁹⁹ Èyowà, Mubidi wà Kilistò. Nwamònu's, mubidi wà Kilistò wàkacibudiibwa bwà mpèkaatù yètù nè ku Nyumà umwe nkutùdi bònsò babàtìjiiibwe mu Mubidi awu nè balwè bidimba. Kàdi nkwepi kùvwà—nkwepi kùvwà mu—mubidi... Nkwèpi kùvwà mukàjàanyi, mu kwakula mu cimfwànyi... Evà mmufùmine penyi? Mubidi wà Adàmà. Wàkangaciibwa ku lubadi lwèndè. Evà wàkangaciibwa ku lubadi lwà Adàmà. Kilistò... Nè yèyè ùvwa citùpà cyà mubidi wèndè. Yèyè nè: “Mmusunya wà ku musunya wànyi nè mufùbà wà ku mifùbà yànyi. Kàdi mémè nèmmbiikilè nè mukàji.” Nwamònu anyi?

²⁰⁰ Mpindyewu, nè Mubidi wà Kilistò wàkangaciibwa ku mubidi wà Yesù, bwalu tudì nyumà nè musunya nè mufùbà byà ku Yèyè. Nwamònu anyi? Bwalu tudì balediibwe mu Mubidi Wèndè. Nènku bwalu mubidi ewu ngwèndè Yèyè, nànsha nànkù mmulediibwe mu mpèkaatù, Yèyè ngudi muwùpikùle. Nzambì neàwùjuulè ku matùkù à ndekeelu, nè mémè nèngiikalèmu nè mwoyi bwà cyèndèlèlè. Nwamònu anyi? Ki cyòci aci. Èyo.

²⁰¹ Mpindyewu, twänjibi kumòna, lukonko lwà ndekeelu elu lùvwa nè: “Yelusàlèma mupyamùpyà ngwa nyumà anyi?” To, to, Yelusàlèma mupyamùpyà wakamòna Yone ùlwa ùfùmina kùdi Nzambì mu Dyulu awu; kî ndijingulula dyà Èkèleeziyà mpindyewu to. Nudi numòna anyi? Cidi—cidi—mu... Yelusàlèma mupyamùpyà wàkamòna Yone ùpweka ùfùmina mu Dyulu mulongolola bu—bu Bwàkabuulwibwà

21 (nwamònu anyi?)—mulongolola mùdì Mukàji-musèla mulengejila Bàyendè. . .

Lukonko lwà ndekeelu mpindyewu; ngèèla meeji nè ke yònsò yìvwàku ayi.

168. Bible ùdi wàmba nè byònsò bìdì bikwàta mudimu bwà dyàkalenga dyà aba bàdì banangè Mukalenge. Dìbà adi wèwè munangè Nzambi nè mwalùkile ku maalu àa pa buloba, Nzambi mmufwànyine kukulekela ufwà mu mpèkaatù anyi mmufwànyine kukulekela upungishangana Nendè kumpàlà kwà kukuumushaYè?

²⁰² Inàbànzà awu mmufùndepù dìnà dyèndè, pa nàнку ndi mufwànyine kwamba nè ùvwa i—inàbànzà (nwamònu anyi?), bwalu mmufunde dìnà dyèndè. Èyowà's, Mwanèètù wa bakàji. Pawikalà mulediibwe. . .Mpindyewu, lekèlè ngùmvwijè eci. Nwamònu's, bwà katùpà kípì, kantu kakesè, muntu nè muntu wa kutùdì ùdì ùtwa cimpingà misangu yàbùngì ku ditùkù. Tudi bamanyè nàнку. Tudi bònsò bapiile, yònsò wa kutùdì; kakwèna nànsha umwe wa kutùdì udi mupwàngaja to. Nèнку patùcìdì ànu mu mubidi ewu, tucìdì ànu. . .Nànsha bantu bateete kwamba bishi, "Ndi mujidiibwe; ndi mwà kutwà mukàji ewu mishiku anyi kwenza nàнку." Ùdi ùshima; kèna mwà kucyènta to. Mpindyewu, ki cyònsò cìdiku.

²⁰³ Ncyèna nteeta kwamba nè: "Mukalenge, enzàku mmonè nè ntoo nè mwaba kaayi wùndì mwà kuseemena to". Kàdi cìdì nè: "Mukalenge, ndamèku kule nè mwànyì mwònsò." Nwamònu anyi? Shààla wèwè ànu kule menemene nè. . .Vùlukà nè, wèwè ucìdì ànu muntu. Nwamònu anyi?

²⁰⁴ Nèнку. . .Kàdi mpindyewu, wèwè mwenzè cilèma nè mwenzè cintu kampàndà cyà cibì. . .Kwèna mucyenzè ku bukolè to. . .Pawikalà mwena Kilistò, pawikalà mwena Kilistò mulediibwe cyàkàbìdì, kwèna nè meeji à kwenza bibi ku bukolè to. Tubingila twèbè nè byònsò mbìmpè. Kàdi wèwè mwenzè, mùdiye mwambè kaaba aka, mwenzè cilèma nè mwenzè cintu kampàndà cyà cibì, Nzambi neàkulekèlè ànu utùngunuka ànu kutùngunuka ufwà nè kufwà mùshindù awu ujìmina nè kujìmina, anyi Yèyè neàkwalùje ku dipungishangana? Yèyè neàkwalùje. Ncyà bushùwà! Yèyè neàkwalùje.

²⁰⁵ Nèнку pìikalàbì nè—nè dībà adi, wèwè wenza cintu kampàndà cyà cibì, kaciyi cikupìisha nè wèwè kutùngunuka ànu mùshindù awu, upàtuka uya, vùlukà nè, kùvwa musùngìdìibwè ku cibangidilu aku to. Ncyà bushùwà. Wèwè—wèwè kùvwa—wèwè kùvwa musùngìdìibwè to; uvwa wèwè ànu nè diitabuuja dyà budìngìbudìngì; kùvwa musùngìdìibwè to. Kàdi paùdì musùngìdìibwè, udi nè nyumà mushiilàngàne; udi ngiikàdìlù mushiilàngàne. Udi cìfùkìibwà cipyacìpyà mu Kilistò, nè bintu byà kale abi mbìmanè kupìta, nè byòbì mbìfwè nè bijiikìibwè mu mbù wa cipwàmwòyi. Nudi numòna anyi?

206 Nènku... Kàdi bu mùdìbì nè wêwê udi nè mwoyi pànu pa buloba ebu, kùdi matèyi makwela myaba yònsò, nè udi wenda nè mèsù èbè matàngija pa Kilistò. Nènku vùlukà nè, paùdi wenza cilèma, mwena Kilistò mulelèlè neikalè misangu yònsò ànu wàlukila lùkàsà bwà kupungishangana.

207 Tàngilàayi, mu bwàtù Nzambi wàkalekelela cikòlòlò cyà kale aci—anyì Noà wàkalekelela cikòlòlò. Mpindyewu, yèyè ùvwa cinyi? Yèyè ùvwa cikòlòlò. Kaa, èyowà's, cyàkasòmba pa ditàmbà ànu dyòdi dimwèdimwè adi mwaba awu pàmwè nè nkuci. Bùbìdi bwàbì bìvwa bisòmbè pa ditàmbà dimwèdimwè adi; kàdi pàakapàtulàye cikòlòlò cyà kale aci, èè, cyà kale aci... Ndi ndìfwànyikijila nè màyi ònsò àvwa ànunka nè miliyò yà mibidi yà bantu bàvwà bùlè babolè pamutù pàà màyi, nè tubalù nè nyama bifwè byònsò. Buloba bujimà bwàkabutudiibwa. Nènku's ki bòbò abu, bitàlù byà kale bibolè ebi bilèlème pamutù pàà màyi nè bintu byà mùshindù awu. Ke Noà kulekelelaye nkuci pambèlu, bwalu ùvwa ùcinka nè ùvwa mumòne ndambù wa bukènkè bwà dibà. Nènku ùvwa muswè kumanya nè màyi ní àvwa mapwèke anyi to, pa nànkù è kulekelelaye ci—ci—cikòlòlò. Ke cikòlòlò cyà kale aci kupònaci pa mubidi wà kale mufwè nè: “Èkélekèlè, ànu bìmpè's; abi's mbìmpè!” Nwamònu's, cìdya mubidi mufwè. Bwà cinyi? Aci ke civwà ngiikàdilù wendè. Yèyè ùvwa cikòlòlò. Nànsha yèyè musòmbè nè nkuci bìshi, nànsha yèyè mwà kuumvwa Noà ùyiisha bìshi, nànsha yèyè musòmbè ntàntà bule kaayi nè nyuunyi mukezùke ewu, yèyè ùvwa cikòlòlò ànu kwònsò aku. Mmwenzè ànu ùpeta mpùngà wa kuleeja meekala èndè, yèyè è kuàleeja.

208 Mpindyewu, kàdi pàakalekelelaye nkuci awu, pàakayàye, yoyòyò, yèyè kàvwa mwà kutwàla aci to. Kakùvwa mwaba nànsha wùmwe wùvwàyekù mwà kuya to; kàvwakù mwà kupeta mwaba wà kutèeka bidyacilu byà makàsà èndè to, ke kwalukilayè ku bwàtù. Nènku mùshindù awu ke wùdìbì.

209 Misangu mikwàbò udi mufwànyine kwikala musùlùdìibwe bwà katanci kakesè bwà kumòna cyùdi mufwànyine kwenza, kàdi newikalè misangu yònsò wêwê nè ngiikàdilù wa nkuci, kwèna mwà kudyà cyàkudyà cyà cikòlòlò to. Kwàjiki, kacyàkuingutukakù to; kwàjiki.

210 Nkwèpì kuwikalà mwà kuya, ncinyi ciwikalà mufwànyine kwenza? Ngambilè tũng cyùvwà mwà kwenza bu wêwê mwikalè—bu wêwè kùyì mwena Kilistò nànsha! Ngambilaaku tũng cìndì mufwànyine kwenza mu dindà emu bu mèmè ncìyì mwena Kilistò to! Ncinyi cìmvwà mwà kwenza mu dindà emu nè mààmù wanyì mulààle kuntu kwàka mu lùpitaadi mu ngiikàdilù udiyè ùsanganyibwa awu nè kàyì mwà kudìmanya pàdiye mulààle kuntu kwàka, nè mu mwoyi wànyì mvwa mwà kwimana mwab'ewu mu cyambilu emu kàdi è kuyiisha, nè kuya mu mùshindù wùndì nya ewu, bidi bimwèka ànu bu nè ncyènà nkùtùma ntèmà bikole to? Bwalu ndi mumanyè nè

mààmù wanyì mmusùngìdìibwe. Nwamònu anyì? Ndi mumanyè nè yèyè mmusùngìdìibwe. Ndi mumanyè Ûndì mwitàbùùje; ndi mutwìshìibwe nè Yèyè ùdi nè bukolè bwà kulama cìndì muMupèèshe too nè ku ditùkù adi.

²¹¹ Mpindyewu ncinyì cìvwà Maman mufwànyine kwenza? Mpindyewu, pàmwàpa ùvwa nè meeji à kwenza bîmpè matùkù èndè ònsò à mwoyi, nè “Dìngà ditùkù nèngìkalè mwena Kilistò.” Kàdi mmunyì mùvwàye mufwànyine kwenza nànkù mpindyewu pàdiye mulààle mwaba awu kàyì mudìmanyè apu? Mmunyì mùvwàye mufwànyine kulwa mwena Kilistò mpindyewu? Bàna bèndè mbafwànyine kwenza cinyi?

²¹² Dìnga ditùkù patwàkamutèkà—patwàkamupàtulà bwà kumwela màyi à nsùkaadi kuntu kwàka. . . Ke cintu cìmwèpelè cìdiye naaci mu mubidi wèndè mmàyi à nsùkaadi. Yèyè kènà mwà kumina cintu to; mmutekètèle panshì. Ke yèyè nè: “Ndi njinga bwà ùmanyè cintu cìmwèpelè eci, Billy,” yèyè kwakula bwànyì mèmè nè Delores udi mwimàne mwaba wàwa nàka, nè bwà bàna bèndè nè bikwàbò, nè ndambù wa bàna bèètù bàà balùme bânwanwà maalà.

Ke mèmè kwamba nè: “Èè, mbakucibùle mwoyi wèbè wà munda.”

Yèyè nè—yèyè nè: “Kàdi Billy, byònsò abi bìdi nkasuba kàà maamù.” Yèyè nè: “Kàdi ndi musùngìdìibwe.” Nè kwambayè nè: “Ndi mudìlongòlòle bwà kuya.”

²¹³ Mèmè nè: “Maman, uvwa mufwànyine kwikala mutùshìile nzùbu mwalàbàle kuumukila mu Jeffersonville emu too nè ku Utica, nzùbu wa bukalenge; uvwa mufwànyine kwikala mutùshìile mìlìyò dikùmi yà ndola yà kukòkelanganapù nè kulwangeena mvità paanyimà pàà wèwè mumanè kuya (aci’s ke cyònsò cìvwà nè cyà kwikala ciyenzèkèle); kàdi Maman, udi utùshìila bubanji butàmba bunène bùvwà muntu kanà yònsò ewu mwà kushìya, di—ditwìshìibwa dyà nè netùkumònè cyàkàbìdì mu Buloba bwà dyàmwàmwa dyà musùlu abu.” Ncyà bushùwà! Nwamònu anyi?

²¹⁴ Udi musùngìdìibwe, nè ndi nè disànkà dyàbùngì dyà kumanya nè Kilistò ùdi ùsùngila wètù. . . Kàdi twètù tudì mwà kutwà cìmpìngà; tudì mwà kwenza bibi; tudì bònsò nè mabika nè mala; kàdi mu musùkà wèbè paùdì ànu wenza cintu kampàndà, ee, kùdi cintu kampàndà cibì mu wèwè amu; udi mumanyè nè ke mùdìbì. Mpindyewu, ànu mwaba awu ke díbà dyà kutùpika. Ke díbà ndyòdì adi, dyà kutùpika. Uumùkàku.

²¹⁵ Mpindyewu, twàmbè nè udi upàtuka mwab’ewu leelù ewu, nè—nè muntu kampàndà ùlwa kùdì wàmba nè: “È, s’batu bangambilà nè wèwè ewu udi umwe wa ku bansantu babùnguluki bàà mu malaba abu.”

Dyàkàmwè nè lùkàsà lònsò, Sàtaanà ùdi wàmba nè: “Mupyàndà panshì!” Nwamònu anyi?

216 “Ncyeña mumanyè nè ndi munsantu mubùnguluki wa mu malaba to; ndi mwena Kilistò!” Nwamònu anyi? Nènkù misangu yònsò ànu nè bubi, twilangana nè bubi nè bwimpè. Nènkù vùlukaàyi nè, mpindyewu angàtaayi ànu eci, vùlukaàyi eci nè, panùdi nutwilangana nè bubi nè maalu mimpè, bubi kabwèna mwà kwimana mu bwikadi bwà bwimpè to. Kabwèna mwà kucyènzakù to.

217 Mpindyewu, mèmè ndi mpàndànjlà, nè ndi munyùngùlùke buloba bujimà, mu maalu mabi à mishindù yònsò, nè beena lubùkù bàà mishindù yònsò, nè tusumbù, nè dikuukwila dyà dyabùlù dyà mishindù yònsò, nè, kaa, bintu byònsò bìdì mwà kwelakù meeji, mwaba wùdì bintu byònsò, nè ntu musangàne misangu yònsò nè bwakàne bùtu ànu bùcimuna bubi.

218 Tèèlejàayi, nànsha bufùkù bwikàle bwà mifitù yà mùshindù kaayi; mmifwànyine kwikala mifitù yà menemene mu mùshindù wà kùyiku mwà kuyùmvwa to; udi mufwànyine kwela byanza muulu mùshindù ewu kàdi kùyi mwà kumòna mundidimbì nànsha wa kànà to. Kaabukènkè kakesè kàà katàmbe kushàadia nekàpatwilè mîdimà ayi patòòke. Cyà bushùwà, ke mùshindù wùdì mwoyi wènza mu bwikadi bwà lufù ngwówò awu. Ke mùshindù wùdì bwakàne bwènza mu bwikadi bwà bubi. Mùshindù awu ke wùdì diitabuuja dyènza mu bwikadi bwà mpatà, didi dìyìtangalaja.

219 Mmuniyì mùdì bufùkù mwà kushààla apa pàdì díbà dyèla nsèsè yààdì yà mabènesha? Bufùkù bùdì bùyà penyi? Kabùcyènakù kàbìdì to. Ncinyi cìdì cyènzèkèle bufùkù? Mîdimà ayi yìdì penyi yìvwà mu tabernacle emu kùkaadi mēbà matwè ku dikùmi nè àbìdì? Mîdimà yìvwà mikùngwile munda mwà bimanu ebi mwab'ewu yìdì penyi? Kayènakù kàbìdì to. Mmijimine. Bwà cinyi? Bukènkè bwàkabwela. Nènkù pààkabwelà bukènkè, byàkakèngela bwà mîdimà kuyayi. Èyowà's, mukalenge!

220 Udi wangata bifùkùibwà bìdì byèndakanà bufùkù, mpènzù, nè bijàngalàlà, nè byupù nè bikwàbò. Díbà dìjuukè anyi bukènkè bwelè nsèsè, mònaayi mùdìbì byàsa lubilu bitàngila ku mifitù. Ke mùshindù wùdì Èvànjeeliyò. Pàdìbu bùpenya, cìdì cyènzekela aba bàdì baswè kukubùikila nè munsantu mubùnguluki wa mu malaba abu ncinyi? Ncinyi cìdì cyènzekelà bantu bàdì bàkwelulwila abu? Pàdì Bukènkè bùpenya, bàdì bànyeemena ku mîdimà nè mwàbù mwònsò, bwalu bôbò—bôbò mbànà bàà bufùkù. Kàdi bânà bàà ditùkù bàdì bèndela mu Bukènkè.

221 Nènkù díbà adi tudi bânà bàà Bukènkè ku ngàsà wa Nzambi. Pa nànkù pàdì Bukènkè bùpenyè, tudi twela Nzambi twasàkidila nè twenda nè mèsù ètù makàngula, batàngile ku bintu byùdì kùyi mwà kumòna nè dísù dyèbè dyà mubidi adi to. Bwalu diitabuuja ndilenga dyà bintu bitèkemena, cileeeji cyà bintu bìdì kabiyi bimwèka nànsha. Amen! Ndi munangè aci.

222 Ncyèna mupete dîbà bwà kaadiyiisha kàànyì kakesè kâmvwà nè cyà kwakula to, bwalu netwikalè nè cyà kusambidila babèèdi.

223 Mbanganyì bàdi banangè Mukalenge? Amen! Mpindyewu, paanyimà pàà twètù bamanè kupeta nkonko eyi, nènku kùdi yimwè yàà ku yôyi mitwè ngwengwengwe nè bikwàbò byònsò, nè pàmwàpa kuyàndamuna... Pàmwàpa ncivwa nànsha mwênzè mudimu mujalàme pa yôyi to, bwalu ncivwa mupetè dîbà dyà kutàngila Mifundu to. Mvwa mwà kwikala muyifunde pa kabèji bu mèmè naadi. Ndi ntèkemenà nè bantu bònsò mbasànkishiibwe. Kabiyyi nànkù to, mòna's, yifundùlùlaayi cyàkàbidi. Lekèlaayi mpetèku dîbà dyà kuyilonga panwikalà nwela meeji nè ncivwa muyandàmùne mu kaabujimà nànsha.

224 Twasàkidilaayi bwà dishààla. Nènku mpindyewu, netwikalè mwà kwelesha mulongo wà babèèdi mu katanci kakesè emu. Kàdi kumpalà kwà twètù kwenza nànkù, twánjàayi ànu kushintulula cyuyüya aci mpindyewu cyà kuumukila ku mandamuna nè ewu wàndamuna eci nùnkù, nè ewu wítabuuja mùshindù kampàndà nè mùshindù kansanga. Nudi numòna's, mu dyandamuna dyà nkonko, misangu mikwàbò mmikolè ndambù, pa nànkù tukuukwilàayi ànu Mukalenge nè twìmbàayi.

Ndi muMunangè, ndi muMunangè
Bwalu Yèyè wàkannanga kumpalà
Nè wàkampetela lupàndu
Ku mucì wà Kàlvaryò.

Mpindyewu, ndi muswè bwà nùlabulanganèku ku cyanza nè muntu kampàndà udi ku luseke lwèbè mpindyewu patùdi twimba cyàkàbidi apa.

Ndi muMunangè, ndi muMunangè
Bwalu Yèyè wàkannanga kumpalà
Nè wàkampetela lupàndu
Ku mucì wà Kàlvaryò.

Mpindyewu, twèlàayi ànu byanza byètù muulu kùdiYe mùshindù ewu.

Ndi...

Tùbwitàayi mèsù mpindyewu.

...munange..., ndi muMunangè
Bwalu Yèyè wàkannanga kumpalà
Nè wàkampetela lupàndu
Ku mucì wà Kàlvaryò.

225 Taatù wetù wa mu Dyulu, tudi baKunangè, Mukalenge. Nè ndi ngítabuuja nè kasumbù kakesè aka nkaKunangè. Tudi tupweka ku nzùbu wa Nzambi udi nè mwoyi, nzùbu mukèsè, kî n'nzùbu to, kàdi Nzambi udi musòmbèle mu nzùbu amu awu. Byenze bu mu mèmè mwinè, mubidi wa kale ewu, newikalè nè cyà kumata òmwè dyà ku matùkù àdi panshi aa, kàdi muntu

udi nè mwoyi munda mwèndè awu kèna mwà kudishindakù to, bwalu mmulamibwe kùdì bukolè bwà Nzambi.

²²⁶ Nzùbu wa kale utùdì tukuukwilamù mu dindà emu ewu, nànsha twètù bamulongòlòle bishi, dîngà ditùkù neàmàtè, kàdì Nzambi Udi musòmbèlè mu nzùbu awu ngwa cyendèlèlè. Tudi tulwa bwà kutwilangana Neebè mpindyewu, Taatù, bwà kwela twasàkidila nè kutumbisha.

²²⁷ Nènku bwà nkonko eyi yidì pa myoyi yà bantu, tudi tumòna nè bàvwa bàdyèla nkonko nè bìvwa bikèngela kwenzabo *cikampàndà* anyi *cikansanga*. Nènku, Taatù, ndi mutwishibwe nè mu mwoyi wà mwena Kilistò yònsò wa dinanga dyandamuna divwa mu mùshindù wà difwànyine kubàfikisha ku dyumvwa cìvwa Bulelèlè. Enzàku nàku, Mukalenge. Nènku mèmè mupangile, dîbà adi mfwilèku luse. Ncìvwa nè meeji à kupangila to, bwalu mbànà Bèèbè, nè bôbò ke bàdì bèèla nkonko ayi. Nènku ndi—ndi muswè kubàpèèsha byònsò bìndì mumanyè, Taatù, byenze bu nè Wèwè uvwa mwimàne mwab'ewu mene bwà kundumbulwisha ku bìndì mwàmbè.

²²⁸ Mpindyewu, Mukalenge, tudi tulwà kutwilangana nè babèèdì. Mpindyewu, tudi bamanyè nè mu Bible tudi tupeta ànu bitùdì twitabuuja nè tudi tupeta abi. Tudi tuvùluka nè musangu kampàndà, Taatù, pàvwa Yesù pa buloba apa, mukàjì mwena Syrophénicie kulwa kùdì Ye nè kwamba nè: “Mukalenge, ikàlàku nè luse kùdì mwanàanyì wa bakàjì, mbwalu ùdì ùtácishibwa bikolè menemene kùdì—kùdì démon.”

Kàdì tudi tuumvwa cyàkambàYe nè: “Kí mbikùmbàne bwà mèmè kwangata dyàmpà dyà bânà kàdì kudipèèsha tubwà to.”

²²⁹ Kaa, Nzambi, mùshindù mwinè wàkamwènekabi ànu bu dibèngà dyà—dyà munu mwosha mwiku, nè kî ng'ànu aci to, kàdì kumubiikila nè kabwà. Kàdì pamutù pàà kwikala nè dyambu pa bwalu abu, nè kalolo kònsò nè kudipwekesha kònsò yèyè kwamba nè: “Aci ncilelèlè, Mukalenge.” Bwalu cìvwa Bulelèlè. Kwambayè nè: “Ncilelèlè, Mukalenge, kàdì tubwà netùdye nkòtòtò yidì yimata ku meesà à bamfùmù bàatù.” Aci ke cyàkènzà mudimu. Úvwa muswè ànu bwà kwangata nkòtòtò yìvwa yifùmìna ku mèèsà à bânà. Nènku Nzambi, ke lwidì lwètù ndwòlò alu mpindyewu mene. Tudi baswè cintu kanà cyònsò cy'Údi muswè kwenza neetù, Taatù. Tudi mu byanza Byèbè.

²³⁰ Ndi nè disànkà dyàbùngì dyà kumanya nè Nzambi wa Dipungila Dikùlukulu awu, Wàkaleeja bikhèenà-kumòna nè kufila bimanyinu nè maalu à kukèma awu, ùcidi ànu nè mwoyi leelù ewu. Nènku Dyulu divwàbo bàjinga kuyamù adi, dîngà ditùkù ku ngàsà wa Nzambi, tuyàayamù twètù pèètù, bwalu Nzambi umweumwe awu ùdì ùDileeja nè Yèyè ùdì Nzambi umweumwe awu munkaci mwètù.

²³¹ Kùdì aba munkaci mwètù, Taatù, mu dindà emu bàdì bàsaamà nè biikàle mu lukèngelu. Nebàpicilè mu mulongo

kampàndà wà babèèdi. Swàkù bwà kabàlù bàmba nè: “Èè, ncyèna ngiitabuuja nè Wèwè udi mwà kungambulwishakù nànsha kakesè to. Ndi—ndi...” Mukalenge, swàkù bwà aci kacikadi lwidi nànsha, kadi swàkù bwà bàlwe bavùluka nè Nzambi mmwambè nè: “Bimanyinu ebi nebifilè aba bàdi biitabuuja. Bòbò batentèkèlè babèèdi byanza, babèèdi nebàsangale.” Wèwè ngwàkacilaya; Wèwè ngwàkamba nànkù.

²³² Swàkù bwà bàlwe nè kaneemu kàà cijila, biikàlè biitabuuja nè pàdi ànu disambila dyenjibwe nè byanza byàtèèkiibu kùdibò, dìbà adi Nyumà Mwimpè àlwekù pambidi pààbò mùshindù udi mwanèètù wa bakàji munanga udi mufunde lukonko elu ewu, wàmba mwàkamba Nyumà Mwimpè kushipa buumuntù bwèndè bwà cifwàkà nè dibàtiiza dyà dikèmesha dyà bwikadi Bwèndè.

²³³ Swàkù bwà aci ciikàlè—ciikalèku bwenzeji pa muntu nè muntu udi ulwa mu dindà emu awu, Mukalenge. Enzàku nànkù. Swàkù bwà bwòndopiibwè. Swàkù bwà bàlwe bamanyè, bamanyè kakùyì mündidimbì wà mpatà to nè Wèwè ngudi mucilayè nè Kwèna mwà kushima to, nènku pàdi ànu bukènkè bùlenga, mîdimà nè mpatà bìdi byùmuka. Enzàku nànkù, Taatù. Tudi tubàlambula Kùdi mpindyewu patùdi tubàsambidila mu Dìna dyà Yesù apa. Amen!

²³⁴ Mpindyewu aba bàdi baswè bwà kubàsambidilabò abu, *elu* luseke dyàmbedi, elàayi mulongo ku nzùbu eku, pàdi Teddy útwinbila nè: *Ngàngàbukà Munène Udi Pabwipi Mpindyewu*. Juukàayi kuulu, lwà paanyimà pààpa, bàmwè bàà ku bòbò bàdi lwà *mwab'ewu*.

Ngàngàbukà munène mpindyewu . . .

²³⁵ Mwanèètù Neville. Tùngùnukaayi ànu nè kwela mulongo, nwenda nulwa. Netwikale biimàne mwab'ewu. Èkèleeziyà mujimà ikalè munkaci mwà kusambila. Nè Mwanèètù Neville nè mèmè netwikalè pàmwè mwab'ewu; yèyè neikalè munkaci mwà kulaaba bantu maanyì, mèmè nengìikalè ntentekela babèèdi byanza, ànu lwà kumpàlà eku. Mpindyewu, bantu bònso mu disambila mpindyewu.

²³⁶ Mpindyewu citùdi twenza ncinyi? Tudi tulwa bwà kulaaba babèèdi maanyì nè bwà kubàsambidila. Mpindyewu lekèlaayi nnùtèlèlè Mifundu. “Kwòkò muntu kampàndà munkaci mwènù, ùsaama, àbiikidishè bakùlù bàà èkèleeziyà; bàbàlaabè maanyì nè bàbàsambidilè: Disambila dyà diitabuuja nedisungilè mubèèdi, Nzambi neàbàjuulè panshi; aba bàvwà benzè mpèèkaatù kampàndà, nebàbàfwilèyi luse. Tondèlàngànaayi bilèmà byènù muntu nè mukwèndè, nè sambidilàngànaayi muntu nè mukwèndè, bwà nwamòna mwà kwondopiibwa.”

Mpindyewu bàdi bashààle, elu luseke, panùdi nujinga, panùdi ànu nufika lwà kwìnshi kwà mulongo kwàka, mwaba wàwa, mu dyàpa dyàdya, nwènù ditwayi ànu mu nyimà amu. Mpindyewu mukùlù, kaaba aka, wa èkèleeziyà, neénzè dilaaba

dyà maanyì nè disambila. Mémè nênsambidilè nè ntentekele babèèdi byanza. Nènku mpindyewu, vùlukàayi balundà bàanyi nè, nwênù bàdi biimàne mu mulongo wà babèèdi abu, eci ke cikondo cyà kujaadika nè udi witabuuja cyùdi mwimànyine kaaba aka. Bikèngela ùsangalè.

Nènku ndi ngiitabuuja nè mwoyi wànyì wònsò nè, ke cìvwà cilamè mààmù cikondo cyònsò eci (pèndè yèyè awu, mukàji mununu), mbwalu ndi ngiitabuuja nàнку. Too nè pàdiYe ùngambila nè (ùdi mwà kwikala ùpunga nè lufù), kàdi too nè pàngambilàYe, ndi ngiitabuuja nè kènà ùfwa to. Nwamònu anyi? Nènku mpindyewu, ndi mumanyè nè ùdi nè cyà kuya, nè ùkaadi mukùlàkàje bwà kuyayè, nè yèyè mmuswè kuya, nè ùteeta bwà kuya. Kàdi nànsha nàнку nèngiikale—nèngiitabuuje nè Yèyè mmufwànyine kungambila. Mpindyewu ndi ngèèla meeji nè mMufwànyine kungambila, nwamònu's. Mpindyewu Yèyè ùdi mwà kupanga kungambila. Ncyèna mumanyè to, ncyèna mumanyè nè Yèyè neàcyènzè to, kàdi ndi mémè ànu ngiitabuuja nè Yèyè neàcyènzè. Nwamònu anyi? Kàdi too nè mpindyewu, Yèyè kí mmungambile kantu nànsha kàmwè pa bwalu abu to. Nè mémè ndi ncìitabuuja. Nè wèwè, ku ditùkù nè ku ditùkù, udi . . .

²³⁷ Ncìtu ndeeja bantu patòòke cyònsò cìdiYe ùndeeja to, nudi bamanyè nàнку's. Èè, makèèlèlè awu, mwà nsanganyibwa mu mwaba kampàndà, nè mémè kumòna cìkèèna-kumòna ànu menemene cìvwà nè cyà kwenza, nè Nzambi mmumanyè nè aci ncìlelèlè, nè musòmbe ànu nè bantu bakwàbò bàbìdi anyi bàsàtù. Paanyimà bu pàà citùpà cijimà cyà díbà nàнку awu mémè kucimòna cyènzeka, ànu mu cyòci menemene, ànu mùvwàbi menemene amu. Mwà mwimàne ànu mwaba awu, mwikàle ànu nzakalala mu mémè, munkaci mwà kwela meeji. Nwamònu anyi? Pàmwàpa . . . Mémè nè: "Pàmwàpa bìvwà bìkèngela bwà mémè kwikala mubàmbile nè nebìikalè mùshindù awu." Kàdi mémè kwamba nè: "Èè, bìlekèlè ànu nàнку's." Nwamònu anyi?

²³⁸ Nènku aci cìdi cyènzeka ku ditùkù nè ku ditùkù, nwamònu's. Cìntu kampàndà necyènzekè, mémè ndi ànu ncìlekela. Nzambi mmumanyè nè m'bulelèlè. Nwamònu anyi? Ànu cìntu kampàndà cìikalà mwà kwenzeka, ciikàle ànu cìcìleeja, cìcyàmba. Cìntu kampàndà cìdi mwà kummwènekèla, cyàmba nè: "Ambà wèwè ànu dìyì *kampàndà* mùshindù *kampàndà*, nè cìntu *eci* necyènzekè kaaba aka." Nè pashìishe nèncyàmbè nè: "Èè, bìikalè mùshindù awu." Pashìishe nèntàngilè, ncyòci eci lwà apa. Nwamònu anyi? Èyowà.

²³⁹ Èè, bu Yèyè mwà kwenza bintu kampàndà, byà mubidi, cìntu kampàndà cìdi kacìyì nè mwoyi munda mwàci to, kwenza nè cìtentemukè ku Dìyì Dyèndè, bwalu tudi bacyambe, mmùshindù kaayi mutàmbidile ùdiYe mwà kwenza bwèbè wèwè udi mudìsangìshè naanyì; Wèwè udi naanyì, udi—udi mwanèètù wa balùme nè mwanèètù wa bakàji udi usaama. Nènku twètù twamba mèyì aa nè: "Bukolè bwà Nzambi bwòndòpèku muntu

ewu,” mòna’s, bikèngela byènzekè. Mpindyewu, bintu byà mubidi abi kabyèna mwà kwamba nè: “To, ndi ngèèla aci mpatà” to. Bìdi ànu byènzeka. Kàdi wèwè udi mwà kwamba nè: “Èè, ndi ndikónka,” nènku kabyàkwenzeka to, wamònu’s. Kàdi bu wèwè ànu mwà kutùngunuka nè kushààla ànu mu njila nè meeji èbè awu mpindyewu nè: “Nengòndopiibwè,” bìdi bikèngela wèwè kucipeta. Nudi nwitabuuja aci anyi?

²⁴⁰ Mpindyewu tùsambilàayi. Taatù wetù wa mu Dyulu, pàndi ntentekela nsongààkàji ewu byanza, maamù mutekète udi mwimàne apa ewu, udi usaama cimpumpu cibì. Lekèlà . . .

²⁴¹ [Mwanèètù Branham ùdi ùtùngunuka nè kusambidila babèèdì. Katùpà kàà mukàbà wà mèyi munda mutupù—Muf.]

²⁴² Nè pa nàнку ndi ndòmba bwà Wèwè kwondopakù bantu bàdìbo batentèkèle mìshwàlà eyi. Bàpèèshekù malòmba àbò. Mu Dìna dyà Yesù Kilistò, mmùndì ndòmba nùнку. Amen.

²⁴³ Mu dyanyisha dyà ndòndò dyà kushààla kwènù, nè lulamatu lwènù bwà kushààla dībà dyònsò edi, nè kwindila mu èkèleeziyà mùshindù ewu, patùdì . . . Kàdi ncyèna mumanyè mwaba mwimpè wà kwikala to, kí mmwòmò anyì, kutàmba mu èkèleeziyà? Ncyèna ànu mumanyè mwaba mutàmbe bwimpè wà kwikala to. Nè disàmbiibwa ditùdì naadi mu kaneemu kàà nè Nzambi . . . kàà nè Yèyè ùdi kaaba aka mpindyewu.

²⁴⁴ Nènku twètù, ànu bwà katanci kakesè cyanààna, twànjàayibi kwelangana meeji bwà mùshindù wùdìYe munène, nè cidìYe mutwènzèle. Citùvwà mwà kwikala bènzè ncinyì bu katùyì Nendè? Mwinè mutùdì baMumòne, kakùyì cintu nànsha cìmwè cidìYe mutwàmbile ku cyòci eci: Úvwà mwà kumpèèsha bikenà-kumòna, nènku ndi nnwèla lukonko, mu dindà emu, kacya nukààdikù bamòne cìmwè kaciyi cikum̀bàne anyi? Ànu menemene cyàkambàYe nè Neènzè, ànu pa dībà adi mene. Dībà adi, Yèyè ùdi Nzambi. Dībà adi, Yèyè ùdi Taatù wetù. Yèyè mmutùangè. Nè mwaba wònsò wùdì Dyulu Dyèndè awu, tudi bamanyè nè tudi benzèjiibwe bwà kuya kuntwaku dīngà ditùkù. Tudi bamanyè nè Yèyè udi kaaba aka mpindyewu. Tudi bamanyè aci.

²⁴⁵ Twètù, tudi tutàngila ku bintu bitùdì katùyì tumòna to. Mpindyewu bààbùngì bàà kunùdì bàvwa babàsambidile, nènku, nwamònu’s, patùdì ànu tubenga bileeji byònsò bya cintu kanà cyònsò cidì cibèngangana nè aci apa. Nwamònu anyi? Cyònsò cidì Nzambi mulayè, nwamònu’s, mwena Kilistò kèna ùtàngila . . . Kwèna umòna nè mèsù èbè to, nànsha bishi. Aci’s nudi bamanyè. Kwèna umòna nè mèsù èbè to. Udi umòna nè mwoyi wèbè. Nwamònu anyi? *Kumòna* mbwena kwamba nè “kuumvwa.” Udi umvwa nè mwoyi wèbè, ki bwà cinyì tudi tutàngila ku bintu bìdì mèsù ètù kàyì àmòna to. Nwamònu anyi? Ditonda dyà beena Kilistò, byà mvità byònsò byà bwena Kilistò, mbishìndamijila pa cyòci aci. Twètù, tudi tutàngila bintu bitùdì

katùyì tumòna to, bwalu Abraham wàkabùikila bintu bìvwà kabiyìku abi, bu nè bìvwakù, bwalu yêyè wàkiitabuuja Nzambi. Nwamònu anyi?

²⁴⁶ Mpindyewu citùdì twenza mpindyewu ncinyi? Mpindyewu pàdìbo bàkusambidile mùshindù awu, dîbà adi Nzambi mmulayè bwà kukwondopa. Dîbà adi mpindyewu mene udi mwà kupanga kuumvwa dishiilangana nànsha dikesè, kàdi Yêyè kacya. . . Aci, kacyenà nànkù to nànsha kakesè. Nwamònu anyi? Tudi tucitabuuja, nànsha bìshi.

²⁴⁷ Bu wíkalapù nànsha mumanyè, ndi mulwè ku cyambilu eku kùkaadi mèbà matwè ku àbìdì nè ncìvwa ngèèla meeji nè mvwa mwà kwenza nànsha citùpà cyà disangisha to. Mvwa mucyòke bikolè nè muzengèle, nè mudyùmvwè bu nè mvwa mukwàcike kùdì cimpumpu, kàdi mpindyewu ndi ndyùmvwa bîmpè bwalu mvwa mwambè nè: “Ndi mwenzèjìibwe kùdì Nzambi. Ndi ngiitabuuja Nzambi.” Nè byàkakèngela bwà mèmè kulwangana naaci. Mukàjàànyì udi pààpa wàwa’s ùvwa mwà kunwàmbila cintu cimwècimwè aci, mu kuteeta bwà kufika kaaba aka mu dindà emu, nè dîyì dîvwa dîmpàte pa muminu, nè bikwàbò byònsò. Mèmè nè: “Mmunyì mungààpeta mùshindù wà kucyenza?” Kàdi, bwà kwamba menemene, ndi ndyùmvwa bilenga be mpindyewu. Nènku ndi—ndi ngèèla meeji nè ndi mufwànyine kwangata cyena-bwalu cyànyì kutùngunuka nè kuyiisha, nè—nè kudyùmvwa ànu bîmpè.

²⁴⁸ Kàdi, bwalu, nudi numòna’s, bikèngela ùtangilè bintu byùdì kùyì umòna nè mèsù èbè abi to. Udi ucimòna nè mwoyi wèbè. Udi ucitabuuja, nè udi ufila bujaadiki bwà bintu byùdì kùyì umòna abi, kàdi byùdì witabuuja abi. Bwalu, ndiitabuuja. “Nè diitabuuja ndilenga dyà bintu bitèkemena, cileeeji cyà bintu bìdì kabiyì bimwèka to.”

²⁴⁹ Mvwa mutàngìle, mu dindà emu, mwena Kilistò wa citende udi musòmbe kumpalà kwànyì eku ewu. Nè ndi mumanyè dipàngadika kampàndà dîvwà muntu awu mmwangàte. Nè ncyà bushùwà nè ndi ngàanyisha aci. Ncyèna mufwànyine kwamba nè ùvwa nganyì to, kàdi ndi—ndi ngàanyisha di—dipàngadika didì mwena Kilistò kampàndà ewu, kakùyì ditàngila dyà nè ùvwa mwà kwikala nànsha mukwàcishi, mulundà kampàndà, taatù anyì maamù, anyì cyònsò civwàku aci, ùdi ùjinga kushààla nè lulamatu kùdì Kilistò. Nwamònu anyi?

²⁵⁰ Ke mùshindù unùdì nupeta munanga kampàndà, nku diikala nè lulamatu. Kwikala nè lulamatu ke mùshindù wa kupeta banangìbwè bèètù. Shààla wèwè ànu nè ditwishìibwa dyèbè adi. Ikàlà mutwishìibwe nè udi mu bulongame nè Nzambi, nè dîbà adi shààla wèwè ànu mwaba awu. Shààla wèwè ànu naaci. Cintu nànsha cimwè kacyenà mwà kukunyungisha kukuumushakù to bu wèwè ànu mwà kushààla naaci.

²⁵¹ Mpindyewu, netwënzè bônso bilëma. Vùlukàayi ànu aci. Nënku panùdi nutàngilangana muntu nè mukwëndè, kanùtàngidi ku cilëmà cyà muntu mukwàbò to. Nwamònu's, kanwënji nànkù to, bwalu, vùlukàayi nè, nudi nwenza bilëma, nwènù pèènù. Kàdi tàngilàayi Kilistò udi ulombola muntu ewu awu. Nënku bôbò dijinga nè dikwàcisha kampàndà, dîbà adi udi ubàsambidila. Ke—ke mùshindù wutùdi tupetangana ngwôwò awu, nwamònu's, kusambila. Nënku, vùlukàayi nè, panùdi nusambidila muntu mukwàbò mwikale mu lutàtù lwà mùshindù kampàndà alu, Nzambì neàkutwe musinga nè àkwondòpè paùdi usambidila muntu mukwàbò apu. Neyà bushùwà. Ke pàdi bwena Kilistò bushindamijila apu, bwà kukwàcishangana muntu nè mukwëndè, kwenzelangana muntu nè mukwëndè, kwikala nè kalolo muntu nè mukwëndè, kuumvwangana muntu nè mukwëndè. Mpindyewu wèwè mumòne cilëmà cyà mutumba neebè, umòna mwaba wùdiye mwenzèle bibi, kwënji nendè bibi to, kàdi musambidile ànu cyanààna. Tùngunukà ànu nè kusambila, nè Nzambì neūmvwè cyôci aci. Yèyè neàlongololè bintu byônso.

²⁵² Mpindyewu, ndi ntèkemenà nè, cyôci ciikàle diswa dyà Mukalenge, ngèèla meeji nè Billy ùdi nè ndongolwelu kampàndà, ùtu ùtùmina muntu yônso kartà ku poste. Nënku maman yèyè ànu musàngùlùke bîmpè lumingu elu, bwà ku dyètù dimanya mpindyewu, katwèna batwìshùbwe to, kàdi mààmù yèyè mwà kusàngala bîmpè lumingu elu, nè bikwàbò byônso, mu dyàlumingu dyàlondà edi ndi—ndi muswè kwakula pa Diyishà dyà—dyà Èvànjeeliyò. Bu aci mwà kwikala cîmpè nè wetù—nè wetù mpaasàtà munanga ewu. Netwìkalè banwindile bwà nwènù kwalukila bu nwènù mwà kwikala nè mùshindù. Bu nwènù mwà kulwa, netwìkalè nè disànkà dyà kwikala neenù.

²⁵³ Nudi baMunangè nè mwoyi wènù wônso anyi? Yèyè kî mmulenga wa dikèma anyi? Citùvwà mwà kwenza ncinyi bu katùyi Nendè? Mpindyewu cyùdiku mufwànyine kwenza ncinyi? Udikù mwà kungambila cintu kampàndà cidi cifwànyine kwikala citàmbe bunène anyi? Wèwè mwà kundeeja cintu kampàndà cyà citàmbe aci bunène, dîbà adi nè—nè—nèmpàanyishè cyônso cîndi naaci, nè kujinga ciwàndeeja cidi citàmbe Eci bunène aci. Èyowà's, mukalenge. Eci ke cintu cyà citàmbe bunène cîndiku mumanyè, cyà kumanya nè ditwìshùbwa nè tudi basùngidùbwe, bwà kumanya nè Nzambì mwìnè wàkenza maulu nè buloba awu ùvwa mwà kuDipwekesha Yèyè mwìnè nè kulwa kusòmbela munkaci mwètù, nè kutwènzelaçi.

²⁵⁴ Mpindyewu mùshindù awu ke wutùdi tumanya nè tudi mu bulelèlè anyi to, nwamònu's, bwalu ke cintu mene cyàkenzàYe aci, ku cibangidilu, nè beena Kilistò abu kale wàwa, èkèleeziyà mene, mudimu mene, mùshindù wàkatentemukà Nyumà Mwîmpè awu, nè mùshindù wàkabàlwishà dyabùlù,

nè mùshindù wàkiimanàbo, ke cintu cìmwècìmwè aci cìdì cyènzekà kaaba aka mene, nè bimanyinu bìmwebìmwè abi, maalu à kukèma àmwèàmwe awu, Nzambi umweumwe awu, cijaadiki cìdì kaciyi mwà kupangila Cyèndè aci.

²⁵⁵ Ngambìlaayi, mu mwâkù wa maalu à mamanya, ngambìlaayi mu mùshindù wà maalu à mamanya, mùvwà muntu mwà kudyànjila kwamba cintu kampàndà cìvwà mwà kwenzeka mu bidimu anyi bikondo bìcìvwà bilwa, kumpàlà kwà kwenzekaci. Ndeejàayi bukolè, nè mwaba wùvwàbo bufwànyine kwikala, bùvwà bufwànyine kudyànjila kumanya cyôci aci kumpàlà kwà kwenzekaci. Ngambìlaayi meeji kanà ônsò à muntu àvwà mafwànyine kupingana cyànyimà kupicila mu cintu kanà cyônsò cinùdì baswè aci, nè ndeejàayikù mu mùshindù kanà wônsò wunùdì bafwànyine kumòna cintu kampàndà nè kudyànjila kwamba cintu kampàndà, cìvwà cyènzèke ànu mu mùshindù wùdì—wùdìbì. Nwamònu anyi? Kawènakù to.

²⁵⁶ Pa nànkù, Yèyè ùdì Nzambi. Nwamònu's, Yèyè ùdì Nzambi. Nènku bwalu Yèyè ùdì Nzambi, ku ngàsà Wendè Ùdì ùlwa ùsòmba neetù, nè ànu mwàkenzàYe nè bantu bàà kale bààkadyànjila kwamba maalu aa abu, nè cyônsò cyà kùdìbì cyàkenazeka ànu mùshindù wùvwàci cidyànjila kwamba. Mpindyewu Nzambi umweumwe awu ùdì neetù, ùdyànjila kwamba nè kuleeja ànu menemene bintu bìmwebìmwè byàkenzàYe kale wàwa abi. Mòna's, tuvwa nè cyà kwikala nè disànkà dyàbùngì, tuvwa nè cyà kwikala twenda tutùpika ku divuba nè ku divuba, mùshindù awu, twendela ànu mu cibwàshìbwàshì, ànu bu nànkù's, bwalu tudi bamanyè.

²⁵⁷ Tudi bamanyè nè tudi buumùke ku lufù bayè ku Mwoyi. Tudi bamanyè nè tudi nè lupàndu. Tudi bamanyè nè tudi beena Kilistò. Nè tudi bamanyè nè tuyààya mu Dyulu, bwalu Nzambi ngudi mufile mulayi, kàdì's ke Yèyè ewu ùkwàta neetù mudimu, nè mu mùshindù wà tuMumòna.

²⁵⁸ Tudi tuMumòna. Mmunyi mùndì mMumòna's? Pàndì nnùmòna apu. Wèwè uMumòna munda mwànyì; mèmè mMumòna munda mwèbè. Nwamònu's, ndi mmòna cìdìYe ùkwenzela's. Mpindyewu mmèmè ewu mMumòna apa ùmbuulwila Dìyi. Wèwè udi wamba nè: “Mmunyi mùdì mwà kuMumòna munda mwànyì?” Èè, tàngilà, n'Yèyè ewu apa munkaci mwà kumbuulwila Dìyi. Ndi nDìmòna mwaba awu, Yèyè ùnùpèèshaDì, nè nwènù nuDilama. Nwamònu anyi? Nè pashìishe udi utàngila paanyimà, wamba nè: “Mmunyi mùdìye, aci ncyènzèke munyi?” Pashìishe walukila, ujandula nè aci ncyà bushùwà, nwamònu's. Pa nànkù udi uMumòna munda mwànyì; ndi mMumòna munda mwèbè.

²⁵⁹ Nènku tudi mwà kuMumòna mu dijuuka dyà dîbà. Tudi mwà kuMumòna mu dibwela dyà dîbà. Tudi mwà kuMumòna mu bilòngò. Tudi mwà kuMumòna mu—Tudi mwà kuMumòna

mwaba kanà wònsò, bwalu tudi buumùke ku bintu byà ciipaanshi byà ngiikàdìlù udi muswikàkàne nè buloba ewu, tubwela mu cintu citùmbùke cyà butùmbi bwà Nzambi eci, bwà twapeta mwà kumòna bulenga Bwèndè.

²⁶⁰ Kùkaadi ndambù wa matùkù, pâmvwà nsanganyibwa mu lwendu elu, lwà mu—mu Cibeeba cyà mu Alaska mwàmwa, pangàakayà mu lwendu lwà bulembi, Mwà kuntwaku ndìkonka nè: “Bwà cinyi? Bwà cinyi?” Tàngilàayi mùdì—mùdì Nzambi wa cyà bushùwà. Mpindyewu’s kùdì babèèdì myaba yònsò, kàdì nànsha nànkù Nzambi mwikale mumanyè.

²⁶¹ Mpindyewu, mààlabà ndi nè cyà kuumuka, Mwanèètù Roy ùdì paanyimà pààpa wàwa, nè twètù bònsò, tudi nè cyà kuumuka mààlabà bwà kuya ku Colorado, bwà lwètù . . . kuya kalemba mu movù wònsò wà mabèji àpòòpoka mutùdì . . . Ndi mufùme ku masangisha, bwà kuya. Ncyèna mwà kuya to, bwà maman, bwà mùshindù ùdì maman.

²⁶² Mpindyewu tàngilàayi musàngèelu wà Nyumà Mwîmpè. Yèyè ùvwa mumanyè aci kùkaadi ntàntà mule. Pa nànkù, pamutù pàà kundekela nya, Yèyè kukùdimuka è kumpèèsha cìkèèna—kumòna nè kuntùma kuntwaku, nè kumpèèsha lwendu lwà bulembi lùmvwà nciyì mwà kubwela mu Colorado to, nwamònu’s, bwalu nyama ayi kayèna mu Colorado mùshindù awu to. Kukùdimuka, nè kumpèèsha cyòcì aci ku cìkèèna—kumòna, nè kumpeteshayè cyòcì aci, mumanyè nè bìvwa bìkèngela bwà Yèyè kundama mu lwendu elu mutàngile ku Colorado kwàka. Nwènu bàdì bàakula bwà bwîmpè nè luse’s wè! Pashiishe bwà cinyi? Dìbà adi, kùkaadi ntàntà mule, Yèyè ùvwa mumanyè nè mààmù wanyì ùvwa nè cyà kukènga. Ùvwa mumanyè nè mààmù wanyì ùvwa mwà kuya mu lùpitaadi. PìikalàYè mwanyishe, dìbà adi Ùdì ùcyènza mu kiipàcìlà kampàndà kîmpè kândì nciyì mumanyè kantu nànsha kàmwe pa kòkò to. Kàdì ndi mumanyè nè byònsò abi “bìdì bìkwàta mudimu pàmwe bwà dyàkalenga dyà bàdì banangè Mukalenge.”

²⁶³ Bu twètù ànu mwà kwimanakù ku musangu nè ku musangu, èkèleeziyà, nè kumòna Nzambi wetù’s! Imàna ànu cyanàana ùumuke ku dilubakana dyèbè adi, nè wimanèku katanci kakesè mu Bwikadi bwà Nyumà Wèndè, nènku udi ànu mwà kuMumòna ùkwàta mudimu myaba yònsò. Nudi numòna mùdìYe mwîmpè anyì?

²⁶⁴ Mpindyewu’s ke mààmù wàwa mulààle kuntwaku, nè mème ngèèlangana meeji bwèndè. Bwà cinyi Yèyè kààkamulekelakù ùya pàvwàye mupetè cìkùminà aci? Bwà cinyi kààkafwàku ànu pa dìbà adi mene? Kàdì, nwamònu’s, Yèyè mumanyè aci kumpàlā kwà dìbà, nè mumanyè nè mvwa mulayè bwà . . . Mwà nya ku Colorado, nè mumanyè nè ntu munangè kubwela mu meetu mùshindù awu, Yèyè kukùdimuka kàdì kumpèèsha cyà citàmbe bwîmpè; kuntumayè kuntwaku, nè kungambila cîmvwà

mwà kupeta, nè byònsò pa bwalu abu, kumpàlà mene kwà mèmè kuumuka; kungambila mùvwà bantu nè cyà kwikala bavwàle, nè citùdi bafwànyine kwenza, nè byònsò pa bwalu abu. Pashiishe mèmè kulwa, kunùlondela. Pashiishe yèyè kubànda è kucimòna cyènzeka, kwalukila, ànu menemene mùshindù wùdici. Menemene, nwamònu's, mumanyè nè maman ùvwà mwà kwikala kuntwaku, mumanyè nè yèyè—yèyè ùvwà mwà kwikala mucibùlùke pa dībà edi, nè ncivwa mwà kwikala mufwànyine bwà kwenza lwendu lukwàbò elu to. Nwamònu anyi? Katùvwa bafwànyine kuumv-... Ncyàkacyùmvmwakù to, mèmè mwinè, dībà adi. Kàdi wèwè ànu mudilekèlèlè kùdiYe nè muMutàngile, Yèyè ùdi ùlombola byònsò ànu mu byòbì menemene. Nwamònu's, Yèyè ùdi ùcivwija cyònsò cipàtuka ànu mu cyòci, ku cidya ku cidya.

²⁶⁵ Ditùku adi mvwa mwimàne ku luseke lwà mwambi mutekète uvwa mulòote ndambù wa bilòotà, nè ùvwà muntwàdile bilòotà abi. Pààkalwà dyumvwija, tuvwa biimàne mwaba awu, Billy nè mèmè nè mwambi ewu, biimàne mwaba awu pàmwè. Nènku's ke cyòci aci mwaba awu. Mòna's, civwa cipwàngàne ànu menemene nè mwàci mwònsò. Nè mùshindù mwinè wùvwà muntu awu mwimàne mwaba awu nè—nè—nè kaneemu, nè mwà kumòna mùvwà Nyumà Mwimpè mwà kubuulula bintu abi, nè kumwaluja buludì paanyimà nè kuleeja menemene mu njila nè mwaba mene ùvwàci nè cyà kusanganyibwa. Kaa, ndi nnwàmbila nè, Yèyè ùdi Nzambi. Yèyè, Ùtu ùsòmbela . . . Yèyè ùdi Nzambi.

²⁶⁶ Bààbúngì bàà kunùdi nwènù nudi baditàcishe. Nudi balekèle balundà bèènù balùme anyi balundà bèènù bakàji, balekèle nzùbù yènù, nè bikwàbò, nè bààbúngì bàà kunùdi byàkanùkèngela bwà kupàtuka munkaci mwà beena dyènù nè balundà, nè bikwàbò, nè balundà bàà kale banùdi bamanyè kùkaadi ntàntà mule, bwà kwendela mu njila wa Mukalenge. Ndi nnwèla kàlumbandi bwà cyòci aci. Ndi ngèèla meeji nè abi's mbilenga be bwà kwenza nànkus. Mpindyewu bwalu nudi bamòne Bukènkè bwà Èvànjeelìyò, nè Bwòbù abu's m'Bulelèlè, nè nudi—nenwèndelè mu Bukènkè abu. Nènku cyònsò cinùdi nwenza aci, bàà, cyònsò cinùdi nwenza, kwònsò kunùyaayà, nyeemààyi mmwènekèlu wa bubì, nè londààyi Kilistò. Paùcidi ànu nè mwoyi, shààla wèwè ànu mu njila awu. Kanùumukumù to, ncyà bushùwà nè necifutè bimpè. M'Mwoyi wà Cyendèlèlè.

²⁶⁷ Nènku ndi mmòna maman dībà—dībà kanà dyònsò divwàye. . . tusunsa tukesè tùvwàye mwà kupingana mu yèyè. Ndi ngàmbe nè: “Maman, maman, udi ungumvwa anyi?” Misangu mikwàbò ùdi ànu mulààle mwaba awu, kàyi mwà kunguumvwa to. Pashiishe paanyimà pàà katanci neàmbè nè: “uh,” ùkùpa mutù mùshindù ewu. Nèngàmbe nè: “Udi. . .” Mèmè kwamba, dilòlò adi, mèmè kwamba nè: “Maman, udi mummanyè anyi?” Kàvwa mummanyè to. Mèmè nè: “Udi

mumanyè nè nganyì udi mwimàne kaaba aka ewu anyì?” To, yêyè kàvwa mumanyè aci to. Mémè nè: “Maman, udi mumanyè Yesù anyì?” Ke yêyè... Kaa, ekèlekèle! Mmufwànyine kupwà mwanèndè sungasunga mwoyi, kàdi kèna mwà kupwà Yesù mwoyi to. Ke cyôci aci. Kaa, mwanèètù!

²⁶⁸ Kwèna mumanyè cìdici cyùmvwija to ànu too nè pawàlwà mu dîkù dyèbè sungasunga, kufika ku cyôci aci, nudi numòna's. KuMumanya Yêyè ke Mwoyi. KuMumanya Yêyè ke disànkishibwa dyà kumanya nè, pàdi lubilu lwà mwoyi elu lùjika, tudi nè Nzùbu dyàmwàmwa dyà maulu mwàmwa. Cìdiye, ncyèna mumanyè to. Ncyèna ànu mumanyè mwà kunwàmbila mùdiye mufwànyine kwikala nànkù to, bwalu ncyèna mumanyè to, mémè mwinè. Kàdi ndi mumanyè nè dîngà ditùkù, ku ngàsà wa Nzambi, netùye Kuntwaku.

²⁶⁹ Nsambidilaayi lumingu elu. Ndi naadi dijinga. Nènkù mpindyewu nwànsambidilaayikù; nèngiikàlè nnùsambidila. Bu Mukalenge mwà kwanyisha, mwikàlè muswè, nèntwilanganè neenù mu dyàlumingu dilwalwà. Nènkù vùlukàayi disangisha dyà dilòòlò edi. Bìdi mwà kwenzeka nè, byòbì kabiyi bikèngela bwà mémè kwikala musòmbè dilòòlò edi, anyi cintu kampàndà, nè kwikala kuntu kwàka nè maman to, pàmwàpa nengàalukilè neenù dilòòlò edi.

²⁷⁰ Nènkù mpindyewu, Mwanèètù Neville, mpaasàtà wetù wa mushinga mukolè ewu, àbandè kùnweku. Nè mùshindù mwinè wùndi cyà bushùwà... Kakwèna muntu nànsha umwe mwab'ewu to pa kuumusha bantu bàà kumbèlu, nudi bamanyè's. Tudi bònsò ànu citùdi tubiikila nè mbantu bàà kumbèlu. Ndi ngàanyisha lulamatu lwà Mwanèètù Neville bwà Bulelèlè bwà Èvànjeeliyò ebu. Ndi ngàanyisha lulamatu lwèndè nè meeji matòòke kumpàlè kwà bantu. Nènkù ditùkù adi, pàvwàye wàkula apu; ncìvwakù mwànji kucimòna to, kàdi pàvwàye mu disonsodiibwa apu, ùfila cipròfetà, mumbiikilè mùndi mupròfetà, mu disonsodiibwa. Wàwa kàvwa n'yêyè uvwa umbiikila nànkù to, awu ùvwa n'Nyumà Mwimpè. Pa nànkù aci kàdi kumpèèsha bukìtù nè diitabuujà bwà kutùngunuka, mu ndòndò myondòke nè butùmbùke bwà butàmbe kutùmbùka, nè Nzambi. Ndi nkwanyisha, Mwanèètù Neville. Nzambi àkubènèshèku kashidi. Nè too nè pàngàànùmòna cyàkàbìdi, Nzambi ikalè neenù. 

61-1015M Nkonko nè Mandamuna
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org